

NICWOFUN I

NICWOFUN JANERE PAPIA QIZEC I â II

NICWOFUN janere papia I â II irec maŋnao Israe â Judan̄ic erâ ñicwofunfâc-jen̄ic juwejumbin̄ janere dân̄ â binan̄ qâren̄kekiecne fokac. Erâ ñonden̄nao porofete jajahec, Elia â Elisa, jahere binan̄ i mâmâc bahuc râekicne. (*Ñicwofun I, gaŋ 17–19 â 21, erâ Ñicwofun II, gaŋ 1–9.*)

Ñicwofun I â II i bâfâuckepene dân̄kâne sâko jahec â moc fuakac.

Dâkâne namba 1 i Ñic I 1—11.

Dâkâne namba 2 i Ñic I 12—17.

Dâkâne namba 3 i ñe Ñic II 18—25.

Dâkâne namba 1 irec maŋnao *gaŋ 1—gaŋ 2:11* ira Dawidire dân̄ gâcne erâ hâmoc-ticnere binan̄ fokac. *Gaŋ 2:12—gaŋ 11* ira ñe ñicwofun Salomo ere binan̄ qâren̄kekiecne fokac. Salomo e ñic mama sâkoheczi ñicwofun gie-ticne bame wen̄in̄uc ewec, erâ Jerusalem haeo Wofun̄te taha ufun̄ bawec (*gaŋ 6–8*) irec binan̄ mecne, erâ wiac gâcne ebac eme Wofun̄zi maname sâqorewec irec dân̄ i mâmâc qâren̄kekiecne. Gie-ticnere dân̄ qizecne moc *gaŋ 2:12* ira kecziñuc râekicne fokac: “Eme Salomo e mamac-ticne Dawidire ñeñeo ñehame uucman̄-ticne sanan̄ qan̄qan̄ne fowec.”

Dâkâne namba 2 ira ñe Israe ñic janere uucman̄ fowefukume fâfâuc sâko fuame uucman̄ jajahec epic, irec dân̄ fokac. Uucman̄ jajahec ñe moc i Israe ñicguru 10 janere uucman̄, â moc ñe Juda â Benjamin̄ ñicguru janere uucman̄, in̄uc

fuawec. Ehame Israe ŋicguru 10 jaŋere uucmaŋ i fowefuku jara damaŋ 721 B. C. ira omaewec, irec dāŋ i māmâc fokâc.

Dâkâne namba 3 irec maŋnao ine Juda ŋicguru jaŋere uucmaŋte binan fokac. Eme binan i bawareku, Jerusalem hae qizec-jeŋic hetâc qâtâtiekiecne â Juda ŋicguru jaŋe Anutuzi manahame hehesic-jeŋicte erâ Babilonia mâreŋko bacjopa rakicne ira batarakicne. Wiac i jara damaŋ 586 B. C. ira fuawec.

ŊICWOFUŊ papia I â II irec maŋnao Israe â Juda ŋicguru jaŋere ŋicwofuŋfâc tuczi tuc juwefuhuc Anuture maio juju â gie-jeŋic weninuc ebac epie Wofuŋzi jambuŋ-jopawec me bâtiŋ-jopawec, dāŋ i mutaniŋkehuc mufua-nâre-fârekicne hâcne.

Abisagazi Dawidi kiŋaŋ qacnehuc juwec

¹ Ŋicwofuŋ Dawidi e jara bocjaha bazurâ ŋicqizec jâmbâŋ ewec. Ehame sahaç-ticne qoruc wiaczi foŋke-bipiehapie sifu mi hâroŋkewec.

² Inuc eme ŋicwofuŋte kiŋaŋ qaçafâc jaŋe zinuc âzâcnembiŋ: “Ŋicwofuŋ-nâŋec, nâŋe naru zeŋoŋ moc bâfua-garepene maŋfuŋgao juhuc kiŋaŋ qagarezejec. Ehuc ŋafeo me faigao fohuc hehâroŋguzejec.”

³ Jaŋe inuc muhuc Israe hae mâreŋ sâc naru sahaç hawari biaŋ moc bâfuaniŋte babasa gie bambiŋ. Ehuc Sunami mâreŋkonec naru moc zâŋene Abisaga bâfuârâ ŋicwofuŋtao bafisimbî. ⁴ Naru e sahaç hawariticne bianne jâmbâŋ. E ŋicwofuŋ jaunkehuc kiŋaŋ qacnewec, â ŋowe ŋonâŋ juju ine mi jupic.

*Adonia e mamac-ticne râsi ecnehuc ŃicwofuŃ
ŃeŃe rauckeocte fotariewec*

⁵ Eme Hagitire Ńokâ zâŃene Adonia, e sahaç fefe ehuc zĩŃuc muwec: “No ŃicwofuŃ ezepac!” Inuc muhuc keretac â becâsicko rara Ńic rocjopahuc kiŃaŃ qaqaçâc-ticne 50 maŃfuŃ-ticnao juiŃte rocjopawec wâc. ⁶ Mamac-ticnezi ine damen ira me ira zĩŃuc wiocnehuc mu bâtiŃ moc mi ecnewec, “Go wemocte inuc ekomec?” Eme Ńic e sahaç hawari-ticne biaŃne jâmbâŃ. E Abisalom fuame faicnao fuawec. ⁷ Ńic e Zerujare Ńokâ Joabe â taha bapa Abiata jahehec dân muc manac embiŃ, ehame jahe dânticne dopekepic. ⁸ Â taha bapa Zadoko â Jojadare Ńokâ Benaja â porofete NataŃ, erâ Simeĩ â Rei â Dawidire momori fuŃfuŃfâc, Ńic tâpiri sâkohec hâcne, jaŃe ine Adonia erao mi zuhuckembiŃ.

⁹ Eme Adonia e lama bulimakao Ńicne â bulimakao wokemaŃ sâkohec rocjoparâ qoruc qaqaçac Ńic ere opâ heririŃnao qânâ sâko moc Ńewec zâŃene Sohelete,* ira taha bâzi rikewec. Ehuc ŃicwofuŃte Ńokâfâc, qafâcne sasawa hâcne, erâ Judaniç gâcne ŃicwofuŃ kiŃaŃ qacnembiŃ jaŃe mâmâc hefârec-jopawec. ¹⁰ Porofete NataŃ â Benaja â ŃicwofuŃte momori fuŃfuŃfâc erâ hahac-ticne Salomo jaŃe ine mi hefârec-jopawec.

¹¹ Eme NataŃ e Salomore nençoc Batiçeba zĩŃuc wiocnewec: “Hagitire Ńokâ Adonia e bombon-nâŃec Dawidizi kâuc bahame biac ŃicwofuŃ ejec, i goki moc manamec me? ¹² Irec zi hazec râec, go gahacne â Ńokâge Salomo Ńohere juju wenĩŃuc

* **1:9:** Nânâcne dânko: Homa Qânâ.

erâ ñezickecmu irec dân moc gazape. ¹³ Ajoc, go zĩjuczia ñicwofuñ Dawidirao rarâ zĩjuc âzâcnec: ‘Ñicwofuñ-nane, go mârâc jaha kiñañ naruge no dân zĩjuc mupañke-naremeñ i: “No râriehape ñokâge Salomozi âkehocnurâ ñicwofuñ ñeñeo ñezejec.” Eme zi fuñne wenĩjucte Adoniazi ñicwofuñ ejec?’ ¹⁴ Erâ manac, go ñicwofuñhec dân muc manac ehuc juhapire jaha no fisirâ dânge dopeckehuc binañ gâcne zuhuckerâ bape taraocmu.”

¹⁵ Inuc âzâcneme Batiseba e ñicwofuñ juwec ficmañ ira raziwec. Ñicwofuñ e ine ñicqizec jâmbân ewecte Sunami ñokac Abisagazi kiñañ qacnehuc juwec. ¹⁶ Ehame Batiseba e ñicwofuñte maio fodaperâ zâñe mai-ticne mârenko hetutuckeme ñicwofuñzi wiocnehuc muwec: “Go wemo wiacte warekomec?” ¹⁷ Wiocneme dân zĩjuc bâtikiecnwec: “O bombon-nane, go Wofuñ Anutugere maio kiñañ naruge no zĩjuc mupañke-naremeñ: ‘No râriehape ñokâge Salomozi âkehocnurâ ñicwofuñ ñeñeo ñezejec!’ ¹⁸ Ñicwofuñ-nane, zi ine mi manahuc juhan̄tec mi Adoniazi ñicwofuñ ezejec i! ¹⁹ Ehuc bulimakao ñicne gâcne â bulimakao wokemañ sâkohec erâ lama wiac guru sâko rocjoparâ taha bâzi rikewec. Ehuc ñicwofuñ gore ñokâfâc sasawa erâ taha bapa Abiata â momori jañere micne Joabe hefârec-jopahuc kiñaññicge Salomo ine mi hefârewec. ²⁰ Inuc ewecte Israe ñic sasawa jañe ñicwofuñ-nane gorao zâñe fifâren̄gopien̄. Go râriehantec mozi ñicwofuñ juocmu i mufua-jarecmurâ won̄ec juñgopien̄ hâcne. ²¹ Erâ ñicwofuñ-

nane, juku zĩjuc fuazacte hâwicnukac: Go macfâcge jaŋerao zuhuckehuc hâmorâ zâŋeruŋko fohaŋtec no â ŋokâ-nane nâhe kiŋhec ezipecckohec.”

²² Eme Batiseba e ŋicwofuŋhec dân dân ehuc domahame porofete Natanzi fisiwec. ²³ Fisime ŋicwofuŋ zĩjuc âzâcnembiŋ: “Manakic, porofete Natan e warejec domakac.” Eme porofete e ŋicwofuŋte maio fuarâ zâŋe mai-ticne mârenko hetutuckewec. ²⁴ Erâ ŋicwofuŋ zĩjuc wiocnewec: “O ŋicwofuŋ, go gahac mutec Adoniazi âkehocgurâ ŋicwofuŋ gie bakac me weniŋuc?

²⁵ E miŋecgac hâcne hurâ bulimakao ŋicne gâcne â bulimakao wokemaŋ sâkohec erâ lama wiac guru sâko rocjopajec i taha bâzi rikekac. Ehuc ŋicwofuŋ gore ŋokâfâc sasawa â momori jaŋere micne erâ wâc taha bapa Abiata mâmâc hefârec-jopame jaŋe ehec tiwâ bâzi â opâ wiac nâŋgopien, erâ owackehuc zĩjuc muŋgopien: ‘Ŋicwofuŋ Adonia e damaŋ zora jurazihuc juzejec.’ ²⁶ Kiŋaŋŋicge no â taha bapa Zadoko â Jojadare ŋokâ Benaja erâ kiŋaŋŋicge Salomo nâŋe ine mi hefârec-nâpojec. ²⁷ Eme ŋicwofuŋ-nane, go mozi âkehocgurâ ŋicwofuŋ gie baocmu i kiŋaŋŋicfâcge nâŋe kâuc bahuc juhapene go gahac manatec wiac zi fuajec me weniŋuc?”

²⁸ Porofete e dân iŋuc mume ŋicwofuŋ Dawidizi manarâ zĩjuc muwec: “Batiseba wiracnepie wareoc!” Eme e warerâ ŋicwofuŋte maio domawec. ²⁹ Ehame ŋicwofuŋzi zĩjuc âzâcnewec: “Wofuŋ e jujâmbâŋkekacte zârâ hâriŋ fuŋne fuŋne irecnec bataracnu-fârewec.

³⁰ Eme no Wofuñ Israere Anutu hâcne ere maio zîñuc mujomire-garepo: ‘Ñokâge Salomo e juku âkehocnurâ ñicwofuñ gie rauckezejec.’ Inuc mu-pore miñecgac mupe fârine fua-jâmbânkeocmu.”

³¹ Mume Batiseba e fodapecnerâ zâñe mai-ticne mârenko hetutuckehuc zîñuc muwec: “Ñicwofuñ-nane Dawidi go damen zora jurazihuc juzemec!”

³² Eme ñicwofuñ Dawidizi zîñuc muwec: “Ñone taha bapa Zadoko â porofete Natan erâ Jojadare ñokâ Benaja wira-jarepie warenzepien.” Inuc mume wira-jarepie ñicwofuñte maio ware fuam-biñ. ³³ Eme ñicwofuñzi zîñuc jazawec: “Ñone kinanñicfâc-nane fekiecne rocjopapie ware bafic-ñopahuc ñokâ-nane Salomo nore dongi faio râerâ Gihon opâo bahunzepien. ³⁴ Eme taha bapa Zadoko â porofete Natan jahe wokeman ruac-nepire Israe ñic janere ñicwofuñ ezejec. Ehame geñ qahuc zîñuc munzepien: ‘Ñicwofuñ Salomo e jurazihuc juzejec!’ ³⁵ Inuc efârerâ jowa we-fupie eki âkehocnurâ ñicwofuñ ñeñe-naneo ñehuc Israe ñic gurin bajarezejec. E Israe â Juda ñicguru janere micne sâko eocte mutarakopac hâcne.” ³⁶ Eme Jojadare ñokâ Benajazi ñicwofuñ dân zîñuc bâtikiecnawec: “Inuc hâcne fuaze-jec! Ehame ñicwofuñ-nane gore Wofuñ Anutuzi mume sanankezejec! ³⁷ Ehuc ñicwofuñ-nane go dope hutuñ egarehuc juwec inuc jaha Salomo ecnezejec. Ehuc ñicwofuñ juju-ticnere zâñe bine bâsokame ñicwofuñ-nane Dawidi gore zâñe bine sirickezejec.”

³⁸ Eme taha bapa Zadoko â porofete Natan â Jojadare ñokâ Benaja erâ Kereti â Peleti mo-

mori guru jaŋe Salomo ŋicwofuŋ Dawidire donɣi faio râerâ Gihon opâo bahumbiŋ. ³⁹ Eme taha bapa Zadoko e bulimakao zuŋeo wokemaŋ opâ qapie hurâ domawec i Wofuŋte qoruc bozeonec rorâ Salomo ruacnewec. Ehame qeŋ qahapie ŋic ŋokac sasawa jaŋe owackehuc dân keczinuc mumbiŋ: “Ŋicwofuŋ Salomo e juraɣihuc juze-
 jec!” ⁴⁰ Taram e ŋic ŋokac sasawa jaŋe hehâckerâ Salomo bâjâpehuc risiembî. Erâ zeri bari ehuc gae wopie kike fânân-jeŋicte erâ mârenzi qiqiteckewec.

⁴¹ Eme Adonia e jahacne â tiwâ zepecte hefârec-jopawec jaŋe nânâ nâfârehuc fânân i manambiŋ. Â Joabe e qeŋfânân manarâ zinuc muwec: “Haeo ojowa sâko fuakac i fuŋne weninucte?” ⁴² E dân inuc muha muhame izia taha bapa Abiatare ŋokâ Jonatanzi fisiwec. Fisime Adoniasi zinuc âzâcnewec: “Warec, ŋic fârine go, biŋedân bianne moc mecne bafisi-
 kic.” ⁴³ Inuc mume Jonatanzi Adonia dân zinuc bâtikiecnawec: Aricne, no biŋedân zinuc bawarekopac: “Ŋicwofuŋ-nâŋec Dawidi e Salomo ŋicwofuŋ juocte âkendânnejec. ⁴⁴ Ehuc taha bapa Zadoko â porofete Natan â Jojadare ŋokâ Benaja erâ Kereti â Peleti momori ejareme ŋicwofuŋte donɣi faio râembien. ⁴⁵ Eme taha bapa Zadoko â porofete Natan jahe ŋicwofuŋ eocte Gihon opâo wokemaŋ ruacnepirec. Inuc epire taram irecnec zeri bari ehuc wefurâ hae sâkoo ojowa sâko epie fânân-jeŋic manambien hâcne. ⁴⁶ Erâ i sawa mâcne, Salomo e zi biac ŋicwofuŋ ŋeŋeo ŋekac. ⁴⁷ Eme ŋicwofuŋ kiŋaŋŋicfâc-ticne fekicne jaŋe

ñicwofuñ-nâñec Dawidi bubianj dân âzâcneniñte erao fisihuc zñuc âzâcnembienj: ‘Anutugezi Salomore zâñe biñe bâsokame gahacne zâñe biñe sirickezejec, â guriñ bapa gie-ticne basanañkeme gahacne jâuruzejec.’ Inuc mupie ñicwofuñ e fofo-ticnao ñehuc fodape-jarejec. ⁴⁸ Erâ wâc dân zñuc jazajec: ‘Wofuñ Israere Anutu e mumbiankezo. Eki hâcne mana-nareme soctofafâc-nane jañeraonec moczi zâñe-nanezi honehape âkehocnuhuc ñicwofuñ ñeñe-naneo ñekac.’ ”

⁴⁹ Eme Adoniazi hefârec-jopawec jañe dân i manarâ fâfâre sâqorehuc faharerâ sinñan qafârembiñ. ⁵⁰ Ehame Adoniazi Salomore hâwickewec. Irec faharerâ ra alata zuñenao menezzi hehawickewec. ⁵¹ Eme ñic gâcnezi Salomora fisirâ zñuc âzâcnembienj: “Manakic, Adonia e ñicwofuñ Salomo gore hâwickeme alata zuñenao hehawickehuc zñuc mukac: ‘Ñicwofuñ Salomo e zikazi kinanñic-ticne no mi qâhâmocnuocte mujomire-narezejec.’ ” ⁵² Eme Salomozi muwec: “Ñic e siocmâc juocmuo sahat-ticne moc mi bâuwapemu. Wiac hehesic moc ebac eocmuo ine hâmozejec.” ⁵³ Ñicwofuñ Salomo e inuc murâ ñic sorec-jopame ra Adonia alataonec rorâ jowa warembiñ. Eme ñicwofuñte maio fuarâ fodapecneme Salomozi zñuc âzâcnewec: “Sâcne, figao rac.”

2

Dawidizi Salomo mu keteñ ecnewec

¹ Eme Dawidi hâmoc damen- ticne qândânkewecte ñokâ- ticne Salomo unñân

keczinuc âzâcnewec: ² “Mârenj sâc ñic nânâc hâmonan̄te mukicnere zi hâmoc damen̄-nane maickekac wâc. Irec go sanan̄kerâ ñic fârine juzemec. ³ Ehuc Wofun̄ Anutugezi wiac mutâcne-gareekac i ren̄ke-fârezemec, erâ hata-ticnao âte rahuc dân̄sanan̄ â sâcmutâc â mumutâc erâ mumutan̄in̄ dân̄, Mosere sâcmutâc dân̄ko qâren̄ke-fârekeicne fokac i ninic jaha ren̄ke-fârezemec. In̄uc ecmuo ine wiac sasawa ebac etec fârio qaocmu â ira me ira rahuc mi bititiecmu. ⁴ Eham̄e Wofun̄ e no dân̄ zin̄uc mupan̄ke-narewec irec fârine bâfuaocmu: ‘Ñokâfâcge jan̄e hata-jen̄ic son̄an̄kehuc nore maio zoqac erâ aimun̄ â siocmâc jufâren̄in̄muo ine noni mupe Israe kikefun̄te ñicwofun̄ ñen̄eo ñic moc mi basa-jâmbân̄ken̄in̄mu.’

⁵ “Em̄e Zerujare ñokâ Joabe e wiac gâgâpâcne moc enarewec i goki wâc manakic. E Is-raere momori guru jan̄ere micne jahec Nerare ñokâ Abene â Jeterare ñokâ Amasa jahe kosa jofahuc wama damen̄ko zika qaqa gie bame socjekiczi umbika-ticne â kikehuhu-ticne ru-acnewec. ⁶ Go man̄qârân̄ fogarekac irec sâc ehuc ñic jan̄qân̄hec keci akicketec wama faio mi hâmozejec. ⁷ Â Gileade ñic Barizilai ere ñokâfâc ine ehâmo-jarehuc juzemec, ehuc mana-jare-han̄tec gore teboo nânâ nâhuc jun̄zepien̄. Man-akic, no hahacge Abisalomte hâwicnume wise-huc juhape jan̄e hâcne âgo enarembin̄. ⁸ Erâ manac, Gerare ñokâ Simeî e gohec jukac wâc, e Benjamin̄ mârên̄ko Bahurim hae ñekac irecnec. No Mahanaim haeo razo ehape damen̄ ira eki

hâcne mâretêc sâwecnuwec. Eme irec faicnao nohec bâbâfuac enacte Jordan opâo hufâme no Wofunje maio zîñuc mupañkecnepo: ‘No zikare micko mi râecgupemu.’ ⁹ Nîc e ine akicketec mi juzejec. Go ñic mañqârâñhec jukicte wenîñuc ecnetec sâckeocmu i gahac manakic. E janqânhec erâ sifu gateg soc ruahuc hâmozejec.”

*Dawidi hâmowec
(Bin I 29:26–30)*

¹⁰ Eme Dawidi e apa ñosafâc-ticne mârâc jaha hâmombîñ janerao zuhuckehuc hâmome hae qizecko duckembîñ. ¹¹ E Israe kikefun janere ñicwofun juhame jara 40 tarawec. E Heboron haeo jara 7 â Jerusalem haeo ine jara 33 ñicwofun juwec. ¹² Eme Salomo e mamac-ticne Dawidire eri ñeñeo ñehame uucmañ-ticne sanan qanqanewec.

Salomozi uucmañ-ticne foocte basanañkewec

¹³ Eme Hagitire ñokâ Adonia e Salomore nenjoc Batisebarao fisime zîñuc wiocnewec: “Go wamao warekic me?” Eme muwec: “Ine hâcne, no wamao fâkopac.” ¹⁴ Erâ zuhuckerâ muwec: “No dâñ piticne gazazo manasukopac.” Mume muwec: “Sâcne, mutec manape.” ¹⁵ Eme muwec: “Israe kikefun jaje zengoma norao zâñe fihuc no ñicwofun-jenîc jupemurâ muhapie uucmañ i nore biñe ewec, i gahac manakomec; eme sifu Wofunzi maname fowecte ñicwofun gie nowac rohuc qananere meo râekicne. ¹⁶ Eme zi nunumu mocjaha mac numu-garepe dâñnane mi qikiñnezemec.” Inuc mume zîñuc âzâcnewec: “Dâñge mutec manape.” ¹⁷ Eme muwec: “Go

ñicwofuñ Salomo âzâcnetec eki Sunami ñokac zâñene Abisaga nareme ñonâñ-nane ezac. Salomozì gore dân mi qikin̄neocmu.” ¹⁸ Eme Batisebazi dân zĩñuc bâtikiecn̄ewec: “Sâcne, no gore dân i ñicwofuñ âzâcnepemu.”

¹⁹ Eme Batiseba e Adonaire dân i ñicwofuñ Salomo mufuacneocte ere ficko fewec. Feme ñicwofuñ e fahare ere man̄fun̄ko rahuc fodapecnerâ risie eri ñeñe-ticnao mocwâc waha ñewec. Eme ñicwofuñ nengoc-ticnere ñeñe moc bâfuarâ mefârenaopec hecn̄epie waha ñewec. ²⁰ Ehuc zĩñuc muwec: “No wiac piticnere mocjaha mac numu-garepe dân̄nane mi qikin̄nezemec.” Eme ñicwofuñzi dân zĩñuc bâtikiecn̄ewec: “Nengoc-nane, go dân̄ge mutec manape, erâ wemocko qikin̄nepemu.” ²¹ In̄uc mume muwec: “Sunami ñokac zâñene Abisaga e hahacge Adoniare ñonâñ eocte sâcne râcnezo me mâcne?” ²² Eme ñicwofuñ Salomo e nengoc-ticne dân zĩñuc bâtikiecn̄ewec: “Go Sunami ñokac Abisagazi Adoniare biñe eocte numu-narekic, in̄uc jaha ñicwofuñ gie i erea eocte numu-narenzan̄ me! E hâcne hahac-nane jukac, erâ taha bapa Abiata â Zerujare ñokâ Joabe jahe wâc erao qohotakopirec.” ²³ Ñicwofuñ Salomo e dân in̄uc murâ Wofun̄te maio mupañkehuc kecziñuc muwec: “Anutuzi baficnuhame Adoniazi dân muwec irec okacne qape hâmozejec. ²⁴ Anutuzi basanañnuhuc mamac-nane Dawidire eri ñeñeo râecnurâ mupañkewec irec sâc uucman̄ moc bâfua-narewec ere maio musanañkekopac hâcne: Adonia e miñecgac jaha hâmozejec.” ²⁵ In̄uc murâ

ŋicwofuŋ Salomozi Jojadare ŋokâ Benaja soreme eki rarâ Adonia qâhâmowec.

²⁶ Eme ŋicwofuŋ e taha bapa Abiata zĩŋuc âzâcnewec: “Ajoc, go Anatoti hae mârenko gie-gange fokac ira rac. Manakic, go hâmocte biŋe enzan. Eme sifu miŋecgac mi qâhâmocgupemu. Go mârâc jaha mamac-nane Dawidire maio Wofuŋ Anuture katapa renkemen, erâ zârâ hâriŋ faio juhame ehec mâmâc jumen irec erâ akicgukopac.” ²⁷ Salomozi iŋuc muhuc Abiata jâpeme Wofuŋte taha bapa ŋic mocwâc mi juwec. Ehame Wofuŋzi mârâc Silo haeo Elire kikefuŋfâc janere findanđan muwec i denkwec hâcne.

²⁸ Eme Joabe e mârâc jaha Abisalomtao ine mi qohotaweczi irec biŋe mana-fârerâ Adoniarao qohotawecte hâwickeme gasackehuc Wofuŋte qoruc bozeo razirâ alata zuŋenao menez hehawickewec. ²⁹ Eme ŋic jaje, “Joabezi wis-erâ Wofuŋte qoruc bozeo razirâ alata heririŋnao domakac,” iŋuc muhuc ŋicwofuŋ Salomo mu-fuacnemie Jojadare ŋokâ Benaja sorehuc zĩŋuc âzâcnewec: “Ajoc, go rarâ qâhâmoc!” ³⁰ Eme Benajazi Wofuŋte qoruc bozeo fisirâ Joabe zĩŋuc âzâcnewec: “Go wahacmurâ ŋicwofuŋzi mume gazakopac!” Eme muwec: “Mâcne, no zira hâmopemu.” Iŋuc mume Benaja e risierâ Joabezi dân muwec irec binan i ŋicwofuŋ bacne-fârewec. ³¹ Eme ŋicwofuŋzi zĩŋuc âzâcnewec: “E gazajec sâc iŋuc qâhâmorâ duckec! E fuŋne tâmiricko soc kosa honkwec irec kin no â mamac-nanere garikinâc nâŋeraonec bârâriec. ³² E mamac-nane Dawidizi mi manahame ŋic jajahec e ja-

haene sâc jâuruhuc tinje â pectâc jupic jahe zikazi qâhâmoc-jofawec, moc Nerare nokâ Abene, Israere momori guru janjere micne, â moc ine Judare momori guru janjere micne Jetera nokâ Amasa. Jahe kosa jofahuc kinj hurewecte okacne fisicnezejec. ³³ Njic jahere socte kinji Joabe e jahacne â qâricfâc-ticne janjerao fohuc juzejec; Dawidi â qâricfâc-ticne erâ garikinjâcne janjerao â eri nejje-ticnao ine Wofunje wama fohuc juzejec sanaj.” ³⁴ Eme Jojadare nokâ Benaja e rarâ Joabe qâhâmome ficticne mârenj burocnao newec ira duckembinj. ³⁵ Eme njicwofunji Jojadare nokâ Benaja e Joabere tuc qarâ momori janjere micne juocte âkendânnewec, â taha bapa Zadokozi Abiata âkehockeocce mucnewec.

³⁶ Eme irec faicnao njicwofunji Simeiz hefârerâ zinjuc âzâcnewec: “Go Jerusalem hae zira fic moc barâ ira nejje juju ehuc ira me ira mi rajâmbânkezemec. ³⁷ Go zoanj mocko hae beherâ Kidoroj opâ fotâcnerâ hae mocko racmuo ine hâmo-jâmbânkecmu, i manapankezemec. Bahacgere erâ hâmo-jâmbânkecmu hâcne.” ³⁸ Eme Simeizi njicwofunj dânj zinjuc bâtikiecnnewec: “Go dânj mukomec i manape sâckekac. Erâ njicwofun-nane, go kinjanjicge no dânj nazakomec irec sâc epemu.” Eme Simeizi Jerusalem haeo damenj zora jufewec.

³⁹ Jufeme jara 3 tarahame Simeire kinjanj motec jahec jahe wisecnerâ Makare nokâ Akisi, Gati haere njicwofunj erao rapic. Ehamen njic janje Simeiz zinjuc âzâcnembinj: “Manakic, motec jahecge Gati haeo jukopirec.” ⁴⁰ Simeiz e injuc manarâ

donji-ticne sate râecnerrâ kiñan motec jahec-ticne basac-jofaocte Akisirao Gati haec rawec. Raku bâfuac-jofarâ irecnec bârisiec-jofawec. ⁴¹ Eme Simeï e Jerusalem haecne Gati haec rarâ risiewec irec biñe i Salomo mufuacnembiñ. ⁴² Eme ñicwofuñzi kiñan sorec-jopame Simeï ecnepie fisime ziñuc âzâcnewec: “No Wofun̄te maio mupan̄kehuc un̄dân ziñuc gazapo: ‘Go zoan̄ mocko hae zi beherâ ira me ira racmuo ine hâmo-jâmbân̄kecmu, i manapan̄kezemec.’ In̄uc mupe go dâñ ziñuc bârisie-naremeñ: ‘Go dâñ mukomec i manape sâckekac, no reñkepemu.’” ⁴³ Eme go wemocte Wofun̄te maio dâñ mupan̄kemeñ i mi son̄an̄kehuc sâcmutâc dâñnane huckemeñ?” ⁴⁴ Ñicwofuñzi in̄uc muhuc Simeï ziñuc âzâcnewec: “Go mamac-nane Dawidi wiac hehesicne fun̄ne fun̄ne ecnemeñ i gahac mana-fârekic, eme zi ine Wofun̄zi hehesicgere okacne bazu-gareocmu. ⁴⁵ Ñicwofuñ Salomo norao ine Wofun̄te jambun̄ fozejec â Dawidire eri ñeñe i Wofun̄te maio ñehuc juzejec sanan̄.” ⁴⁶ Ñicwofuñzi in̄uc murâ Jojadare ñokâ Benaja mucneme rarâ Simeï qâhâmowec. Eme Salomozi ñicwofuñ gie baha uucman̄-ticnezi soka sanan̄ ewec.

3

Salomozi Farao otâ-ticne rowec

¹ Eme Salomo e Aigita ñicwofuñ Farao ehac kikimo ehuc otâ-ticne rowec. Erâ Dawidire haec jowa fisirâ e jahacne fic erâ Wofun̄te ufun̄ â qânâsac hae râreckehuc baku batarawec. ² Jowa fisiwec damen̄ ira Wofun̄te zân̄gere fic biac mi

bambinŋe ñic ñokac jaŋe furu mâreŋko taha bâzi rike jumbienŋ.

Salomozi manqârâŋte numuwec
(Bin II 1:1–13)

³ Salomore manzi Wofunŋtao domaha mamac-ticne Dawidizi dân mutâcnecnewec sâc wiac ebac ewec; mâc furu mâreŋko taha bâzi â hosâc âsu bianŋ ririke i zuhuckerâ ewec wâc. ⁴ Eme ñicwofunŋzi taha bâzi rikeocte Gibeonŋ hao rarâ qowi bâzi 1 tausenŋ rikewec. Ira bâzi ririkere furu mâreŋ kâcŋene sâko fowec hâcne. ⁵ Eme Wofunŋzi Gibeonŋ hao Salomo gunŋko fuacnehuc zinŋuc âzâcnewec: “No wemo wiac tahacgupemurâ egarekac i nazatec manape!” ⁶ Eme Salomozi dân zinŋuc âzâcnewec: “Go kinŋanŋicge mamac-nane Dawidi manjaunŋ sâko ecnehuc juhanŋtec gorao qohotahuc tinŋe â pectâc juhuc wiac ebac ewec. Inŋuc eme zuhuckerâ manjaunŋ sâko jaha ecnehuc ñokâ moc tahackemenŋ eki damenŋ zi eri ñeŋe-ticnao ñehuc jukac. ⁷ O Wofunŋ Anutunane, zi ine kinŋanŋicge no enaretec mamac-nane Dawidire tuc qarâ ñicwofunŋ jukopac. Erâ no motec qâri juhuc ñicwofunŋ giere funŋe biac mi mana tarakopac. ⁸ Erâ kinŋanŋicge no mac zi ñicfâcge bâwosâec-jopamenŋ jaŋere ñondenŋko domakopac. Jaŋe ñic ñokac guru sâko zare-jeŋic fejâmbânŋekacte ñic moczi sâcne mi wosec-jopaocmu. ⁹ Irec go kinŋanŋicge nore maŋ ma-manasu bâsokatec bianŋe â sâqocnere funŋe hone tarahuc ñicfâcge jaŋere dân sâcne mutarazepac. Ñicfâcge jaŋe guru sâko irec mozi dânŋenŋic mutaramesâcneocmu?”

¹⁰ Salomozi wiac inucnere Wofuñ numucneme maname biankewec. ¹¹ Irec dân zĩuc bătikiēcnewec: “Go mamana bian rohuc mumutara gie fârĩne bacmurâ numu-narehuc juju zoricne jufecmurâ me moneñ mafa sâko rauckecmurâ me răsifâcge jañe hâmo sipiric eniñmurâ mi numu-naremec. ¹² Manakic, irec erâ nunumugere sâcko egarehuc mañqârâñ â mamana sâko bâuua-garepe izi ñic mârâc jumbiñ â zâhec jufeniñmu jañere mamana sirickecmu. ¹³ Eme wiac gâcnere mi numu-naremec i wâc zuhuckerâ garepemu, moneñ mafa sâko mecne erâ zâñe biñe sâko mâmâc. Irec gore damenjo ñicwofuñ gâcne juniñmu jañe gore sâc mi bâuuanzepiñ. ¹⁴ Go nore hatao juhuc dânsanaj â sâcmutâc dânñane mamacge Dawidizi ewec irec sâc ehuc renkecmuo ine ranqa ranqa jambunghuc jupemu.”

¹⁵ Eme Salomozi qârerâ zĩuc mana tarawec: Â, zi guñ manakopac. Inuc muhuc Jerusalem haeo ferâ Wofuñte zâzâfic katapa irec mañfuñko domahuc qowi bâzi â wama bâzi wiac rikerâ fekicnefâc-ticne tiwa bâzi ejarewec.

Salomo e mañqârâñhec juhuc mumutara gie bianñe bawec

¹⁶ Eme damen ira sasec ñokac jajahec jahe ñicwofuñ dân âzâcnenicte erao rapic. ¹⁷ Erâ ñokac moczi zĩuc âzâcnewec: “O bombon-nane, go dân gazape manac: No â ñokac keczi nâhe fic mocjahao ñec foc eekoperec. Eme nâhe ira ñehuc no motec moc ropo. ¹⁸ Ehame zoañ gie bapa 3 tarama ñokac keczi e motec moc rowec

wâc. Nâhe fic ira bucjâmbân-nâhec jupec, ŋic me ŋokac moczi nâhehec moc mi jujâmbânkembij. ¹⁹ Eme ŋokac keczi e ŋafeo guŋ fohuc motec-ticne fohâmowec. ²⁰ Erâ ŋafe zâŋijko faharerâ kiŋaŋ naruge no guŋ fohape nore motec nowac rorâ bumaŋ-ticnao râewec â e jahacne motec hâmocne ine norao râewec. ²¹ Eme hae fureme motec-nane moŋ gumezore faharehuc honepe motec e hâmocne fowec. Ehame hae fure taniŋkeme hone-hâmorâ ziŋuc mana tarapo: Motec keci e moc e noni mi ropo.” ²² Iŋuc mume ŋokac âgo-ticnezi muwec: “I burec, motec qâricne jukac e nore, gore motec ine hâmojec.” Mume âgonezi muwec: “Burec, nore motec e qâricne, â gore ine hâmojec.” Iŋuc muhuc ŋicwofuŋte maio mu qaqatarac epic.

²³ Iŋuc epire ŋicwofuŋzi dâŋ ziŋuc muhuc ja-sawec: “Moczi ziŋuc mukac: ‘Motec qâricne zi nore, â hâmocne i gore,’ â moczi ziŋuc mukac: ‘Aricne, hâmocne i gore, â qâricne i nore.’” ²⁴ Erâ ŋicwofuŋzi zuhuckerâ muwec: “Ajoc, sâqe sâko moc baware-narenij!” Eme sâqe moc râcnembij. ²⁵ Eme ŋicwofuŋzi muwec: “Ajoc, ŋoŋe motec qâricne e zâzâŋij jaha qâfâuckerâ dâkâne ŋifec i ŋokac moc râcnehuc dâkâne ŋifec i âgo-ticne râcnenij.” ²⁶ Iŋuc mume motec qâricnere nenjoc e motec-ticnere busâqoc fekie manahuc ŋicwofuŋ ziŋuc âzâcnewec: “Bombon-nane iŋuc misac, sifu motec qâricne e râcnenij, qapie mi hâmooc!” Eme âgonezi ine ziŋuc muwec: “Eki me noni mi rauckezeperec irec qâfâuckenij!” ²⁷ Eme ŋicwofuŋzi muwec: “Motec

qâricne mi qâhâmoniŃ, Ńokac bâbâni dân mu-
jêc e râcneniŃ, eki hâcne neŃgoc roro-ticne
ekac.” ²⁸ Eme Israe kikefun jaŃe Ńicwofunzi
dân weniŃuc erâ mutarawec irec biŃe manarâ
ere hâwic-jopawec. JaŃe ziŃuc honembiŃ: Anu-
tuzi maŃqârâŃ tahackewecte mumutara gie sâcne
baocmu.

4

Salomo fekicnefâc-ticne jaŃere zâŃe biri

¹ Ńicwofun Salomo e Israe kikefun sasawa
guriŃ bajarewec. ² Ehame Ńic kecziŃuc jaŃe
micnefâc-ticne jumbiŃ: Zadokore Ńokâ Azaria e
taha bapa juwec. ³ Sisare Ńokâ jahec Elihore
â Ahia jahe qâqâreŃ Ńic jupic, eme Ahiludure
Ńokâ Josafata eki dân mumuŃic fekicne juwec.
⁴ Jojadare Ńokâ Benaja e momori jaŃere micne
juwec erâ Zadoko â Abiata jahe taha bapa jupic.
⁵ Eme NataŃte Ńokâ Azaria e mâreŃ dâkâne irec
micne bapa jumbiŃ jaŃe qizec-joparâ juwec. Eme
NataŃte Ńokâ moc zâŃene Zabudu e ŃicwofunŃe
âgo juwec. ⁶ Ahisa e ŃicwofunŃe ficko wiac fowec
i soŃaŃke jujec, â Abedare Ńokâ Adoniram eki ine
Ńic jabane jaŃe kiŃaŃ gie bahuc jumbiŃ jaŃere
soŃaŃ juwec.

⁷ MâreŃ dâkâne dâkâne irec micne bapa 12 jaŃe
Israe mâreŃ sâcke-fârerâ Salomo kiŃaŃ qacne-
huc jumbiŃ. JaŃe Ńicwofun â wiacfâcne nânâ
wiac bâfua-jare jumbien, micne bapa moczi mosa
mocte biŃe â moczi mosa mocte bâfua jujec,
iŃuczi iŃuc ejumbien. ⁸ JaŃere zâŃe biri ziŃuc:
Moc BeŃ-Hure, Eferaim tiki mâreŃko juwec.

⁹ Moc Beñ-Deke, e Makazi, Salabim, Bete-Semesi, Elon â Bete-Hanañ hae soñañ-jopawec. ¹⁰ Moc Beñ-Hesede, e Aruboti haeo juhuc Soko hae â Hefere mârenj māmâc soñañ-jopawec. ¹¹ Moc Beñ-Abinada, e Salomore otâ Tafati roweczi Doro hae mârenj soñañke-fârewec. ¹² Moc Ahiludure ñokâ Bana ere hae mârenj zinjuc: Tanaki â Megido erâ Bete-Seañ sasawa. I Zaretan hae heririnñao Jesere juwicnaopec forawec. Hae mârenj-ticne i Bete-Seañnec raku Abe-Mehola haeo, Jokemeam hae ocninjucnao fisiwec hâcne. ¹³ Moc Beñ-Gebe, e Ramoti haeo Gileade mârenjko juwec. Ehuc Manasere ñokâ Jairi ere haefâc Gileade mârenjko ñerambinj â Arigoba hae mârenj Basañ mârenjko forawec i māmâc soñañ-jopawec. I hae 60 jañe sacsanañ â aenji motâc babasanañ-jenjichec. ¹⁴ Moc ine Idore ñokâ Ahinada e Mahanaim haeo juwec. ¹⁵ Moc Ahimazi, e Naftali mârenj soñañkewec. Ñokac-ticne Salomore otâ moc zâjene Basemata. ¹⁶ Moc Husaire ñokâ Bana, e Ase â Aloti mârenj i jahere soñañ juwec. ¹⁷ Moc Paruare ñokâ Josafata, e Isasa mârenjko juwec. ¹⁸ Moc Elare ñokâ Simeï, e Benjaminj mârenj soñañkewec. ¹⁹ Erâ moc ine Urire ñokâ Gebe, eki Gileade mârenjko juhuc Amori ñicwofun Sihonj â Basañ mârenjte ñicwofunj Ogo jahere mârenj fowec i soñañkewec. Ehame micne bapa moczi micne bapa keci jañe qâhâc-jopa-fârewec.

²⁰ Eme Juda â Israe kikefun jañe fua sawec eku hâwecmecko mongenj forakac irec sâc embinj. Jañe nânâ opâ moc mi basahuc bubianj faio jumbinj hâcne.

Salomo e maŋqârâŋhec erâ eri qarawen sâkohec juwec

²¹ Eme Salomozi uucmaŋ gurune gurune Eufрата opâonec fuŋkerâ raku Filisa mârenko fisirâ Aigita mârente mao hu tarawec, i jaŋe soŋaŋ-jopahuc juwec. Eme jaŋe juwec sâc sahaс taha wiac râcnehuc kiŋaŋ qacnehuc jumbiŋ. ²² Zoaŋne zoaŋne Salomo nânâ wiac ziŋuc bafisicnembini: Poroŋ uucne qaŋqaŋ târu 30, erâ poroŋ uucne gâgâpâс târu 60, ²³ bulimakao wokemaŋ sâkohec 10 erâ bulimakao sapa sâkoonec 20, erâ lama 100. Erâ wâс kâte qowi gâcne nânâne â qâqâс wiac wokemaŋ sâkohec mâmâс. ²⁴ E Eufрата opâ ziŋucpec Tifisa haeonec fuŋkerâ raku Gaza haeo tarakac mârenŋ ŋondenŋ ira ŋicwofuŋ jurambiŋ jaŋe soŋaŋ-jopa-fârewec. Ehame ŋifec â ŋifec jumbiŋ jaŋerao wâс wama sâko fowec. ²⁵ Ehame Juda â Israe kikefuŋ jaŋe Salomozi juwec sâс Daŋ mârenŋkonec huraku Bere-Seba haeo tarawec ŋondenŋ ira mana mezac tâmiric juhuc waiŋ gie â jâmbo jufu wiac-jeŋic soŋaŋkehuc jumbiŋ. ²⁶ Eme Salomo e keretac fâfâre becâсic 40 tausenŋ domac-nembini erâ becâсicko rara momori ŋic 12 tausenŋ jucnembini. ²⁷ Eme ŋicwofuŋ Salomo â ŋic ehec juhuc nânâ nâjumbienŋ jaŋere nânâ i micne bapa mucjopakicne jaŋe ru sâс moczi mosa mocte â moczi mosa mocte nânâ iŋuc bâfuapie wiac moc mi basa-jâmbânkembini. ²⁸ Eme gie mujarekicne sâс becâсic jaŋere nânâ wiac i jumbiŋkoa bafisi-jare jumbienŋ.

²⁹ Eme Anutuzi Salomo mamana sâko â maŋqârân bâfuacnehuc maŋticne bâsokame

mamana-ticnezi zâkân qârân injucne ewec. ³⁰ Eme Salomore manqârânzi zoan wewefunaopoc ñic jumbin janere manqârân me Aigita ñic janere manqârân i mâmac siricke- fârewec. ³¹ Ere mamanazi ñic gâcne janere mamana jâuru-fârewec. Ezarai ñic zâjene Etañ ere mamana mecne, Maholare ñokâfâc Hemañ, Kalokolo â Daroda janere mamana mecne i mâmac jâuruwecte zâje biñe-ticnezi ñicne ñicne rârec rârec jurambin janerao hañ bafârewec. ³² E muqâqin dân 3 tausen mufuarâ gae hefuakume 1 tausen 5 injuc ewec. ³³ E wiac fuñne fuñne janere dân mufuawec. Jâc janere dân i jâmâzâc Lebanon tikio doma rakac irecnec fuñkerâ mu wahaku kuen kuen jâcko fuaekac erao mutarawec. E qowi kâcqene janere dân, wipe janere dân, erâ wiac foforâ juengopien â opâ qowi janere dân i mufârewec. ³⁴ Mâren sâc ñicne ñicne â ñicwofuñ jurambin jañe Salomo manqârân-ticnere biñe manambinñe irec fuñne mananiñte erao fisimbin.

5

Salomo â Hiram jahe giere babafic epic (Bin II 2:1–18)

¹ Israe ñic jañe Salomo mamac- ticnere tuc qaocte ñicwofuñ âkendânñembin irec biñe i Tiro ñicwofuñ Hiramzi manawec. E manticnezi damen sâc Dawidirao domawec. Irec kinanñicfâc-ticne gâcne jañe Salomoraosorec-jopame rambin. ² Eme Salomozi okacne dân zinuc bâtikiecnec ñic gâcne Hiramtaosorec-

jopawec wâc: ³ “Go mamac-nane Dawidire funje manakomec. E Wofuñ Anutu-ticnere biñe fic moc baocte mañkewec. Mâc rârec rârec zikazi zika forawecte fic i baocte quñkewec. Zâhec ine Wofuñzi râsifâc-ticne bawahac-jopaocte manacnewec. ⁴ Eme damenji zi Wofuñ Anutunanezi rârec rârec wama sâko bâfua-nareme râsifâc-nane mi juñgopienj â aka wâc mi fokac. ⁵ Erâ manakic, Wofuñzi mamac-nane Dawidi zijuñc âzâcnewec: ‘No gore âkehoc ñokâge eri ñeñegao râepe ñeocmu eki zâñe-nanere fic moc baocmu,’ dânj irec sâcko no Wofuñ Anutunanere biñe fic moc bazo mukopac. ⁶ Irec go mutec ñicfâcge jañe Lebanonj tikio jâmâzâc nore biñe qafarapie kinanñicfâc-nane jañe bafic-jopanjepienj; eme no kinanñicfâcge jañere gie furi i goki mutec sâc râe-garezepac. Go gahac wâc manakic, Sidonjic jañe jâc qaqaifarare funje mana-hâmoenñgopienj, nânjere ñicfâc jañe ine mi manaenñgopienj.”

⁷ Eme Hiram e Salomore dânj i manarâ bubianj sâko manahuc dânj zijuñc muwec: “Zoanji zi Wofuñ mumbiankezo! Eki hâcne Dawidi ñokâ moc mamanahec tahackewecte ñic ñokac guru sâko sâcne sonan-jopaocmu.” ⁸ Injuñc murâ Hiramzi Salomo dânj okacne zijuñc bâtikiecnnewec: “Go dânj râe-nareme i manapac. Go jâmâzâc â wetejâc irec dânj nazamec i egarekac sâc epemu. ⁹ Ñicfâc-nane jañe jâc i Lebanonj tikionec bawaharâ hâwecmecko râenijnmu. Eme mupe jâcombânjne qâturepie zae fuame hâwecko bahuku hae mutâcnecmu

ira râeniŋmu. Eme hetâtiepie goki ine okacne narehuc no â wiacfâc-nane nâŋe nânâ wiac bâfua-nârezemec.” ¹⁰ Eme Hiram e Salomozi muwec irec sâcko jâmâzâc â wetejâc râecnehuc juwec. ¹¹ Eme Salomo e Hiram okacne bazucnehuc wiacfâc-ticne jaŋere manasuhuc padi târu 20 tausen â oliwa qanzaŋnekicne irec pake 20 tausen jaha râcnewec. Jara sâc iŋuc râcnehuc juwec. ¹² Ehame Wofuŋzi Salomo mupaŋkecnewec sâc maŋqârâŋ bâfuacnewec; eme Hiram â Salomo jahere ŋondenko wama fowecte zâzâfic moc epic.

¹³ Eme ŋicwofuŋ Salomozi Israe kikefuŋ jaŋeraonec ŋic 30 tausen kiŋaŋ qaqa gie baniŋte bâwosâec-jopawec. ¹⁴ Erâ mosa sâc ŋic 10 tausen Lebanon tiki mârenko sorec-jopame rajumbien. Jaŋe ira mosa wâŋ juku risierâ mosa 2 haejenjicko jujumbien. Ehame Adoniramzi soŋaŋ-jopahuc juwec. ¹⁵ Eme ŋic 70 tausen jaŋe Salomore mafa wiac hâpo jumbien, â ŋic 80 tausen jaŋe ine tikio qânâ qâfâucke jumbien. ¹⁶ Erâ i sawa mâcne, jaŋerao ŋic micne 3 tausen 300 zuhuckerâ jumbien. Jaŋe gie qizeckehuc ŋic gie bahapie hone soŋaŋ ejare jumbien. ¹⁷ Eme ŋicwofuŋzi giedâŋ mujareme sâc fecte hobeten râezore qânâ kâcqene â furi sâko he bâfâuc ehuc ropie warewec. ¹⁸ Ehame Salomo â Hiram jahere fic bapa ŋic â Gebali ŋic jaŋe fic bazore qânâ wiac mecne â jâc wiac mecne i he fasaec ehuc ba akic efârembiŋ hâcne.

*Salomozi Wofunṭe taha ufunṭe bawec
(Bin II 3:1–14)*

¹ Israe ṇic jaṇe Aigita marenṅkonec waharâ juwefukupie jara 480 eha Salomozi Israe ṇic jaṇerao ṇicwofuŋ gie bahuc juhame jara 3 â mosa 2 ewec, mosa zâṇene 3iwi, damenṭ ira hâcne Salomozi funṅerâ Wofunṭe ufunṭe bawec.

² Ŋicwofuŋ Salomozi Wofunṭe ufunṭe bawec irec sâc ziṇuc: 3oricne-ticnere sâc kubi 60, otecne-ticnere sâc kubi 20, hânṭ bafekicne ine kubi 30 irec sâc.* ³ Eme fic fârinao hae gâṅgânṭ moc bawec irec otecne sâc kubi 20, â fic mainao zuhuckewec irec sâc kubi 10.

⁴ Eme râreckehuc qâqâtâc katanṭ râewec, râpenao bâpitiwawec â maṇṇao ine bâsokawec. ⁵ Erâ fic fârine â furufic i orânṅkehuc fic zuhucne barâ maṇṇe maṇṇe âke tâcne rawec. ⁶ Fic zuhucne i feṅgaṇṇe 3. Juwic otec-ticnere sâc kubi 5, zâzâṇiṅko 6 â feṅgaṇṇe faicpec irec otecne sâc kubi 7. Fic sâpenao feṅgaṇṇe feṅgaṇṇe razi fowec ira jâc otecne mâc iticnehuc râe rakicne.

⁷ Eme taha ufunṭe bambiṅko mâsi ziṇuc fuawec: Qânâ wiac i qanaṇṭ ba akic efârekicnere ufunṭe bahapie hama me râric me aenṭ wiacte fânânṭ moc mi fuawec.

⁸ Ficzuhuc juwicnere motâc i fic fâreopec domawec, eme irecnec riri oorânṭ râreckehuc baticne i feṅgaṇṇe zâzâṇiṅko fewec, eme irecnec riri moczi feṅgaṇṇe faicpec fewec. ⁹ Salomo e iṇuc ehuc fic baku bafârerâ fic tapane ine jâmâzâc jâczi bawec. ¹⁰ Erâ e fic orânṅkehuc zuzuhucne

* **6:2:** 1 kubi i sâcmeta moc 18 inses me 46 senti meta irec sâc.

bafârewec wâc, feŋgaŋne moc i hânne-ticne kubi 5, erâ fic i jâmâzâc â wetejâczi basanaŋkewec.

¹¹ Eme Wofunŋte dân Salomoraŋo kecziŋuc fuawec: ¹² “Nŋŋe dânŋanaŋ-nane bâninipehuc mumutâc â sâcmutâc dânŋane mana reren erâ hata mutâcne-ŋarepo sâc wiac ebac efâreniŋmuo ine no go â mamacge Dawidi findaŋdân ŋasapo i mupe fârio qaocmu. ¹³ Ehame no Israe ŋicfâc-nane ŋŋere ŋondenko juhuc moc mi beheç-ŋopapemu.”

¹⁴ Eme Salomo e Wofunŋte fic baku bâzickewec. ¹⁵ Eme qâriŋkonec fuŋkerâ feku faic tapanao fisiwec fic sâpene i jâmâzâc paraŋzi foŋke-fârerâ qâriŋne i wete paraŋzi bârârâŋnewec. ¹⁶ Eme ficmaŋne râpenaopec ira jâmâzâc paraŋzi ficmaŋne moc âke tâcnewec, i sâcticne kubi 20. Paraŋticne i qâriŋkonec feku fic tapanao iticnewec. Ficmaŋne izi furu dindiŋ hâcne. ¹⁷ Eme ficmaŋne irecnec ficmaŋne fârine zuhuckerâ rawec i sâcticne kubi 40. ¹⁸ Ficmaŋne i jâmâzâc paraŋzi foŋke-fârekicnere qânâ hohonene moc mi ewec. Eme jâczi hândân qarâ fâuckeme âri fuaekac irec sâc hawari paraŋko metâ barakicne. ¹⁹ Eme Wofunŋte zâzâfic katapa irec ŋeŋe hae fuaocce ficmaŋne râpenaopec furu dindiŋ irec maŋne âke tâcnewec hâcne. ²⁰ Ficmaŋne irec zorice â otecne kubi 20, â hânne kubi 20 jaha. Eme irec paraŋ i gol findowakicnezi foŋke-fârewec erâ ficmaŋne irec motâc fuŋnao ira jâmâzâc jâczi alata moc barâ râewec. ²¹ Erâ Salomo e ficmaŋne i gol findowakicnezi foŋke-fârerâ furu dindiŋ irec mainao kâpâcwâru moc golzi bakicne i fârewec.

²² Ine hâcne ficmañne sasawa i golzi fonkeku fonke-fârewec. Erâ alata furu dindin̄te motâc fun̄nao ñewec i golzia wâc fonkewec.

²³ Eme furu dindin̄te bin̄e kerubim jajahec jahere hawari i oliwa jâczi bacjofawec. Zoricne-jekicte sâc i kubi 10. ²⁴ Eme kerubim mocte fakec ñifec â ñifec i kubi 5. Irec fakec jajahec jahere sâc i kubi 10 ewec. ²⁵ Eme kerubim moc ere sâc i kubi 10 jaha. Kerubim jajahec jahere sâc â hawari mocjaha. ²⁶ Â zoricne-jekicte sâc i wâc mocjaha, kubi 10. ²⁷ Kerubim jajahec i furu dindin̄ zâzân̄in̄nao râec-jofame domapic. Eme kerubim jahere fakec qaratierâ domapic irec mocte fakec ñifeczi ficsâpe ñifecne âke uawec â mocte fakec ñifeczi sâpe ñifecne âke uawec wâc. Â fafakec jahec-jekiczi zâzân̄in̄ko bâbâfuac epic. ²⁸ Eme kerubim jahec i golzi fonjofawec wâc.

²⁹ Eme Salomozi mume metâ bapa jañe fic sâpene sasawa i kerubim â hâmujañ erâ âri wiac irec hawari bapie sâcke-fârewec, i furu dindin̄ ira mecne â furufic ira wâc mâmâc. ³⁰ Erâ mume furu dindin̄ â furufic irec qârin̄ i golzi fonke-fârembin̄.

³¹ Furu dindin̄te motâc i mume oliwa jâczi bambin̄. Katan̄-ticne jajahec â wâtun̄ wiac-ticne i ba akic epie tikine 5 ewec. ³² Ine hâcne, motâc katan̄ jajahec i oliwa jâczi bakicne, eme jahere faio ine kerubim â hâmujañ erâ âri wiac irec hawari metâ barâ golzi fonke-fârembin̄.

³³ Eme mume tiri ufun̄te motâc irec wâtun̄ i oliwa jâczia bambin̄ wâc, wâtun̄ irec tikine 4.

³⁴ Â motâc katan̄ jahec-ticne i mume wete paran̄zi

bambiŋ, eme katan moc e ki otec-ticne jajahec â katan moc e iŋuc jaha bambiŋ. ³⁵ Erâ mume kerubim â hâmuĵâc erâ âri wiac irec hawari metâ bapie hawarine fuawec sâc golzi fonke-fârembiŋ. ³⁶ Eme ufuŋ râreckerâ hae zoŋa piticne fowec i qânâ he akic ekicne feŋgaŋne 3 â jâmâzâc jâc feŋgaŋne wân iŋuc râerâ bambiŋ.

³⁷ Salomozi ŋicwofuŋ jume jara 4 irec mosa zâŋene 3iwi ira Wofuŋte ufuŋ fuŋkerâ bambiŋ.

³⁸ Eme juhame jara 11 irec mosa 8 zâŋene Bulu wahaha ufuŋ â wiac-ticne sâcmutâc fowec irec sâc râe tara-fârerâ bâzickembiŋ. Jara 7 baku batarambiŋ hâcne.

7

Salomozi ficwiac ġâcne bawec

¹ Eme Salomozi jara 13 e jahacne ficwiac baku bafârewec.

² Fic moc bawec zâŋene Lebanon Kâtefic. Sâcticne ziŋuc: 3oricne-ticne kubi 100, otecne-ticne kubi 50 â hâŋne-ticne kubi 30. Fic ira wâtun ŋicne birine 3 doma rawec, eme wâtun utunao jâmâzâc jâczi bacotec râe rambiŋ. ³ Eme bacotec irec fainao jâmâzâc katapazi tapane bambiŋ â bacotec jaŋe wâtun biri 3 irec utunao fombiŋ. Wâtun irec zare 45. Biri sâc 15, 15 iŋuc doma rambiŋ. ⁴ Eme qâqâtâc katan i biri 3 râe rakicne, eme qâqâtâc katan biri 3 i jaŋe ŋifec jaŋehed aŋa sâsâc bafârekicne. ⁵ Motâc â qâqâtâc katan jaŋe sasawa tuturuŋ-jeŋic 4, 4; eme katan biri 3 i ŋifec jaŋehed aŋac sâsâc bafârekicne.

⁶ Eme ficzora moc bawec. Ira wâtunŋ ɲicne biricke rakicne. Fic i zorice-ticne 50 kubi â otecne-ticne 30 kubi. Erâ irec mainao fic moc zuhuckewec, i wâtunŋ biri â ririnehec.

⁷ Erâ fic moc bawec zâɲene Mumutara Giere Fic. Ira eri ɲeɲe-ticne ɲewecte ɲehuc mumutara gie bajujec. Eme fic irec sâpe i qâriɲkonec funkerâ feku tapanao fisiwecko jâmâzâc katapazi fonke-fârekicne.

⁸ Eme fic irec râpenao hae zɔɲa moc fowec ira e jahacne fic bawec. Erâ fic moc zuhuckerâ bawec, i Faraore otâ, ɲonân-ticne hâcne ere biɲe. Fic jajahec i ficzora bawec irec sâc jaha bacjofawec.

⁹ Fic sasawa i qânâ kâcqenezi â furi sâkozi barakicne; qânâ i sâcmeda râehuc segezi bâtâcne fasaec ekicne. Gâcne i faio fefec hefepie sâpene ewec â gâcne Wofunŋte ufunŋ irecnec funkerâ birike rakupie hae zɔɲa kâcqenao fisiwec. ¹⁰ Ficte hobeterɲe i qânâ fârine â kâcqene râe rambiɲ, gâcne jaɲere sâc kubi 10, gâcne jaɲere kubi 8.

¹¹ Eme irec fainao qânâ kâcqene, sâcmeda râehuc he fasaec ekicne i râerâ jâmâzâc katapa mâmâc râembiɲ. ¹² Hae zɔɲa kâcqenao qânâ he fasaec ehuc qânâ biri jahec â moc â biri moc ine jâmâzâc paraɲ iɲuc râembiɲ; erâ Wofunŋte fic irec hae zɔɲa piticne â eri fic irec hae zɔɲa i sâc ijaha bakicne.

Huramzi taha ufunŋ maɲnao aenŋi metâ gie bawec

(Bin II 2:13–14; 3:15—5:1)

¹³ Eme ɲicwofunŋ Salomozi kiɲaɲ sorec-jopame ra ɲic moc zâɲene Huram, Tiro haeonec, e jowa warembiɲ. ¹⁴ ɲic e Naftali guruonec hozec

moc ere ŋokâ. Mamac-ticne ine Tironjic, e aen bâbâronzi wiac bapa ŋic juwec. Ehame Huram e wâc inuc jaha aen bâbâronzi gie i me i baocte moc mi qunkehuc mamana sarichec jujâmbânkewec. Eki hâcne ŋicwofuŋ Salomo erao fisirâ gie-ticne bacne-fârewec.

¹⁵ E aen bâbâronzi wâtun ŋicne jajahec bacjofawec. Zoricne-jekicte sâc i kubi 18; eme oorân-jekicte sâc muc moc râepie orânkerâ kubi 12 irec sâc ewec. ¹⁶ Eme aen bâbâronzi wâtun utu jajahec bacjofarâ wâtun ŋicne jahere tofao zuhuc-jofawec. Utu jahec zoricne-jekicte sâc kubi 5 ewec. ¹⁷ Eme utu jahere faio eri wiac mizekicne râreckehuc râekicne, i kâpâcwâru mizekicne 7 irec hawari tinac bakicne. ¹⁸ Eme eri wiac irec fainao jâchândân hawari biri 2 râec-jofahuc rârec rârec râe rawec. ¹⁹ Eme wâtun ŋicne jahere tofao utu râec-jofakicne jahere faio faroqac hawari metâo râe-fârekicne. Jahere sâc ine kubi 4 ewec. ²⁰ Eme jâchândân hawari biri 2 wâtun utunere faio eri wiac mizekicne irec fainao rârec rârec râec-jofakicne irec maŋnao jâchândân 200 biricke rakicne, â wâtun mocte faio sâc ijaha bakicne. ²¹ Eme tiri ufuŋte ficzuhuc mamai ŋewec irec maŋfuŋko wâtun ŋicne jajahec âkendân-jofawec. Wâtun ŋicne fâreopec âkendânnerâ zâŋene Jakin muwec, erâ wâtun ŋicne qanaopec âkendânnerâ zâŋene Boasi muwec. ²² Eme wâtun utune jahere faio faroqac hawari metâ barâ râekicne. Janê inuc ehuc wâtun ŋicne jahere gie batarambiŋ.

²³ Eme aen bâbâron rike suenkerâ opâ râqâc sâko mako oorân moc bawec. Mecqanêŋe ŋifeckonec ŋifec fisiwec i kubi 10 irec sâc.

Hânne-ticnere sâc i kubi 5, â mucsâc orânkehuc fârepie kubi 30 ewec. ²⁴ Eme râqâc sâko mecqañeñne heririñnao metâ wiac hândân biri jajahec râreckehuc râekicne. Eme kubi moc mañnao hândân 10, 10 inuc sasawa. Eme irec sâc fuaocte qanañ afezi sâsâcne barâ râepie foha aen bâbâron rikerâ hesiepie hurâ fuawec. ²⁵ Eme râqâc sâko i bulimakao hawari 12 jañere faio râekicne. Jañeraonec jahec â moczi faic mârenkopec maick-erâ domambiñ, jahec â moczi zoañ huhunaopoc, jahec â moczi juwic mârenkopec â jahec â moczi zoañ wewefunaopoc. Eme sârec-jenicz i itic ehapie râqâc sâko i fai-jenicko newec. ²⁶ Eme râqâc sâko qâfoñne-ticne i metape mocte sâc, eme mecqañeñ-ticne i hapec mecqañeñ inucne â hawarine i faroqac âri inucne; mañnao opâ hurâ newec i pake 2 tausen irec sâc.

²⁷ Eme e aen bâbâronzi keretac wiac 10 bawec wâc. Jañere sâc zîñuc: Zoricne-jenicz kubi 4, otecne-jenicz kubi 4 jaha, â hânne-jenicz i kubi 3 irec sâc. ²⁸ Eme keretac jañe zîñuc bakicne: Keretac fârinere aen hânne otecne râerâ râreckehuc sâpene bambiñ. ²⁹ Eme sâpene ira laion, bulimakao â kerubim hawari metâ barâ râe rakicne, â aen hânne otecne faio sâc ijaha fowec, eme laion â bulimakao jañere faicpec â juwicpec ira hendiñ wiac metâ barakicne. ³⁰ Eme keretac sâc zafengân 4 fowec i aen bâbâronzi bakicne, eme otecne-jenicz i aen bâbâronzia bakicne. Eme mene ñeñehasic i tuturuñne sâc râekicne â opâ râqâc ihec zuzuhuc bakicne. ³¹ Eme keretac irec fainao râqâc ñeñe-ticne oorân bambiñ, i kubi 1 irec sâc

bapie hân fewec. Otecne-ticnere sâc i kubi 1 â nâfocne ewec. Eme ira metâ wiac barakicne. Eme keretac sâpene i tuturuŋne 4 oorân tâmiric fâfâsâc bakicne. ³² Eme zafengân jaŋe juwic qaŋeŋnao ñifec â ñifec ñembiŋ â otecne-jeŋic i keretackonec wâtun hân wahawec ihec basanaŋkekiecne. Eme zafengân sosoka-jeŋicte sâc i kubi 1 â nâfocne. ³³ Eme zafengân jaŋe keretac zafengân inucne; eme otecne-jeŋic â zafengânŋte hawec â zafengân maŋnao dope doma rawec â zafengânŋte oorânne i afezi sâc barâ aeŋ bâbâronŋ rike hesiec epie hurâ fua-fârewec. ³⁴ Eme mebapa 4 jaŋe keretac tuturuŋ sâc keretachec zuzuhuc bahuc râekicne. ³⁵ Eme keretac fainao ira wiac oorân moc bakicne, i kubi moc nâfocnere sâc fowec erâ wâtun â sâpenehec fowec. ³⁶ Erâ wâtun â sâpene ira sawane fowec sâc metâ bapazi kerubim, laion â hâmujaŋ hawari wiac bahuc hendiŋ hawari wiac mâmâc râewec. ³⁷ Keretac 10 jaŋe mutâcnekicne irec sâcko bawec hâcne. Jaŋe sasawa afezi sâcjeŋic barâ aeŋ bâbâronzi rike hesiec epie hurâ hawari-jeŋic â sâcjeŋic mocjaha jâmbân efârewec.

³⁸ Eme e aeŋ bâbâronzi kuzi sâko 10 bawec. Kuzi mocte sâc i opâ pake 40 huwec. Mecqaŋeŋ-jeŋicte sosoka i kubi 4, eme keretac sâc kuzi moc moc ñerawec. ³⁹ Eme keretac 5 jaŋe ufuŋte fâreopec râec-jopawec â 5 jaŋe ine qanaopec râec-jopawec erâ râqâc sâko mako i fâreopec râeme juwic mârenkopec maickewec.

⁴⁰ Eme Huram e kuzi, sapac â soc titiere râqâc wiac bawec wâc. Inuc erâ ñicwofun Salomore micte Wofuŋte ufuŋko gie bawec i batara-

fârewec. ⁴¹ E wiac ziñuc bafârewec hâcne: Wâtun ñicne jajahec utu-jekic oorânj barâ fainao eri wiac mizekicne sâckerâ râe rawec. ⁴² Erâ jâchândân hawari 400 bawec wâc, i eri wiac jajahec mizec-jofakicne ira biricke rakicne, ehuc eri mizekicne mocko jâchândân biri jajahec râec-jofakicne, â mocko biri jajahec jaha râec-jofakicne. ⁴³ Erâ keretac wiac 10 â kuzi sâko 10 i keretac sâc moc moc ñerawec, ⁴⁴ erâ opâ râqâc sâko â i derâ domañgopienj bulimakao 12.

⁴⁵ Erâ kuzi, sapac â soc titiere râqâc wiac, ine hâcne, wiac keci sasawa i Huranzi ñicwofuñ Salomore michte Wofuñ ufuñ-ticnere biñe aenj bâbâronj emasanjekicnezi bafârewec. ⁴⁶ Jordanj wânênko Zaretanj â Sukoti hae jahere ñondenko ñicwofuñzi mume wiac keci afezi sâc barâ aenj bâbâronj rike hesiec epie hurâ fua-fârewec. ⁴⁷ Eme Salomozi wiac keci ñeñe-ticnao râe-fârewec. Wiac i boc-jaha â ñemâcne jâmbân, irec ñemâc-ticnere sâc roninje quñkembijn.

⁴⁸ Eme Salomozi mume Wofuñte ufuñ irec wiac kecziñuc i wâc bafârembiñ: Alata moc golzi bakicne, erâ tebo moc golzia bakicne, irec faio poronj furu mukicnezi fowec. ⁴⁹ Erâ lambe dodoma 10 gol ematauckekicnezi bacjopakicne. Janje furuficko ira mai domambiñ, 5 janje fâreopec â 5 janje qanaopec inuc domambiñ. Janjere eri wiac, lambe â masune i golzia bakicne. ⁵⁰ Erâ râqâc â fitac wiac erâ soc titiere râqâc, kasonj â fanj wiac i gol ematauckekicnezi bafârekicne. Eme furufic â furu dindiñ irec motâc katanj, â fic maine irec motâc i golzia bakicne.

51 Eme ŋicwofuŋ Salomore michte Wofuŋte ufuŋko gie sasawa batara-fârepie taram Salomo e mamac-ticne Dawidizi wiac sasawa gol, siliwa â wâcwiac gâcne bâtiriwec i bafisirâ Wofuŋte ufuŋko zeŋaŋ râewec.

8

Salomozi zâzâfic katapa taha ufuŋko râewec (Bin II 5:2–14)

¹ Eme Salomo e Israe jaŋere soŋaŋ micne, gurune gurune jaŋere femicnefâc â garikin sâc jaŋere fekcicnefâc Jerusalem haeo hetumaŋ-jopawec, i Wofuŋte zâzâfic katapa Dawidire hae, Zion hâcne, irecnec miti ufuŋko bafeniŋte hefârec-jopawec. ² Mosa 7, zâŋene Etanim ere damaŋ maickeme Israe ŋic sasawa jaŋe hombaŋ sâko ŋeniŋte ŋicwofuŋ Salomoraŋ fisirâ tumaŋnemiŋ. ³ Israe ŋic jaŋere soŋaŋ micne fisi-fârepie taram taha bapa jaŋe Wofuŋte zâzâfic katapa bafaharerâ ⁴ reŋkehuc bafemiŋ, erâ tumaŋ qoruc boze â irec maŋnaŋ wiac fowec i mâmâc rombiŋ. Taha bapa â Lewiŋic jaŋe reŋkemiŋ hâcne. ⁵ Eme ŋicwofuŋ Salomo â Israe kikefuŋ eraŋ tumaŋne-fâremiŋ jaŋe sasawa zâzâfic katapa bâniecnehuc lama â bulimakao bocjaha jâmbâŋ hezuc-joparâ tahare biŋe râepie jaŋere zare wowosene me mamana-fârene mi ewec. ⁶ Eme taha bapa jaŋe Wofuŋte zâzâfic katapa bafisirâ ficmaŋne zâŋene furu dindiŋ ira kerubim jahere fakec rurumaŋko ŋeŋe-ticnaŋ hepie ŋewec. ⁷ Eham kerubim jahe fafakec-jekic zâzâfic katapa ŋewec irec fainao qaratiepic.

Ehuc zâzâfic katapa â reñwiac-ticne i sâockepic hâcne. ⁸ Ren jahec-ticne zoricnere tofa-jekic i ficmañne zâñene furu dindiñ irecnec fotâcnerâ ficmañne mamai ira ñiczi hohonere sâc epic. Fic sahacnao hohonene i mi epic. ⁹ Eme katapa irec mañnao qorac tapa jajahec sawa fopic, wiac gâcne aricne. Jahe Mosezi Horebe tikio ira katapao râec-jofawec. Israe ñic jañe Aigita mârenj beherâ wahahapie Wofunzi jañehc zâzâfic ewec irec qorac tapa hâcne. Eme jahe ira fopiczi fokopirec jaha.

¹⁰ Eme taha bapa jañe furufickonec wahahapie karoraczi Wofunje ufun fusucmawec. ¹¹ Irec taha bapa jañe karoracte gie-jenji baniñte quñkembij. Wofunje huriri qârenji ufun fusucmawec hâcne.

Taha ufun mutirimbiñ

(Bin II 6:1—7:10)

¹² Eme Salomozi zinjuc muwec:

“O Wofun, go sambânko zoañ râemenj ñekac,
erâ gahac dunðapâcko ñeñe juju ezore mukic.

¹³ Irec go zira ñeñe juju ecmurâ ficsâko moc zâñe
biñehc bagarepo,
go irec mañnao ñeñe juju erahuc juzemec
sanañ.”

¹⁴ Eme Israe kikefun jañe woñec doma-fârehapie ñicwofunzi fotikierâ jambuñ-jopawec.

¹⁵ Jambuñ-jopahuc kecziñuc muwec: “Wofun, Israere Anutu, e mumbiankezo. Eki hâcne mamac-nane Dawidi dân kecziñuc âzâcnehuc fârine bâfuawec: ¹⁶ ‘No Israe ñicfâc-nane Aigita mârenjkonec jowac-jopape wahambijnkonec teañ Israe gurune gurune jañerao zâñe biñe-nane

fuaocte fic moc baniñte hae moc mi bâwosâepo. Aricne, no Dawidi e Israe ñicfâc-nane soñañ-jopaocte bâwosâepo.’ ¹⁷ Eme mamac-nane Dawidi e Wofuñ, Israere Anutu sâsehuc fic moc bacneocte mañkehuc juwec. ¹⁸ Wofuñzi ine mamac-nane Dawidi zĩñuc âzâcnewec: ‘Go zâñe biñe-nanere fic moc bazo mañkekic i honepe mamana biañne ekac. ¹⁹ Erâ sifu go gahac mi bazemec. Aricne, ñokâge moc fua-gareocmu eki zâñe biñe-nanere fic moc fuaocte bazejec.’ ²⁰ Eme Wofuñzi dân muwec irec fârine bâfuawec wâc. No mamac-nane Dawidi âkehockehuc Israere eri ñeñeo ñekopac. I Wofuñzi muwec irec sâc fuawec. Eme no Wofuñ, Israere Anutu ere zâñe biñe fuaocte ufufuñ moc bapo hâcne. ²¹ Eme Wofuñzi mamacfâc-nâñec Aigita mârenkonec jowac-jopa wahahuc jañehc zâzâfic ewec zâzâfic katapa irec ñeñe hae moc bâfuakopac hâcne.”

²² Eme Salomo e Wofuñte alata irec mañfuñko Israe kikefuñ jañere maio domahuc meticne sambâñkopec bafaharehuc qaratiwec. ²³ Ehuc zĩñuc muwec: “O Wofuñ, Israere Anutu, sambâñko me mârenko gore sâc Anutu moc mi jujâmbâñkekac. Goki hâcne kiñaññicfâcge gore maio mañ hâcbuc juengopien jañe mañjaufuñ fofuñ sanañ ejarehuc jañehc zâzâfic emen i mi hetâcneekic. ²⁴ Go kiñaññicge, mamac-nane Dawidi hâcne, e findañdâñ âzâcnemen irec fârine bâfuamen. Go mârâc miczi dân mumen i miñecgac megezi fârine bâfuakomec. ²⁵ O Wofuñ Israere Anutu, go kiñaññicge mamac-nane Dawidi findañdâñ zĩñuc âzâcnemen i mutec

fârio qazejec: ‘Nokâfâcge jaŋe goki nore maio jumeŋ irec sâcko juhuc hata-jeŋic aimuŋ jaha soŋaŋkehuc nore maio juniŋmuo ine noni mupe go ñic moc Israere eri ñeŋeo nore maio ñeocte mi basacmu.’ ²⁶ O Israere Anutu, go irec hâcne kiŋaŋŋicge, mamac-nane Dawidi hâcne dân âzâcnemeŋ i mutec sanankezejec.

²⁷ “Jai, Anutu, go mâreŋko sâcne jucmu? Jâmbomac, sambânŋe sambânŋe jaŋe gore sâc mi ehapie go inucne sâkozi no fic zi bagarepo ira weninuc sâcne ñeŋe juju ecmu? ²⁸ O Wofun Anutu-nane, go kiŋaŋŋicge no minecgac gore maio wira wâwâsic ekopac irec hazec râerâ nunumu-nane manazemec. ²⁹ Go fic zirec zinuc mumeŋ: ‘I zâŋe-nanere ñeŋe hae ezejec’; irec go ñafe zoaŋ sâc fic zira zâŋe fitec wahazejec â kiŋaŋŋicge no fic zira nunumu gie bahape mananarezemec. ³⁰ Kiŋaŋŋicge no me Israe ñicfâcge nâŋe fic zira wâsicgupene goki faic sambânko ñeŋe haegao juhuc nunumu-nâŋec manarâ aki anonoc enârezemec.

³¹ “Ñic moczi âgo-ticnerao bahac ñemâcne bâfuame âgonezi mumupaŋ dân muocte fânoc hecneme fic zira alatagere manfunko mumupaŋ dân i muocte fisiocmuo ³² ine goki faic sambânko juhuc dânjekic manarâ kiŋaŋŋic jahecge jahere mumutara gie bahuc ñic hehesicne eebapa-ticnere sâcko okacne râcnezemec â bahacmâc juwec e ine tiŋne juju-ticnere sâcko akickezemec.

³³ “Israe ñicfâcge jaŋe hehesic juhuc bugao bahapie go râsifâc-jeŋic mana-jaretec bawahac-jopapie jaŋe manjeŋic bârisiehuc gorao risierâ

zâñege mutaniñkehuc fic zira numu hefârec egareniñmuo ³⁴ goki faic sambânko juhuc dânjenic manarâ sâqocne-jenic mutâmire-jarehuc kâcqenefâc-jenic mâren jaremen ira mocwâc râec-jopazemec.

³⁵ “Jañe hehesic juhuc bugao bahapie goki sambânñte motâc hetec hoe mi hehe mâc foocmu, eme goki bâtiñ-jopakomecte fic zira zâñege mutaniñkehuc sâqocne-jenic beherâ nunumu gie baniñmuo ³⁶ goki faic sambânko juhuc dânjenic manarâ kiñanñicge no â ñicfâcge Israe nâñere sâqocne mutâmirehuc mutec ñicfâcge mâren-jenic biñe qajaremen ira hoe hezejec. Go inuc ehuc hata bianñe âte raniñte qazu-jareekic hâcne.

³⁷ “Eme mâren-nâñecko roroc me huc mimicne moc fuaocmu me nânâzi gieo hâmo qanzaran eocmu me hâpic me qokic guru sâko fisiniñmu, me râsifâc-nâñec jañe fisirâ hae-nâñec moc somâ baniñmu me wiac hâhâwicne me hucsâko moc fuaocmu ³⁸ me wiac hâhâwicnezi ru sâc buzâic bâfua-nâreme ñic izi me izi me Israe ñicfâcge sasawa nâñe numu hefârec egarehuc fic zira menâñec nunumuo sicne-garenañmuo ³⁹ goki faic sambânko ñeñe haegao juhuc aki anonoc enârerâ ru sâc eebapa-nâñecte sâcko wiac enârezemec. Goki buçge mâren ñic sasawa manjenic hone taraekiczi mañnâñec honeekic wâc. ⁴⁰ Irec erâ nâñe kâcqenefâc-nâñec mâren tahac-jopamen ira jufenañmu sâc aran bagarehuc junzepenen.

⁴¹ “Eme ñic jañe zâñe sâkoge â tâpiri qunqasangere biñe mananiñmu; ⁴² ehame ñic furune moc, Israe ñicfâcge nâñere guruo mi

fuakicnezi mâreŋ zorickonec zâŋe biŋegere ehuc fisirâ fic zira nunumu gie baocmu ⁴³ ine goki faic sambânko ñeŋe haegao juhuc dânťicne manarâ wiac irec me irec numu-gareme manacnezemec. Go iŋuc etec ŋic gurune gurune mâreŋ sâc juranťopien jaŋe zâŋe biŋege manarâ Israe ŋicfâcge nâŋe araŋ bagareŋťopenen irec sâc jaha araŋ bagarehuc zĩŋuc mananzepien: Fic bagarepo zira zâŋe biŋege fokac.

⁴⁴ “Eme go ŋicfâcge ira me ira sorec-nâpotec râsifâc-nâŋec jopanaŋte zikao rahuc hae sâko zi bâwosâemen â zâŋe biŋege fuaocte fic bagarepo zirapec zâŋe fihuc gorao nunumu gie banaŋmuo ⁴⁵ goki faic sambânko juhuc numu hefârec dânŋâŋec manarâ dopec-nâpozemec.

⁴⁶ “Ŋic moczi hehesic tâmiric moc mi jukac, irec nâŋe hehesic moc bâfuârâ bugao banaŋmu ine goki aaric manahuc râsifâc-nâŋec jaŋere meo râec-nâpotec jaŋe mâreŋ- jenic bembenko me zoricko fokac ira kâpâcwârue bacnâpo raniŋmu. ⁴⁷ Eme nâŋe kâpâcwârue râec-nâpombiŋ mâreŋ ira maŋnâŋec bârisiehuc gorao risierâ numu hefârec egarehuc zĩŋuc munaŋmu: ‘Nâŋe sâqorehuc sindaŋ â hehesic bâfuamben.’ ⁴⁸ Nâŋe iŋuc muhuc gorao risierâ râsifâc-nâŋec kâpâcwârue bacnâpo rambiŋ mâreŋ ira maŋ qâqâtâc-nâŋec furu jaha gorao râehuc mâreŋ- nâŋec kâcŋenefâc-nâŋec tahac-jopamen erâ hae sâko bâwosâemen erâ zâŋe biŋege fuaocte fic bagarepo zirapec zâŋe fihuc nunumu gie gorao banaŋmuo ⁴⁹ goki faic sambânko ñeŋe haegao juhuc numu hefârec

dâŋnâŋec manarâ dopec-nâpozemec. ⁵⁰ Erâ hehesic â qaqatara bâfuarâ bugao bambeŋ i mutâmire-nâre-fârerâ kâpâcwâru bacnâpombiŋ jaŋe ejaretec busâqoc mana-nârenzepieŋ. ⁵¹ Wemocte, nâŋe gore ŋicfâc â biŋefâcge juŋgopeneŋ irec. Go Aigita mâreŋko aeŋ zocbâruŋ irec sâc zâic serereŋ maŋnao jumbenjkonec bawefuc-nâpomeŋ; ⁵² irec kiŋaŋŋicge â ŋicfâcge nâŋe numu hefârec egarepene sâc nâŋerao zâŋe fihuc mana-nârezemec. ⁵³ O Wofuŋ Anutu, goki hâcne ŋic gurune gurune mâreŋ sâc juranŋopieŋ jaŋeraonec bâtâc bacnâporâ biŋefâcge bacnâpomeŋ; go kâcŋenefâc-nâŋec Aigita mâreŋkonec bawefuc-jopahuc kiŋaŋŋicge Mosere micko dâŋ râemeŋ irec sâcko wiac efâremeŋ hâcne.”

⁵⁴ Eme Salomo e Wofuŋte alata irec maŋfuŋko dieŋzi herâ meticne sambânkopec bâfeŋnehuc Wofuŋ numu hefârec ecnekume taram e faharewec. ⁵⁵ Fahare domahuc Israe kikefuŋ sasawa dâŋ marac sâkoo kecziŋuc muhuc jambuŋ-jopawec: ⁵⁶ “Wofuŋzi Israe ŋicfâc-ticne nâŋâc dâŋ mupaŋke-nârewec irec sâc jujuhâmo bâfua-nârewec e mumbiankezo! Eki hâcne kiŋaŋŋic-ticne Mose ecneme findaŋdâŋ bianŋe mufua rawec irecnec dâŋ moc waha qahuc fârimâc mi ewec. ⁵⁷ Wofuŋ Anutu-nâŋec e mamacfâc-nâŋec jaŋehec juwec irec sâcko nâŋâcnehec juzejec wâc, e behec-nâporâ mi râpec-nâpozejec. ⁵⁸ Eki maŋnâŋecte guriŋ baha erao domazejec. Ehame hata-ticnao ju fârehuc mamacfâc-nâŋec sâcmutâc, dâŋsanaŋ â mumutâc

dân wiac jarewec i mana reren enzepenen.
⁵⁹ Eme no Wofuŋ mu wâwâsic ecnekopac dân zizi Wofuŋ Anutu-nâŋec ere maŋfuŋko ɲafe zoaŋ sâc fozejec. Ehame e kiŋaŋɲic â Israe ɲicfâc-ticne ɲafe zoaŋ sâc bafic-nâpohuc dânâŋec mutarazejec. ⁶⁰ Inuc enâreme ɲic gurune gurune mâren sâc jurangopien jaŋe ziŋuc mana taranzeŋien: Wofuŋ e Anutu fârine jukac. Erao zuhuckerâ Anutu moc mi jujâmbâŋkekec. ⁶¹ Irec ɲoŋe maŋŋenɲic hâcbuc jaha Wofuŋ Anutu-nâŋectao râerâ dânsanâŋ-ticnere hata âtehuc sâcmutâc dânticne damen zi eenŋopien irec sâcko soŋaŋkehuc junzepien.”

⁶² Eme ɲicwofuŋ â Israe kikefuŋ sasawa jaŋe Wofuŋte maio taha bâzi rikembin. ⁶³ Eha Salomo e bulimakao 22 tausen â lama 120 tausen i wama bâzire muhuc Wofuŋ taha bacnewec. Inuc ehuc ɲicwofuŋ â Israe kikefuŋ sasawa jaŋe Wofuŋte ufuŋ mutirimbin. ⁶⁴ Zoan ijaha ɲicwofuŋzi hae zoŋa zâzâŋiŋne moc Wofuŋte fic mamai fowec i mutiriwec wâc. Ira hâcne qowi bâzi, taha bâzi â wama bâzire wokemaŋ wiac taha bawec. Qowi bâzi, taha bâzi â wama bâzire wokemaŋ bocjaha fuawecte Wofuŋte maio alata aen bâbâronzi bakicne ɲewec ira wiac i râe-fâreniŋte quŋkembin hâcne.

⁶⁵ Eme Hamati hae ramicnaonec fuŋkerâ huraku Aigita mârenŋe opâo tarakac mâren ɲonden irecnec ɲic ɲokac guru sâko jâmbâŋ, Israe kikefuŋ sasawa jaŋe hâcne hehâckerâ Salomohec tumaŋnehuc Wofuŋ Anutu-jeŋicte maio zoan 7 hombaŋ ɲembin. ⁶⁶ Eme zoan 8 maick-

eme ñicwofuñ Salomozi kikefuñ mâtoc-jopame jañe e mumbiankehuc bubian faio hae-jenñic sâc râwiñne-fârembiñ. Wofuñzi kiñanñic-ticne Dawidi â Israe kikefuñfâc-ticne ehâmo-jarewecte zeri ehuc râwiñnembiñ hâcne.

9

Wofuñzi Salomo mocwâc fuacneme arec jajahewec
(Bin II 7:11–22)

¹ Eme Salomo e Wofuñte fic mecne, e jahacne erific mecne â ficwiac gâcne baocte mañkewec sâc i batara-fârewec. ² Eme Wofuñzi mârâc Gibeon haeo Salomo fuacnewec irec sâc mocwâc fuacnewec. ³ Ehuc dân kecziñuc âzâcnewec: “Go nore maio wira wâwâsic emen i manapo. Eme go nore zâñe fosanankeocte fic bamen i jambunkepo, irec mañzâñe-nane ira râpe ranqa ranqa forahuc juzejec sanan. ⁴ Eme go mamacge Dawidizi nore maio juwec irec sâc siocmâc â tiñne juhuc noni dânsananj â mumutâc dânñane renkeniñte râe-ñarepo i renke-fârecmuo ⁵ noni ñicwofuñ ñeñege basanankepe Israe kikefuñ ranqa ranqa ñicwofuñ jujarecmu. Noni mamacge Dawidi kecziñuc âzâcnepo irec sâc fuaocmu: ‘Go ñic moczi Israere eri ñeñeo ñeocte moc mi basa-jâmbânkecmu.’ ⁶ Ñoñe me qâricfâc-ñenñic ñoñe ine râpecnuhuc sâcmutâc me dânsananj-nane râe-ñarepo i mana reren mi ehuc rarâ nemu gâcne numu-jarehuc kiñan qajareninmuo ⁷ ine noni Israe kikefuñ mâren tahac-ñopapo irecnec bâsirowec-ñopapemu, erâ

ufuñ zira nore zâñe biñe foocte mutiripo i maineonec tunkepe raocmu; eme ñic gurune gurune jañe Israe ñic ñoñerao iticnehuc mu qâqin dân â mu âke sisic dân eñareniñmu. ⁸ Eme fic sesuctac fuame jâuruniñmu sâc jañe bipic tatara ejareha sisi fufuñgañ ehuc zinuñ mu wioc eniñmu: ‘Wofuñzi wemocte hae mâreñ â ufuñ zi wiac inucne ejañewec?’ ⁹ Jañaczia inuc wiohuc zinuñ munzonñopien: ‘Jañe Wofuñ Anutu-jeniczî kâcñenefâc-jeniczî Aigita mâreñkonec jowac-jopa wefuwec e beherâ nemu gâcne jañerao qohotarâ numu-jarehuc kinñ qajarembiñte Wofuñ Anutu-jeniczî wiac hâhâwicne keci sasawa bâfua-jarefârewec.’ ”

*Salomozi wiac gâcne ebac ewec irec binan
(Bin II 8:1–18)*

¹⁰ Eme Salomo e fic jajahec, Wofuñte fic â e jahacne fic i jara 20 sâko baku batara-fârewec. ¹¹ Tiro haere ñicwofuñ Hiram eki jâc sasawa, jâmâzâc mecne, wete mecne â gol mecne i Salomore añac fowec sâc râcne-fârewec. Eme ñicwofuñ Salomozi irec okacne Galilaia mâreñko hae 20 ñerambiñ i râcnewec. ¹² Eme Hiram e Salomozi hae 20 râcnewec i hone tâcneocte Tiro haeonec waharâ honec-joparâ maname mi sâckewec. ¹³ Irec Salomo zinuñ âzâcnewec: “Hahac-nane, go hae zi wemo hae naremeñ?” Inuc murâ mâreñ irec zâñe Kabuli muwec. Nâñâcne dânko: Guec tâmiric. Eme zâñe i zinuñcia fokac jaha. ¹⁴ Eme Hiramzi gol monen sâko 120 ñicwofuñtao râeme rawec.

¹⁵ Eme ʒi ine ŋicwofuŋ Salomozi ŋic ɡâcne kiŋaŋ qaqa gie mujareme bambiŋ irec biŋaŋ. Jaŋe kiŋaŋ qaqa gie bahuc wiac ʒiŋuc baƒârembiŋ: Wofuŋte ufuŋ, Salomo e jahacne ficsanaŋ Milo â Jerusalem haere sacsanaŋ erâ hae sanaŋ Hazoro, Megido â Gazere. ¹⁶ Eme Gazere haere fuŋne ʒiŋuc: I mârâc jaha Aigita ŋicwofuŋ Faraozi we-furâ ro rauc erâ ʒoc râeme ʒâsenkeme Kanaaŋ ŋic hae rune qâhâmoc-jopawec, erâ juku otâ-ticne, Salomore ŋonâŋ hâcne, e meo babacte bubiaŋ wiac râcnewec. ¹⁷ Eme Salomo e Gazere haere sesuctacko hae qâricne barâ Bete-Horoŋ hae juwicne i bawec wâc, ¹⁸ erâ Juda mâren burocnao Balata â Tama hae i mâmâc bawec. ¹⁹ Erâ wâc rowaŋ hae-ticne sasawa â keretac â becâsifâc-ticne jaŋere hae biri â wiac ɡâcne i Jerusalemko me Lebanon tiki mârenko me uuc-maŋ-ticnao ira me ira baocte aŋackewec sâc baƒârewec hâcne. ²⁰ Eme Amori, Hiti, Perizi, Hiwi â Jebusi ŋicguru jaŋere ʒika nâfoc jumbiŋ jaŋe Israe kikefuŋ jaŋere tofafâc mâcne. ²¹ Israe ŋic jaŋe ŋicguru i jopa mizieninŋte eipiembiŋ. Irece nâfocne jumbiŋ jaŋere qâricfâc jaŋe Israe mârenko zuhuckerâ jumbiŋ. Eme i jaŋe hâcne Salomozi kiŋaŋ qaqa gie sâko baniŋte mupaŋke-jareme ʒuʒuhuc jaha bambiŋzi bahuc juŋgopien. ²² Â Israe ŋic jaŋe ine gie moc mi mupaŋke-jarewec. Jaŋe momorifâc-ticne erâ momori micne fekicne â wahakicne erâ keretac â becâsicfâc-ticne jaŋere soŋaŋ jumbiŋ.

²³ Eme Salomore gie wiac bahuc jumbiŋ ŋic i jaŋere micne ine ŋic 550 jumbiŋ. Jaŋe ŋic soŋaŋ-

jopahapie gie wiac bahuc jumbinj hâcne.

²⁴ Eme Salomo e Faraore otâ Dawidire haeonec jowa wefurâ fic bacneweckoa râeme fewec. Injuc erâ Milo ficsananj bawec wâc.

²⁵ Salomozi Wofuñ alata bacnewec irec fainao jara sâc arecne 3 qowi bazi â wama bâzi erâ hosâc âsu wiac i Wofuñ rikecne jujec. Injuc ehuc fic batara-fârewec.

²⁶ Eme Hâwec Bâbâronje mecnao Edom mârenko Eloti hae bembenjo Ezion-Gebe hae nejac ira Salomozi mume woke wiac bacnembijn.

²⁷ Eme Hiram e kinanñicfâc-ticne gâcne, wokeo juhuc hâwecte fune mamana, jaje sorec-jopame Salomore ñicfâc jajehec wokeo jumbinj. ²⁸ Eme jaje raku Ofiri mârenko fisirâ gol monej sâko 420 rorâ risiehuc ñicwofuñ Salomo bafisicnembijn.

10

*Seba mârenje ñokac wofuñzi Salomorao fisiwec
(Bin II 9:1–12)*

¹ Eme Seba mârenje ñokac wofuñ eki Salomore zâne binje manarâ dân herâricnao esâickeocte fisiwec. ² E kikefunfâc-ticne guru sâko jâmbân jajehec Jerusalem haeo fisimbijn. Ehame kamelefâc-ticne jaje nânâ ba bâziziwec eere wiac mecne, gol bocjaha mecne â qânâ wiac furi sâko i mâmâc âsickembijn. Eme e Salomorao fisirâ ehac dângezore mankwec i âzâcne-fârewec.

³ Erâ dân wiocnewec sâc irec okacne Salomozi sâcne bâtikiecnwec. Ñicwofuñ e wiwio irec me irec okacne bârisieocte moc mi bititiwec hâcne.

⁴ Eme Seba mârenje ñokac wofuñ e Salomo manqârân-ticne â fic bawec ⁵ â tebo-ticnao nânâ

wiac fowec, â kâcqenefâc-ticne e orânkehuc
 ɲembiŋ â kiŋaŋ qaqaŋâc-ticne jaŋe ɲaqi biaŋne
 rojuhuc kiŋaŋ qacnembiŋ â waiŋ soŋaŋfâc-ticne
 gie-jeŋic bambiŋ erâ Wofuŋte ufuŋko qowi bâzi
 rikehuc juwec, wiac i sasawa hone-fârêrâ maŋne
 omaewec.

⁶ Eme ɲicwofuŋ ziŋuc âzâcnewec: “No mâreŋ-
 naneo juhuc eebapagere â maŋqârâŋgere biŋe
 bâroŋ manapo i fârine zine hâcne bâfuakopac.

⁷ No biŋege sawa manahuc manape fârine mi
 ewec. Miŋecgac no nahac fisirâ zâŋe fâri-nanezi
 qame honehuc ziŋuc manakopac: Jaŋe dâŋ binar
 huŋtuc sawa enarembiŋ zi ine maŋqârâŋge â
 jujuhâmoge izi biŋege siricke-fârekac. ⁸ ɲicfâcge
 â kâcqenefâcge dameŋ sâc gore maio dom-
 ahuc maŋqârâŋgere dâŋ mana sakac eenŋopien
 jaŋere manape zerine ekac. ⁹ Wofuŋ Anutuge e
 mumbiaŋkezo! Eki hâcne Israe kikefuŋ manjaun
 fofu sanar ejarehuc gore maname sâckewecte
 ɲic eebapa biaŋne â fâretiŋkoa jowac-jopahuc
 jucmurâ Israere eri ɲeŋeo râecguhuc ɲicwofuŋ
 âkendâŋguwec.”

¹⁰ Inuc murâ ɲicwofuŋ gol
 ɲemâc-ticne 120 erâ nânâ ba bâziziwec eere wiac
 bocjaha jâmbâŋ â qânâ wiac furi sâko râcne tahac
 ewec. Seba mâreŋte ɲokac wofuŋ e ɲicwofuŋ
 Salomo nânâ ba bâziziwec eere wiac râcnewec i
 hâhâwicne jâmbâŋ. Inucne sâko i zâhec moczi
 mocwâc mi bafisiwec.

¹¹ Erâ wiac i sawa mâcne, Hiramte wokefâc
 jaŋe Ofiri mâreŋkonec gol baware jumbien jaŋe
 kionjâc bocjaha â qânâ wiac furi sâko Ofiri
 mâreŋkonec bafisi jumbien wâc. ¹² Eme Salomozi
 mume jâc biaŋne i rohuc Wofuŋte fic â e jahacne

fic irec wâtunj gâcne barâ gae hehe ñic janjere gita kulele wiac bajarembinj wâc. Jâc bianje inucne mârâc jaha mi bafisikicne â mi honekicne â zâhec wâc inuc jaha mocwâc mi honembinj.

¹³ Eme ñicwofunj Salomozi Seba mârenje ñokac wofunj e wiac aṇac manarâ mufuawec sâc i tahackehuc wiac gâcne e jahac râcnezo man-asuwec i zuhuckecnewec. Eme e â kike-funfâc-ticne janje faharerâ mârenj-jenicko risie rambinj.

Salomo e money mafa â zâje binje sâkohec juwec

(Bin II 9:13–24)

¹⁴ Eme jara sâc gol wiac Salomoraο fisi jujec irec ñemâc i 660. ¹⁵ Erâ i âbârâ gie bapa ñic narenj gareṇ ejumbienj janjere sahac taha erâ Arabia mârenje ñicwofunj janjere sahac taha â mârenj sonṇṇ janjere sahac taha money bafisimbij i ira zuhuckewec.

¹⁶ Eme ñicwofunj Salomozi mume gol ematauck-ekicnezi maro kâcḡene 200 bambinj. Maro mocte gol râembij irec ñemâc 600. ¹⁷ Erâ maro piticne 300 i gol ematauckekicnezia bambinj wâc. Maro mocte gol râembij i ñemâc-ticne 3 paonj irec sâc. Eme ñicwofunji mume maro wiac i Lebanonj Kâtefic ira râembij. ¹⁸ Eme ñicwofunji mume elefanje zuṇenezi eri ñeṇe sâko moc barâ gol ematauckekicnezi fonjkembij. ¹⁹ Eme ñeṇe e riri-ticnehec, ririre fenḡaṇe 6 fowec. Erâ ñeṇe irec râpenao ira bulimakao ḡizec metâ bakicne. Neṇere ḡaṇeṇnao ñifec â ñifec ine me hehesin ba akic ekicne, â irec ḡaṇeṇnao laionj hawari

jajahec metâ bakicne. ²⁰ Eme laion hawari 12 i riri fengañne 6 ira ñifec â ñifec râec-jopakicne. Uucmañ ira me ira wiac inucne moc mi bam-biñ, aric kereñne. ²¹ Ñicwofuñ Salomore wain â opâ râqâc wiac sasawa i golzi bafârekicne, erâ Lebanon Kâteficko râqâc wiac fowec i gol qaqacnezi bakicne. Salomozi juwec damen ira siliware manapie wiac omane ewec. ²² Ñicwofuñ e Tarasisi haeonec woke sâko jucnembiñ, jañe ñicwofuñ Hiram ere wokefâc jañehc mâmâc hâwecko jujumbien. Erâ Tarasisi haeonec woke jañe jara 3 taramc sâc fisihuc gol, siliwa, elefante zune, monki â wipe hawari bian bafisicne jumbien.

²³ Eme ñicwofuñ Salomo e monen mafa sâko â mânqârâñhec juhuc mâren sâc ñicwofuñ jurambiñ jañe siric-jopa-fârewec. ²⁴ Ehame Anutuzi manqârâñ tahackewecte ñicne ñicne jañe Salomo honehuc manqârâñ-ticnere dân mananiñte ejarewec. ²⁵ Eme jarane jarane fisimbiñ sâc jañe buc buc taha wiac-jenjc bafisihuc râqâc wiac siliwa â golzi bakicne, erâ naqi qoruc â wiac âsu bian, â nânâ ba bâziziwec eere wiac erâ becâsic dongi wiac râne jumbien.

*Salomozi becâsic â keretac rome fisiwec
(Bin II 1:14–17; 9:25–28)*

²⁶ Salomo e keretac â becâsicko rara ñic het-umañ-jopawec. E keretac 1 tausen 400 â becâsicko rara ñic 12 tausen jucnembiñ, eme i jañe rocjoparâ keretac jujure sâc hae inucnao râec-jopawec â gâcne ine ñicwofuñ e jahacnehec Jerusalem haeo jumbien. ²⁷ Eme ñicwofuñ e siliwa

â gol i Jerusalem haeo qânâ inucne kosa râeme forawec â jâmâzâc jâc bocjaha jâmbân rome fisirâ Sefela mârenko kakikic jâc forawec irec sâc forawec. ²⁸ Erâ Salomo becâsic bafisicnembiñ i Aigita â Kue mârenkonec. Nïcwofunte furi bapa ñic jañe Kue mâren ira hâcne furine bambiñ. ²⁹ Ehuc Aigita mârenkonec keretac moc i siliwa monen 600-zi furine bambiñ, â becâsic moc irec furi ine siliwa monen 150 râembîñ. Eme Hiti â Siria ñicwofun jarepie jañe wâc jañere meonec furine bambiñ.

11

Salomo e juju-ticne sâqorewec

¹ Nïcwofun Salomo ere manzi ñokac jabane kecziñuc jañerao boc domawec: Farao otâticne, Moabi ñokac, Amon ñokac, Edom ñokac, Sidon ñokac â Hiti ñokac. ² Eme Wofunzi mârâc jaha ñicguru i jañere Israe ñic ziñuc jazawec: “Jañe manñenñic fârepie nemufâc-jeñic jañerao qohotanzipinthe ñone jañeraonec ñokac mi rocjopanzipien â jañe mana-jarepie ñoneraonec ñokac wâc mi rocjopanzipien.” Salomo e ine ñokac i jañerao hâcne manñicne râewec. ³ Eme ñokacfâc-ticne fekicne jumbiñ jañere zare 700 â mamare jucnembiñ jañere zare 300. Jañe hâcne manñicne bâsifuckembiñ. ⁴ Salomo e ñicqizec ewec damen ira ñokacfâcne jañe manñicne fârepie nemu jabane jañerao qohotahuc, mamac-ticne Dawidizi manñicne hâcbuc Wofuntao râewec inuc jâmbân mi ewec. ⁵ Ehuc Sidonñic jañere nemu ñokac zâñene Asitorete â Amonñic jañere nemu

repicne, zâŋene Milikom jahe kiŋaŋ qajactewec.
⁶ Erâ e Wofuŋzi maname sâqorewec wiac i hâcne ebac ehuc mamac-ticne Dawidizi Wofuŋ bâjâpe-hâmowec iŋuc mi ewec. ⁷ Salomo e damen ira Jerusalem hae zoaŋ wewefunaopek tiki moc ŋekac ira Moabi jaŋere nemu repicne zâŋene Kemosi â Amonŋic jaŋere nemu repicne zâŋene Moleke jahere furu mâren moc bâfuawec wâc.
⁸ Erâ ŋokacfâc-ticne jabane jaŋe furu mâren bâfuâ-jarewec jaha. Eme jaŋe nemufâc-jeŋic hosâc âsu â taha wiac rike-jare jumbien.

⁹ Eme Salomo e Wofuŋ Israere Anutu mârâc jaha arec jajahec fuacnewec e maŋzi behewecte Wofuŋzi aaric manacnewec. ¹⁰ Ehuc Salomo e nemu jabane mi bâjâpec-jopaocte âzâcne-bipiehame sifu dâŋticne mi reŋkewec.
¹¹ Irec Wofuŋzi Salomo ziŋuc âzâcnewec: “Go mâsi iŋuc ehuc zâzâfic â dâŋsanaŋ-nane mutâcne-garepo i mi soŋaŋkemente no uucmaŋge i gore meonec batara-jâmbânkerâ kiŋaŋŋicge moc râcnepemu. ¹² Erâ mamacge Dawidire erâ go juhaŋte iŋuc mi epemu. Ŋokâgezi juocmu ere meonec ine batarapemu.
¹³ Erâ Dawidizi kiŋaŋŋic-nane juwec â Jerusalem hae bâwosâepo irec erâ uucmaŋ sasawa i ŋokâge mi jâoc rofârepemu, ŋicguru mocjaha mujarepe ere biŋefâc junzepien.”

Salomo râsifâc-ticne fuŋkerâ fuambin

¹⁴ Eme Wofuŋzi Edomŋic moc zâŋene Hadadi ecneme Salomo râsi rocnewec. Hadadi e Edom mârenŋe ŋicwofuŋ ere garikiŋkonec. ¹⁵ Dawidi e Edom mârenko juhame momori micne Joabezi

ñic jopakicne ducjopaocte ferâ Edom mârenko ñic sasawa qâhâmoc-jopawec. ¹⁶ Joabe e Edom ñic sasawa qâhâmoc-jopa-fâreocte e jahacne â Israe ñic jañe ijaha zuhuckerâ juhapie mosa 6 tarawec. ¹⁷ Eme Hadadi e damen ira motec piticnea juhuc Edomñic tucne mamac-ticnere kinan qaqañac jajehec mâmâc wiserâ Aigita mârenko rambin. ¹⁸ Jañe Midian mârenkonec faharerâ raku Paran mârenko fisimbín. Ehuc irecnec ñic tucne jowac-jopapie raku Aigita mârenko ñicwofuñ Faraoro fisimbín. Eme eki fic â nânâ opâ jarewec. Ehuc zuhuckerâ mâren mutara-jarewec. ¹⁹ Erâ Farao e Hadadire maname sâckewecte juku e jahacne ñonân, ñokac-wofuñ Tapanesi ere qo râcneme ñonân-ticne rowec. ²⁰ Eme Tapanesi qoticnezi ñokâ moc rocnewec zâñene Genubatí. E Tapanesizi Faraore ficko gume jowac ecnewec. Ehamé Genubatí e Faraore ñokâñac jajehec Faraore ficko juwec. ²¹ Juku Dawidizi apa ñosafâc-ticne janerao zuhuckehuc hâmwec â momori micne Joabe e wâc inuc jaha hâmwec, Hadadi e binje inuc manarâ Farao zinuc âzâcnec: “Mana-naretec faharerâ hae mâren-naneo risiepe.” ²² Inuc mume Faraosi dân zinuc bâtikiecnec: “Go norao juhuc wemo wiac basakic, irec hae mârenñao racmurâ manasukic?” Wiocneme muwec, “Mâc mananaretec rape.”

²³ Eliada ñokâ-ticne Rezon e bombon-ticne, Zoba mârenñe ñicwofuñ Hadadeze eraonec wisewec. Eme e hâcne Anutuzi Salomore râsi jaha wâc rowosâewec. ²⁴ E Dawidizi ñic qâhâmoc-jopawec irec faicnao ñic rocjoparâ micne bajareme râsi fisi jumbin. Erâ Damasko

haeo rarâ ira juhuc Rezon e hae irec ñicwofuñ âkendânembiñ. ²⁵ E Hadadizi sisipiric gie bawec irec sâc jaha ehuc Salomore damenjo Israe ñic râsi ejarewec. Erâ e Israe ñic janere hâwickewecte Siria mârenjo ñicwofuñ juwec.

²⁶ Ehame Zereda haeonec Eferaim ñic moc zâñene Nebate ere ñokâ Jeroboam e Salomore kinanñic juwec. Nençoc-ticne e ñokac hozec moc zâñene Zerua. Eme Jeroboam e wâc inuç jaha ñicwofuñ Salomo râsi ecnewec. ²⁷ E funne zinucte ñicwofuñ râsi ecnewec: Salomo e huec sanan zâñene Milo bahuc mamac-ticne Dawidire hae irec sac bâbâzicke-fârewec. ²⁸ Jeroboam e gie bapa ñic saric juwec. Irec Salomozi, ñicmotec e zoqachec, inuç honerâ Josefere kikefunfâc gie ñemâcne mujarekicne i sonankeha baninthe mucnewec. ²⁹ Ehame damen ira Jeroboam e Jerusalem haeonec rahame Silonjic porofete Ahi-azi hatao bâfuawec. Ahia e ñaqi-ticne qâricne moc heme hume juwec. Eme Ahia â Jeroboam jahe hatao buc jupic. ³⁰ Eme Ahia e ñaqi-ticne qâricne rojuwec i fâreme bâmbân qaha bâsuckeme dâkâne 12 ewec. ³¹ Inuç erâ Jeroboam zinuç âzâcnewec: “Go dâkânege 10 i roc. Israere Wofuñ Anutu e zinuç hâcne mukac: ‘Manakic, no Salomore uucman inuç hâcne bâfâuckezo ekopac. Ehuc go ñicguru 10 garepemu. ³² Erâ kinanñic-nane Dawidire erâ â no nahac Israe ñic gurune gurune janeraonec Jerusalem hae bâwosâepo irec erâ e ñicguru mocjaha bajuzejec. ³³ E râpecnuhuc Sidonñic janere nemu ñokac Asitorete â Moabi ñic janere nemu Kemosi â Amonñic janere nemu

Milikom jañe dape-jareekac. E mamac-ticne Dawidizi ewec irec sâc hata-naneoa juhuc nore zâñe faio wiac etinkehuc dânsanaj â mumutâc dânñane mi soñankeekac hâcne. ³⁴ Irec no uucman furu jaha mi jâoc ropemu. Kinanñic-nane Dawidi e no nahac rowosâehape sâcmutâc â dânsanaj-nane soñankewecte ere erâ manacnehape juju damen-ticne foocmu sâc micne bapa juocmu. ³⁵ No uucman i ñokâ-ticne jâoc rorâ go ñicguru 10 garepemu. ³⁶ Â ñokâ-ticne e ine ñicguru mocjaha râcnepemu. Ehame Jerusalem haeo zâñe-nane foocte rowosâepo hae ira hâcne kinanñic-nane Dawidi e tatamac focneha zâñe mai-naneo juzejec. ³⁷ Noni âkendângupe go ñic weni jañere egarekac jañe qañen-jopahuc Israe guru ñicwofuñ ejarezemec. ³⁸ Go kinanñic-nane Dawidizi ewec irec sâc jaha ehuc wiac sasawa mutâcne-garekopac i renkerâ hata-naneo juhuc dânsanaj â sâcmutâc dânñane soñankehuc nore maio wiac tiñne ebac ecmuo ine no Dawidirao epo irec sâc kikefunfâcge hume keten ejarepemu. Ehuc Israe kikefun tahacgupemu. ³⁹ Eme no irec erâ damen bemberne mac Dawidire qâricfâc fific bacjopapemu.’ ” ⁴⁰ Eme irec Salomozi Jeroboam qaocte hone jâjâpehuc juwec. Ehame Jeroboam e fahare wiserâ Aigita mârenje ñicwofuñ Sisaka erao ra juhame Salomo hâmoc damen-ticne maickewec.

Salomo hâmowec
(Bin II 9:29–31)

⁴¹ Salomozi wiac sasawa ebac ewec â manqârân-ticnere binaj i Salomore gie binaj

papia qizecko qârenke-fârekicne. ⁴² Salomo e Israe ñic qanen-jopahuc Jerusalem haeo ñicwofun juhame jara 40 tarawec. ⁴³ Juku apa ñosafâc-ticne janerao zuhuckehuc hâmome mamac-ticne Dawidire hae qizecko duckembiñ. Ehame ñokâ-ticne Rehoboamzi tucticne qarâ ñicwofun juwec.

12

*Israe ñic jañe manrâñgen bâfuambin
(Bin II 10:1—11:4)*

¹ Israe ñic jañe Rehoboam ñicwofun âkendânñeniñte Sikem haeo tumanñe-fârehapie Rehoboam e ira rawec. ² Ehame Nebate ñokâ-ticne Jeroboam e ñicwofun Salomoraonec wiserâ Aigita mârenko rawecte ira juhuc bine i manarâ Aigita mârenkonec risiewec. ³ Eme jañe dân râecnehuc hefârembiñ. Eme Jeroboam â Israe ñic sasawa jañe Rehoboamtao fisirâ dân zinjuc muhuc âzâcnembiñ: ⁴ “Mamacgezi tagi bâmâmâcke-nârewec. Irec goki gie ñemâcne â tagi fai-nâñecko fokac i baafecke-nâretéc kiñañ qagarenanmu.” ⁵ Jañe injuc mupie dân zinjuc bâtikie-jarewec: “Ñone râwiñnerâ ra juhapie zoañ gie bapa jahec â moc taramé norao mocwâc warenzepiñ.” Injuc jazame râwiñnembiñ.

⁶ Ehame ñicwofun Rehoboam e mamac-ticne Salomozi qâricne juhame ñicqizec ere maio fua jumbien jañe zinjuc mu wioc ejarewec: “Ñone ñic keci jañe dân weninjuc bâtikie-jarepemu i sâcne nazanzapiñ?” ⁷ Injuc wio-jareme jañe dân zinjuc bâtikiecnembiñ: “Go miñecgac ñic keci janjere kiñañ qaqa ehuc kiñañ qajarerâ dân

bâtikie-jarehuc dân biane jazacmuo ine jañe gore kiñañ qaqa erâ jurazihuc juniñmu.” ⁸ Eme Rehoboam e ñicqizec jañe dân âzâcnembiñ i qâsuhuc e jahacnehec fua sokac erâ ere maio fua jumbien ñicmotec i jañe mu indin ejarewec. ⁹ Ehuc zinjuc wio-jarewec: “Ñic keci jañe dân zinjuc nazambien: ‘Go mamacgezi fai-nâñecko tagi bâmâckehuc râewec i baafেকে-nârec.’ Eme irec okacne weninuc bâtikie-jarenante mungopien?” ¹⁰ Inuc wio-jareme e jahacnehec fua sokac embiñ ñicmotec i jañe zinjuc âzâcnembiñ: “‘Mamacgezi tagi bâmâmâcke-nârewec â goki ine baafেকে-nârezemec,’ ñic dân inuc gazambien jañe zinjuc jazazemec: ‘Memotec-nanere qâfoñe i mamac-nanere ombân sirickekac. ¹¹ Mamac-nanezi tagi bâmâmâcke-ñarewec â noni ine mocwâc fehuc bâmâmâcke-ñarepemu; mamac-nane e ñânârâczi bâtin-ñopawec â noni ine omegaqazi bâtin-ñopapemu.’ ”

¹² Ñicwofuñ e, “Zoan gie bapa jahec â moc tarame norao mocwâc warezepien,” inuc jazame râwinnembinthe Jeroboam â ñic sasawa jañe Rehoboamtao mocwâc fisimbiñ. ¹³ Fisipie ñicwofuñ e ñicqizec jañe dân âzâcnembiñ i qâsuhuc dân zocnehec bâtikie-jarewec. ¹⁴ Ehuc ñicmotec jañe dân mutâcnecnembiñ irec sâcko jazahuc zinjuc muwec: “Mamac-nanezi tagi bâmâmâcke-ñarewec â noni ine mocwâc fehuc bâmâmâcke-ñarepemu; mamac-nane e ñânârâczi bâtin-ñopawec â noni ine omegaqazi bâtin-ñopapemu.” ¹⁵ Ñicwofuñ e ñic jañere dân mi manawec. Wiac i Anutuzi Silonjic Ahia ecneme

Nebate ñokâ-ticne Jeroboam dân âzâcnewec i denkeme Wofun̄taonec okacne fisioc̄te in̄uc fuawec.

¹⁶ Eme Israe ñic jañe ñicwofun̄zi dânjen̄ic mi manawec i honerâ dân zin̄uc bâtikiecnembin̄: “Nâñe Dawidihec zuzuhuc-nâñec moc fokac me? Nâñe Isaire ñokârao wiac moc mi fonârekac.” “Ajoc, Israe ñicburen̄, nâñe boze- nâñec sâc rafârenan̄. Dawidire qâricfâc ñoñe ine ñañacne garikin̄ko sawa zâñe finzepien̄.” In̄uc murâ Israe ñic jañe boze-jen̄ic sâc râwin̄nembin̄. ¹⁷ Ehame sifu Rehoboam e Israe ñic Juda hae sâc jurambin̄ jañere ñicwofun̄ juwec. ¹⁸ Juku ñicwofun̄ Rehoboam e kin̄an̄ qaqa ñic jañere son̄an̄ Adoram soreme rame Israe ñic jañe qânâzi hehâmombin̄. In̄uc epie ñicwofun̄ Rehoboam e keretac-ticnao ferâ Jerusalem haeo wiseoc̄te zocne fârone ewec. ¹⁹ Israe ñic jañe Dawidire garikin̄fâc jañere manrân̄gen̄ bâfuambin̄zi bâfuahuc jun̄gopien̄ jaha. ²⁰ Jañe Jeroboamzi risiewec irec bin̄e manarâ tutuman̄ko hefârepie fisime ñicwofun̄-jen̄ic âkendân̄nembin̄. Ehuc jañeraonec moczi moc Dawidire garikin̄fâc jañerao mi qohotawec, Juda guru jañe sawa jañerao qohotambin̄.

²¹ Eme Rehoboam e Jerusalem haeo fisirâ Juda kikefun̄ â Benjamîn guruonec ñic zikafac 180 tausen̄ bâwosâec-joparâ Israe ñic jopahuc uuc-man̄ i Salomo ñokâ-ticne Rehoboam e jahacnao mocwâc bârisieoc̄te hetuman̄-jopawec. ²² Ehame Anuture dânzi kin̄an̄ñic-ticne Semajarao zin̄uc fuawec: ²³ “Go Salomore ñokâ Juda ñicwofun̄ Rehoboam â Juda â Benjamîn kikefun̄, erâ ñic ñokac

sasawa zĩñuc jazac: ²⁴ ‘Wofuñ e zĩñuc mukac: Nõñe Israe ñic soctofafâc-ñenñic jañehac qaqac enĩñte mi fenzeñen. Wiac zĩ nore micte fuakac irec ñic sasawa hae-ñenñic sâc râwĩñnenĩñ.’ ” Irece jañe Wofuñte dãn manahuc irec sâc hae-ñenñicko rambĩñ.

Jeroboamzi Israe ñic hehesicko jowac-jopawec

²⁵ Eme Jeroboam e Eferaim tiki mãrenko Sikem hae barâ ira juwec. Erâ irecnec rarâ Penuele hae bawec. ²⁶ Ehuc Jeroboam e manñezi zĩñuc man-asuwec: “Uucmanzi Dawidire garikinñâc jañerao mocwâc risieocmu ine. ²⁷ Eme ñic ñokac zĩ jañe Jerusalem haeo Wofuñte ufũñko taha bazo fenĩñmuo ine jañere manzi fekicne-ñenñic Juda ñicwofuñ Rehoboamtao risieme no nuhuc erao mocwâc qohotaniñmu.” ²⁸ Inuc murâ ñicwofuñ e gâcne jañehac muc manac erâ bulimakao motecne jajahec jahere hawari golzi bawec. Ehuc ñic ñokac zĩñuc jazawec: “Nõñe Jerusalem haeo damen zora fehuc jumbĩñ i sâccekac. O Israe ñic, nemu jahec-ñenñic Aigita mãrenkonec jowac-ñopa wefupic zĩ honec-jofaniñ.” ²⁹ Inuc murâ moc i Bete haeo heme domawec â moc ine Dañ haeo heme domawec. ³⁰ Ehame ñic ñokac jañe moc Bete haeo domawec ira rambĩñ â moc Dañ haeo domawec ira rambĩñ, inuc epie sâqorewec hâcne. ³¹ Erâ wâc furu mãrenko ufũñ bame ñerame ñic ñokac guruonec ñic tucne taha bapa âkendãn-jopawec jañe Lewi guruonec mãcne. ³² Erâ Jeroboam e mosa 8 irec zoañ gie bapa 15 ira, Juda mãrenko tiwâ bâzi fojujec, inucnea mume fuame alatao taha bâzi wiac rikewec. Wiac i Bete

haeo ehuc e jahac bulimakao motecnere hawari bacjofawec jahe taha bâzi rike-jactewec. Ehuc e jahac Bete haeo mârenj furu muwec ira taha bapa râec-jopa rawec. ³³ Erâ e jahac mosa bâwosâewec, mosa 8 irec zoan gie bapa 15 ira Bete haeo alata bawec ira rawec. Ehuc Îsrae ñic janjere tiwâ bâzi hombanj i mufirierâ hosâc âsu rikewec.

13

Juda mârenjkonec porofete moczi Jeroboam tutuc qacnewec

¹ Jeroboam e hosâc âsu rikeocte alata manfunjao domahame Anuture ñic moczi Wofunje micte Juda mârenjkonec Bete haeo fisiwec. ² Fisirâ Wofunje micte alatare dân muhuc kecziñuc muwec: “O alata, alata, Wofunji gore ziñuc mukac: ‘Manakic, Dawidire garikiñko motec moc fuaocmu zâñene Josia. Eki hâcne furu mârenje taha bapafâc gorao hosâc âsu rikeen̄gopien̄ jaje gore faio rikec-jopame ñic sieczi zâsen̄keocmu.’” ³ In̄uc murâ zoan̄ ijaha zuhuckerâ madân̄ moc kecziñuc muwec: “Wofunji madân̄ kecziñuc muwec: ‘Manakic, alata zi hetâtiehuc fainao zafe fokac i wâc hon̄kezo.’” ⁴ Eme ñicwofun̄ Jeroboam e, Anuture ñiczi Bete haeo alata ñewec irec dân owackehuc muwec i manarâ meticne fâretin̄nehuc kecziñuc muwec: “Rorâ basanan̄keniñ!” In̄uc muhuc Anuture ñictao meticne fâretin̄kewec i rân̄gen̄keme fâre suckeocte eipiewec. ⁵ Eme Anuture ñiczi Wofunje micte madân̄ muwec irec sâcko alatazi tâtiewec â alata faio zafe fowec i

wâc iŋuc jaha tâtiwec. ⁶ Iŋuc fuame ŋicwofuŋ e Anutire ŋic ziŋuc âzâcnewec: “Go nore erâ Wofuŋ Anutuge mu bâmiriŋ ecnehuc numucnetec menane mocwâc biankeoc.” Iŋuc mume Anutire ŋic e Wofuŋ wâsickewec. Wâsickehame ŋicwofuŋte mezi mocwâc biankerâ mârâc fowec irec sâc bâfuawec. ⁷ Eme ŋicwofuŋzi Anutire ŋic hefârehuc muwec, “Nore ficko rarâ ira ŋec domac enac, ehuc tofa bazu-garepe.” ⁸ Eme Anutire ŋiczi ŋicwofuŋ dâŋ ziŋuc bâtikiecnwec: “Go ficge dâkâne narezo mucmuo no sifu ficgao mi hefâpemu. Erâ no hae mâreŋ zira nânâ opâ mi nâpemu. ⁹ Wofuŋzi dâŋ ziŋuc hâcne muhuc mutâcne-narejec: ‘Go nânâ opâ mi nâzemec; erâ wâc hata waremec ijaha mi risiezemec.’” ¹⁰ Eme irec e Bete haeo fisiocete rawec, hata ijaha mi risiehuc hata mocko rawec.

¹¹ Eme Bete haeo porofete ranqa moc juwec. Ehame ŋokâfâcne jaŋe fisirâ Anutire ŋiczi Bete haeo wiac sasawa ebac ewec irec binaŋ bacnembiŋ. Erâ ŋicwofuŋ dâŋ âzâcnewec i wâc iŋuc jaha mamac-jeŋic âzâcnembiŋ. ¹² Âzâcnepie mamac-jeŋiczi wio-jarerâ muwec, “E hata weninucpec rajec?” Iŋuc wio-jareme ŋokâfâcne jaŋe, Juda mârenkonec Anutire ŋic fisiwec eki hata rawec i jâutumbiŋ. ¹³ Jâutupie ŋokâfâcne jazarâ muwec, “Dongio sate henarenin.” Iŋuc mume sate hecnepie ferâ rawec. ¹⁴ Anutire ŋic bâjâperâ raku borinjac mocte fuŋnao ŋehame bâfuarâ wiocnehuc muwec, “Anutire ŋic Juda mârenkonec fisijec i go hâcne me?” Wiocneme muwec, “No hâcne zi.” ¹⁵ Iŋuc mume âzâcnerâ muwec, “Nohec ficko

rarâ nânâ piticne nâc.” ¹⁶ Inuc âzâcneme dân zĩuc bătikiēcnewec, “No gohec mocwâc sâcne mi risiepemu, â mârenj zĩra nânâ opâ wâc mi nâpemu. ¹⁷ No zĩra nânâ opâ mi nâpemurâ me hata warepo ijaha mi risiepemurâ Wofunje dânzi nazakac.” ¹⁸ E inuc mume zĩuc âzâcnewec: “No wâc go inucne porofete jukopac, ehame Wofunje mĩcte anelo moczi zĩuc muhuc nazajec: ‘Go b̃arisietec figao warerâ nânâ opâ nâzejec.’ ” Erâ e inuc muhuc eatuckewec. ¹⁹ Eatuckeme ehēc ficticnao rarâ nânâ opâ nâwec.

²⁰ Eme jahe teboo ñehapire Wofunje dânzi jowame risiepic porofete hae rune erao fuawec. ²¹ Eme Anuture ñic Juda mârenjkonec fisiwec e owackecnehuc muwec, “Wofun e zĩuc mukac: ‘Wofun Anutugezi mutâcne-garejec sâcmutâc i mi renjkehuc ²² risierâ nânâ opâ nâkomec. Ehuc hae mârenj zĩra wĩac i mi ecmurâ dân zĩuc gaza-wec i qâsuakomec: “Go nânâ opâ mi nâzemec.” Irec qânqângezi mamacfâcge janjere zânjerunjo mi fozejec!’ ” ²³ Eme nânâ nâpire tarame porofete jowame risiepic ere donji sate hecnewec. ²⁴ Eme porofete e rahame hatao laionj moczi fisi bâfuârâ kihâmowec. Kihâmome qânqân-ticne hatao foha donji â laionj jahe qâterâ ñifec â ñifec domapic. ²⁵ Ehame ñic janje hata ira fotâcnehuc qânqân hatao fohame laionzi qâterâ gâjonje ñifec domame honembinj. Ehuc porofete ranqazi hae juwec ira fisirâ ñic dân binanj ejarembinj.

²⁶ Ehame hatao b̃arisiewec porofete eki dân i manarâ muwec, “I Anuture ñic Wofunje dân qatarajec e hâcne. E Wofunzi dân âzâcnewec

irec sâcko laiontao râeme kisuc qâsuckehuc kihâmojec.” ²⁷ Inuc murâ nokâfâcne zinjuc jazawec: “Dongio sate henarenij.” Mume injuc embij. ²⁸ Eme e rarâ qânqân hatao fome dongi â laion jahe njfec â njfec domahapire bâfuawec. Erâ laion e qânqân i mi nâwec â dongi wâc ki qâsuc wiac moc mi ecnewec. ²⁹ Eme porofete e Anuture njcte qânqân i dongi faio râerâ ki songân ehuc duckeninje haeo mocwâc bârisiewec. ³⁰ Ehuc qânqân i e jahacne zânerunjo duckerâ zinjuc muhuc kiombij: “Opon, qomânâjec.” ³¹ Eme njc e duckerâ nokâfâcne keczinuc muhuc jazawec: “Juku hâmope Anuture njc duckengopenen zânerun ijaha ducnunzepien; siec-nane i ere siec njfecnao râenzepien. ³² E Wofunje micte Bete haeo alata njekac â Samaria hae sâc ira furu mârenjo ufun njrakac irec dân muwec i juku jâmbomac fârio qafâreocmu.”

³³ Wiac injuc fuame Jeroboam e sifu hata-ticne hehesicnaonec moc mi risiewec. E njc nokac guruonec njc tucne rocjoparâ furu mârenje taha bapa mocwâc âkendân-jopa rawec. Ehuc njc i me i gie irec sâc embij jaje rocjoparâ furu mârenje taha bapa âkendân-jopawec hâcne. ³⁴ Eme wiac izi Jeroboam kikefunfâc-ticne janjao hehesic ewecte mârenje faio juju-jenjc omaeocle sâc ewec.

14

*Ahiazî Jeroboamte findanđân muwec
(Bin II 12:1–16)*

¹ Eme damen ira Jeroboamte ñokâ Abia e huc bawec. ² Eme Jeroboamzi ñonân-ticne âzâcnerâ muwec, “Ajoc, go hawarige hetikietec ñic jañe honecgurâ, e Jeroboamte ñonân inuc mi mana taranzeppen; ehame Silo haeo razemec. Manakic, noni ñic ñokac zi qañen-jopapemurâ muwec, porofete Ahia e hae ira hâcne jukac. ³ Irec go poron 10 añacne gâcne, erâ bañac zopo moc inuc rorâ erao razemec. Eme eki motec zi erao wemo wiac fuaocmu i gazazejec.”

⁴ Eme Jeroboamte ñonân e inuc erâ fahare Silo haeo rarâ Ahiare ficko fisiwec. Ahia e ñicqizec jâmbân ewec, irec zâñe-ticne mâtenkeme sâcne mi fiwec. ⁵ Eme Wofunzi Ahia zinuc âzâcnawec: “Manakic, Jeroboam ñonân-ticne e ñokâ-ticnere erâ go mu wioc egareocte fisikac. Ñokâ-ticne e huc bame fokac; irec go dân inuc â inuc bâtikiecnemec.”

Eme ñokac e fisirâ hawari-ticne hetikieme ñokac moc tinac ewec. ⁶ Ehuc motâcko fisime Ahiazi kike fânân-ticne manarâ muwec, “Jeroboam ñonân-ticne go wefuc. Go wemocte eeatucnukomec? No gore biñedân ñemâcne nare-kicne bajukopac. ⁷ Go rarâ Jeroboam âzâcnec, ‘Israere Wofun Anutu e zinuc mukac: “Noni hâcne ñic jañeraonec bafaharecguhuc Israe ñicfâc-nane jañere micne bapa jucmurâ âkendângupo. ⁸ Ehuc uucmañ i Dawidire garikinfâc jowac rorâ go garepo. Go ine kiñanñic-nane Dawidizi sâcmutâc dânane reñkerâ manticnezi bâjâpecnuhuc zâñe mai-naneo wiac fâretin jaha ebac ewec irec sâc mi eekic. ⁹ Ehuc qâsorierâ gore juwicnao

juwarembiŋ jaŋe siric-jopahuc hehesic repicne erâ nemu gâcne bâfuac-jopahuc qâŋ qâqâtâc barâ râpecnuhuc kimbenj bâfua-nareekic. ¹⁰ Irec go ziŋuc manac: No kikefunḡao wiac repicne bâfuahuc ŋic moczi jawa wiac zocko râeme zaku zâtâmireekac irec sâc Israe kikefunḡkonec garikinḡâcge ŋic sasawa rambaŋ â niŋgiŋko fua-kicne jaŋe omaec-jopa-fârepemu. ¹¹ Wofunḡzi muwecte kikefunḡaonec hao hâmoniŋmu jaŋe qâto jaŋe nâcjopaniŋmu, â gieo hâmoniŋmu jaŋe ine wipe jaŋe nâcjopaniŋmu.” ’ ¹² Irec go faharerâ ficḡao rac. Eme hao fisitec izia motec e hâmoocmu. ¹³ Ehamo Israe ŋic jaŋe ki mamakuc ehuc duckeniŋmu. Israere Wofunḡ Anutuzi Jeroboamte kikefunḡko e honeme sâckekacte eki sawa zâŋeruŋko foocmu. ¹⁴ Erâ Wofunḡ e ziŋuczia Israe ŋic jaŋere ŋicwofunḡ moc âkendânne eki Jeroboamte kikefunḡ omaec-jopaocmu. Erâ damenḡ zi funḡerâ ¹⁵ mânânzi saporac rome qiriŋ qækac irec sâc Wofunḡzi Israe ŋic jopaocmu. Ehuc apa ŋosafâc-jeŋic mârenḡ jarewec, mârenḡ bianḡ zirecnec Israe ŋic unuc-jopaocmu. Jaŋe Asera nemuqânḡ bahuc Wofunḡ kimbenj bâfuacnembiŋte bâtâtiec-jopame Eufurata opâ ocniŋucnao siŋsaŋ qarâ juniŋmu. ¹⁶ Jeroboam e hehesic bâfuahuc Israe ŋic ejareme hehesic jaha bâfuambiŋte Wofunḡzi Israe ŋic râpec-jopa sanaŋkeocmu.”

¹⁷ Eme Jeroboam ŋonân-ticne e faharerâ raku Tiriza hao fisiwec. Erâ ficmotâcko fisihamo izia motec e hâmowec. ¹⁸ Hâmome Israe ŋic jaŋe Wofunḡzi kiŋaŋŋic-ticne porofete Ahirao dânḡ muwec irec sâcko e duckehuc ki mamakuc

embiñ. ¹⁹ Eme Jeroboamzi wiac sasawa ebac ewec â zika qawec erâ ñicwofuñ juwec irec binan i Israe ñicwofuñ janere Binan Qâhâc papia qizecko qârenke-fârekicne. ²⁰ Erâ Jeroboam e jara 22 ñicwofuñ juwec. Eme e apa ñosafâcne janerao zuhuckehuc hâmomme ñokâ-ticne Nadabazi tuc-ticne qarâ ñicwofuñ juwec.

Rehoboamzi ñicwofuñ juwec

²¹ Ehame Salomo ñokâ-ticne Rehoboam e Juda mârenko ñicwofuñ juwec. E jara 41 bazurâ funkerâ ñicwofuñ ehuc Jerusalem haeo jara 17 juwec. Hae i Wofuñ e jahac zâñe-ticne ira foocte Israe guru sasawa janeraonec rowosâewec. Eme Rehoboam nen goc-ticne i Amon ñokac, zâñene Nama. ²² Eme Juda kikefuñ jâne Wofunte zâñe faio wiac repicne ehuc hehesic embiñ i apa ñosafâc-jen ic jâne embiñ irec sâc sirickerâ ehuc Wofuñ manbâñ ecnemie kimben-ticnere zoqac faharewec. ²³ Jâne wâc inuc jaha furu mâren â qânwâtun â Asera nemuqân barâ furu mârenko â jâcsâkore funnao herambin. ²⁴ Erâ mâren ira sasec ñic wâc juhuc boe sau gie bambin. Jâne wiac mamakâcne ebac embiñ i Israe ñic jâne mâren ira razininthe Wofunzi ñic gurune gurune jopa jâpec ejarewec janere eebapa hâcne.

²⁵ Eme Rehoboam e ñicwofuñ jume jara memoc eha Aigita ñicwofuñ Sisakazi Jerusalem hae râsi rocnehuc fisiwec. ²⁶ Ehuc Wofuñ ufun-ticnere zenan â ñicwofuñ ficticnere zenan erâ wâc wiac gâcne sasawa i mâmâc bawise-fârewec. Erâ Salomo e golzi maro bawec i wâc inuc jaha bawisewec. ²⁷ Ehame ñicwofuñ Rehoboam e

irec okacne aen bâbâronzi maro barâ momori funfunfâc-ticne janere micnefâc ñicwofuñ ficticnere motâc soŋaŋkehuc domambiñ jañe jarewec. ²⁸ Eme ñicwofuñ e Wofuñte ufunko razi jujec sâc momori funfunfâc-ticne jañe maro i rorâ bâjâpe jumbienj. Ehuc bârisierâ momori funfunfâcne janacne ficko râepie ñejujec.

²⁹ Eme Rehoboamzi wiac sasawa ebac ewec irec binañ i Juda ñicwofuñ janere Binañ Qâhâc papia qizecko qârenke-fârekicne. ³⁰ Eme Rehoboam â Jeroboam jaherao zikazi sueme sue fo wefuwec. ³¹ Juku Rehoboam e apa ñosafâcne janerao zuhuckehuc hâmome jañe fombiñkoa Dawidire hae qizecko duckembiñ. E nengoc-ticne i Amonj ñokac, zâñene Nama. Ehame ñokâ-ticne Abiamzi tucticne qarâ ñicwofuñ juwec.

15

Abiamzi ñicwofuñ juwec (Bin II 13:1–22)

¹ Nebatere ñokâ Jeroboam e ñicwofuñ jume jara 18 eha Abiamzi funkerâ Judanj qanenj-jopahuc ñicwofuñ ewec. ² Ehuc Jerusalem haeo jara jahec â moc juwec. E nengoc-ticne i Abisalomte otâ, zâñene Maka. ³ Abiam e juwicnao mamac-ticnezi hehesic sasawa ebac ewec ijaha bâjâpewec. Ehuc apa-ticne Dawidire manzi fowec irec sâc Abiamte manzi Wofuñ Anutu-ticnerao hâcbuc jâmbâj mi fowec. ⁴ Ehame ine sifu Wofuñ Anutu-ticnezi Dawidire erâ Jerusalem haeo tatamac moc râcnehuc ere faicnao ñokâ-ticne âkendânnewec, ehuc Jerusalem hae basanañkewec. ⁵ Dawidi e

mi qâsoriehuc juwec sâc Wofunzi wiac sasawa mutâcnecnewec i zâŋe fai-ticnao ebac efârewec hâcne. Mâc, Hitin̄ic Uriarao sawa wiac eme sifuckewec. ⁶ Abiam e juhame Rehoboam â Jeroboam jahe qaqac ehuc jupic. ⁷ Eme Abiamzi wiac sasawa ebac ewec irec binan̄ i Juda ŋicwofun̄ jan̄ere Binan̄ Qâhâc papia qizecko qâren̄ke-fârekicne. Eme Abiam â Jeroboam jahe qaqac ehuc jupic jaha. ⁸ Eme Abiam e apa ŋosafâcne jan̄erao zuhuckehuc hâmome Dawidire hae qizecko duckembin̄. Ehame ŋokâ-ticne Asazi tucticne qarâ ŋicwofun̄ juwec.

*Asazi ŋicwofun̄ juwec
(Bin II 14:1–5; 15:16–19)*

⁹ Jeroboam e Israe ŋic jan̄ere ŋicwofun̄ jume jara 20 eha Asazi fun̄kerâ Judan̄ic qan̄en̄-jopahuc ŋicwofun̄ ewec. ¹⁰ Ehuc Jerusalem haeo jara 41 ŋicwofun̄ juwec. E mimi-ticne i Abisalom otâ-ticne, zâŋene Maka. ¹¹ Eme Asa e apa-ticne Dawidizi ewec irec sâc jaha ehuc Wofun̄te maio wiac sasawa etiŋne-fârewec. ¹² Ehuc mâren̄ ira sasec ŋic boe sau gie bahuc jumbin̄ jan̄e bârâriec-jopawec, erâ mamac-ticnezi qân̄ qâqâtâc barawec, i wâc in̄uc jaha bârârie-fârewec. ¹³ Erâ Asa e mimi-ticne Makazi Asera nemure qân̄ qâqâtâc repicne barâ bajuwecte eki ŋokac wofun̄ mi juocte bârâriewec wâc. Ehuc qân̄ qâqâtâc-ticne i hetâc qâtâcnerâ Kidoron̄ opâo rikewec. ¹⁴ Erâ furu mâren̄ ine mi bârâriewec. Erâ sifu man̄ticne i hâcbuc jaha Wofun̄tao râeme fowec. ¹⁵ Erâ e mamac-ticnere â e jahacne

taha bâtirikicne siliwa â gol â râqâc wiac i bafisi Wofunŧe ufunŧko râewec.

*Asa â Benhada jahe zâzâfic epic
(Bin II 16:1–14)*

¹⁶ Asa â Israe ŃicwofuŃ Basa jahe jupic sâc ŋonden-jekicko zika fuahuc fowec. ¹⁷ Eme Israe ŃicwofuŃ Basa e JudanŃic râsi rojarehuc ferâ Rama hae bawec. E ŋic i me i moczi Juda ŃicwofuŃ Asarao rac warec mi eniŋte iŋuc ewec. ¹⁸ Eme Asa e WofuŃ ufun-ticnere kânŋko â ŃicwofuŃ ficte kânŋko siliwa â gol gâcne fowec i rorâ kiŋanŋ qaqaŋcne jarewec. Erâ Taberimonŧe ŋokâ Siria ŃicwofuŃ Benhada, Hezionŋ ŋosa-ticne hâcne, e Damasko haeo juhame kiŋanŋ qaqaŋcne dân ziŋuc jazahuc erao sorec-jopawec: ¹⁹ “Mamac jahec-nâhec jaherao zâzâfic fowec irec sâc nâhâc zâzâfic moc bâfuazeperec. Irec no bubianŧe wiac siliwa â gol râe-garekopac i honezemec. Erâ go rarâ Israe ŃicwofuŃ Basahec zâzâfic-ŋekic fokac i hetâcnezemec. Iŋuc etec no behecnuzejec.”

²⁰ Iŋuc mume Benhada e ŃicwofuŃ Asare dân manarâ Israe hae râsi rojareninŧe momorifâcne janere micne sorec-jopawec. Eme janŧe rarâ hae ziŋuc ro rauc embiŋ: Ijonŋ, Danŋ, Abe-Bete-Maka, erâ Kinerote mârenŋ â Naftali mârenŋ sa-sawa i mâmâc. ²¹ Eme Basa e biŋe i manarâ Rama hae bahuc juwec i beherâ Tiriza haeo ra juwec. ²² Ehame ŃicwofuŃ Asa e ŋic moc mi hetiric-jopahuc dân musaweme Juda mârenŋ sâcke-fârewec. Eme janŧe Basazi Rama hae bahuc qânâ â katapa rome fewec i ropie rawec. Rame ŃicwofuŃ Asa e wiac izi Benjaminŋ mârenŋko Geba

hae â Mizipa hae bawec. ²³ Eme Asazi wiac sasawa ebac ewec â tâpiri-ticnere funje, erâ hae barawec irec binan i Juda ñicwofun janjere Binan Qâhac papia qizecko qârenke-fârekicne. Juku Asa e ñicqizec jâmbân ehame kike jahecne demba qawec. ²⁴ Eme Asa e apa ñosafâcne janjerao zuhuckehuc hâmome jaje fombinjoa apa-ticne Dawidire hae qizecko duckembin. Ehame ñokâ-ticne Josafatazi tucticne qarâ ñicwofun juwec.

Nadabazi ñicwofun juwec

²⁵ Asa e Juda ñicwofun jume jara jajahec eha Jeroboamte ñokâ Nadabazi funkerâ Israe ñic qanjen-jopahuc ñicwofun juwec. Ehuc jara jajahec Israe ñicguru ñicwofun ejarewec. ²⁶ Erâ mamacticnezi Israe ñic ejareme hehesic bâfuambin hata i bâjânehuc Wofunje zâje faio wiac mamakâcne ewec.

²⁷ Nadaba â Israe ñic jaje Filisa ñic janjere hae moc zâjene Gibeton i somâckehuc fohapie Isasa kikefunkonec Ahiare ñokâ Basazi râsi rocnehuc fisirâ qâhâmowec. ²⁸ Asa e Juda ñicwofun jume jara jahec â moc eha Basazi Nadaba qâhâmorâ ere okacne ñicwofun ewec. ²⁹ E ñicwofun ehuc izia Wofunzi kinan-ñic-ticne Silo haeonec Ahiaaro dân muwec irec sâcko Jeroboamte kikefun sasawa jopa-fârewec. E wiac jujune moc mi akic-jopahuc zenjoma jopa miziewec hâcne. ³⁰ Wiac i Jeroboamzi hehesic bâfuahuc Israe ñic ejareme ijaha embin irec mecne â Israere Wofun Anutu aaric bâfuacnewec irec erâ mâmâc inuc fuawec.

³¹ Eme Nadabazi wiac sasawa ebac ewec irec binan i Israe ñicwofun janjere Binan Qâhac papia

qizecko qârenke-fârekicne. ³² Eme Asa â Israe ñicwofuñ Basa jahe jupic sâc qaqac ehuc jupic.

Basazi ñicwofuñ juwec

³³ Asa e Juda ñicwofuñ jume jara jahec â moc eha Ahia ñokâ-ticne Basazi funkerâ Israe ñic janere ñicwofuñ ehuc Tiriza hao juwec. E ñicwofuñ juhame jara 24 tarawec. ³⁴ E Jeroboamzi hata hehesicne âtehuc Israe ñic ejareme hehesic jaha bâfuambiñ i hâcne bâjâpehuc Wofunje zâñe faio wiac mamakâcne ewec.

16

¹ Eme irec Basare erâ Wofunje dânzi Hananire ñokâ Jehurao zinjuc fuawec: ² “No rufeman̄konec bafaharecgurâ Israe ñicfâc-nane janere micne bapa jucmurâ âkendângupo. Goki ine Jeroboamte hatao rahuc Israe ñicfâc-nane janere hehesic bâfuapie hehesic-jen̄ic izi no kimben̄ bâfua-nareocte qafen̄-jopamen̄. ³ Manakic, no Nebate ñokâ-ticne Jeroboam ere kikefun̄ ejarepo irec sâc jaha gore kikefun̄ hetâtjepemu. ⁴ Eme Basa gore kikefun̄konec ñic e me e hao hâmoocmu ere qânqân̄ i qâto janere nânzepien̄ â gore kikefun̄konec jaha ñic moc kâteo me ira me ira hâmoocmu ere qânqân̄ i wipe janere nânzepien̄.” ⁵ Eme Basazi wiac sasawa ebac ewec â tâpiri-ticnere fun̄ne i Israe ñicwofuñ janere Binañ Qâhâc papia qizecko qârenke-fârekicne. ⁶ Eme Basa e apa ñosafâc-ticne janerao zuhuckehuc hâmome Tiriza hao duckembiñ. Ehame ñokâ-ticne Elazi tucticne qarâ ñicwofuñ juwec. ⁷ Eme Basa e Jeroboamte kikefun̄ janere sâc jaha

ehuc meticnezi wiac bâfuawec ira qohotahuc Wofunṭe zâṇe faio wiac repicne ewec, ehuc kimbeṇ bâfuacnewec â Jeroboamte kikefunṭâc jopa miziewec, irec erâ e jahacne â garikinṭâcne jaṇere dân i Wofunṭi Hananire ṇokâ porofete Jehu ere micko mocwâc râewec.

Elazi ṇicwofun juwec

⁸ Asa e Juda ṇicwofun jume jara 26 eha Basa ṇokâ-ticne Elazi funṭerâ Israe ṇic jaṇere ṇicwofun ehuc Tiriza haeo juwec. E ṇicwofun juhame jara jajahec tarawec. ⁹ Ehame keretacṭâcne gâcne irec micne kiṇaṇ qaqa-ticne Ẓimirizi doc bahuc râsi rocnewec. Eme Ela e Tiriza haeo ficte micne Arazare ficko opâ sanaṇ nâku maṇne bibiriwawec. ¹⁰ Ehame Ẓimirizi fisirâ qâhâmorâ ere okacne ṇicwofun ewec. Wiac i Asazi Juda ṇicwofun jume jara 27 eha inṭuc fuawec.

¹¹ Ẓimiri e ṇicwofun eri ṇeṇeo funṭerâ ṇehuc izia Basare kikefun jopa-fârewec. E Basare soctofâc me âgofâc-ticne jaṇeraonec ṇic moc mi akickewec. ¹² Ẓimiri e inṭuc ehuc Wofunṭi Basare dân porofete Jehure micko râeme muwec irec sâcko jopa miziewec hâcne. ¹³ Erâ i Basa â ṇokâ-ticne Ela jahe hehesic ehuc Israe ṇic ejarepire hehesic jaha bâfuahuc qâṇ qâqâtâc barâ Israere Wofun Anutu kimbeṇ bâfuacnembeṇ irec erâ inṭuc fuawec. ¹⁴ Eme Elazi wiac sasawa ebac ewec irec binan i Israe ṇicwofun jaṇere Binan Qâhâc papia qizecko qâreṇke-fârekicne.

Ẓimirizi ṇicwofun juwec

¹⁵ Asa e Juda ṇicwofun jume jara 27 eha Ẓimirizi Tiriza haeo 3oṇ gie bapa 7 ṇicwofun juwec.

Ehame momori guru jañe Filisa ñic jañere hae moc zâñene Gibeton i somâckehuc teuñ âtembiñ. ¹⁶ Eme teuñko momori guru jumbiñ jañe dân zîñuc mupie manambiñ: “Ñimiri e ñicwofuñ doc bahuc qâhâmojec.” Dân iñuc manarâ Israe ñic jañe damen ijaha teuñkoa momori jumbiñ jañere micne zâñene Omiri e Israe ñicwofuñ âkendânñembiñ. ¹⁷ Eme Omiri â Israe ñic jañe Gibeton haeonec ferâ Tiriza hae somâckembiñ. ¹⁸ Ehame Ñimiri e hae rombiñ i honerâ ñicwofuñte ficsanañko razirâ fic i zoczi turuñkeme zahuc e jahacne mâmâc zâhâmowec. ¹⁹ E hehesic-ticne ebac ehuc Wofuñte zâñe faio wiac mamakâcne erâ Jeroboamte hatao rawec, ehuc Israe ñic ejareme hehesic bâfuambiñ irec erâ iñuc fuacnewec. ²⁰ Eme Ñimirizi wiac sasawa ebac ewec â Ela doc bawec irec binañ i Israe ñicwofuñ jañere Binañ Qâhâc papia qizecko qârenke-fârekicne.

Omiriti ñicwofuñ juwec

²¹ Ehame Israe ñic jañe fâuckerâ guru jajahec embiñ: Ñic ñokac dâkâne jañe Ginatire ñokâ Tibani ñicwofuñ âkendânñeniñte e bâjâpemiñ â dâkâne moc jañe ine Omiri bâjâpemiñ. ²² Eme Omiri bâjâpemiñ jañe Ginatire ñokâ Tibani bâjâpemiñ jañe sanañkerâ bawahac-jopambiñ. Eme Tibanizi hâmomme Omiriti ñicwofuñ ewec. ²³ Eme Asa e Juda ñicwofuñ jume jara 31 ehame Omiriti fuñkerâ Israe ñic jañere ñicwofuñ ewec. Erâ ñicwofuñ gie bahuc juhame jara 12 tarawec. Eme jara 6 i Tiriza hao ñicwofuñ juwec. ²⁴ Ehuc Samaria tiki i Semeriraonec siliwa monen ñemâc-ticne 200 izi furine bawec. Erâ tiki ira

hae sacsanañ-ticnehec bawec irec zâñe i tiki rune Semeri ere wase bahuc Samaria muwec.

²⁵ Omiri e juwicnao ñicwofuñ juwarembiñ jañe siric-jopahuc Wofunñe zâñe faio wiac mamakâcne ewec. ²⁶ E Nebatere ñokâ Jeroboamzi hata hehesicne âtehuc Israe ñic ejareme hehesic jaha bâfuahuc qâñ qâqâtâc-jenñiczi Israere Wofuñ Anutu kimbenñ bâfuacnemiñ hehesic ijaha bâjâpewec. ²⁷ Eme Omirizi wiac sasawa ebac ewec â tâpiri-ticnere funñe jowatuwec irec binanñ i Israe ñicwofuñ jañere Binañ Qâhâc papia qizecko qârenñke-fârekicne. ²⁸ Eme Omiri e apa ñosafâc-ticne jañerao zuhuckehuc hâmom Samaria haeo duckemiñ. Ehame ñokâ-ticne Ahabazi tucticne qarâ ñicwofuñ juwec.

Ahabazi ñicwofuñ juwec

²⁹ Asa e Juda ñicwofuñ jume jara 38 ehame Omiri ñokâ-ticne Ahabazi funñerâ Israe ñic jañere ñicwofuñ ewec. Omiri ñokâ-ticne Ahaba e inuc ehuc jara 22 Samaria haeo juhuc Israe ñic ñicwofuñ ejarewec. ³⁰ E juwicnao ñicwofuñ juwarembiñ jañe siric-jopahuc Wofunñe zâñe faio wiac mamakâcne ewec. ³¹ Ehuc maname afeckeme Nebate ñokâ-ticne Jeroboamte hehesic hatao rawec. Ehuc Sidonñ ñicwofuñ Etebali ere otâ, zâñene Isebe, e ñonânñ-ticne rowec. Ehuc rarâ Baali nemu dapecnehuc kiñanñ qacnewec. ³² Erâ Samaria haeo e jahac Baali nemure ufunñ bawec irec mañnao alata moc bawec. ³³ E sueme sue wiac inuc ehuc ere juwicnao Israe ñicwofuñ juwefumbiñ jañere sâc jâuruwec, ehuc Israere Wofuñ Anutu kimbenñ bâfuacnewec. ³⁴ E juhame

Bete haeonec ñic moc zâñene Hiele eki Jeriko hae bawec. Ehuc haesacte hobetenj râehame mârâc ñokâ-ticne Abiramzi hâmowec, â sac batarahuc motâc âkendânñeme zâhec ñokâ-ticne Segubuzi hâmowec. Wiac i Nunte ñokâ Josuazi Wofunte micdânj muwec irec sâcko fuawec.

17

Eliazi zoañ sanaj qaocmu irec findandânj muwec

¹ Gileade mârenko Tisibe hae ñewec irecnec ñic moc zâñene Elia eki Ahaba zinjuc âzâcnewec: “Wofunj Israere Anutu, mai-ticnao no domakopac e jujâmbânkekeacte jarane jarane titikuc me hoe moc mi wahazejec. Mâc, noni mupe ine wahaocmu.” ² Ehame Wofunte dânzi Eliarao zinjuc fuawec: ³ “Mârenj zi beherâ zoañ wewefuopec rac, erâ opâ pitic moc zâñene Keriti, zoañ wewefunaonec ware Jordanjo hukac, ira sonkezemec. ⁴ Opâ i fia nâc ehuc juzemec, eme nânâ ine kêec kêec jaje bafisi garehuc juninje mupanke-jarepac.” ⁵ Eme e rahuc Wofunzi mutâcnecnewec irec sâcko ewec: Ra opâ pitic Keriti zoañ wewefunaonec ware Jordanjo hukac, ira ñec juc ewec. ⁶ Eme kêec kêec jaje furicte poronj â qowi bafisi râcnehuc jumbinj â opâ ine fia nâc ehuc juwec. ⁷ Eme hae mârenj sâc hoe moc mi hewecte opâ i piticne fofeku zickewec.

⁸ Eme Wofunte dânj moc ra bâfuawec ine zinjuc: ⁹ “Ajoc, fahare Zarefati hao rac, i Sidonj irec hae pitic moc, erâ ira ñec juc ezemec. Manakic, no hae irec ñokac hozec moc nânâ gumecguocte

mupaŋkecnepac.” ¹⁰ Inuc âzâcneme faharerâ Zarefati hao rawec; rarâ haesac motâcko fisirâ honewec: Ñokac hozec moc jâc haharine nusehuc juwec. Eme wiracnerâ muwec, “Opâ moc râqâcko fiarâ baware narec nâpe.” ¹¹ Raha rahame mocwâc wirarâ muwec, “Poronj dâkâne mac moc mâmâc bawarezemec.” ¹² Eme dânj zinjuc bâतिकecnewec: “Wofuñ Anutugere maio mukopac, wiac zakicne moc mi fonarekac, poronj uucne kuzio ñenarekac ine me mocjahazi roronerê sâc, erâ kiruŋko wokemaŋ kasaŋne mac ñekac, injuc sawa. Zine hâcne zoc haharine nusekopac i ficko bararâ ruqepe zame motecnanehêc nâhere poronj rikepemu. Eme i sawa nârâ ñeku hâmonacmu.”

¹³ Eme Eliazi âzâcnewec, “Mi hâwicguoc, figao rarâ mukomec injuc ezemec. Qanaŋ ine nore poronj piticne mac moc rikerâ baware naretêc nâzepac, ehame zâhêc motecgehêc ñahacne rike bâmoc ezemec. ¹⁴ Wofuñ, Israe ere Anutu, e zinjuc mukac: Poronj kuzio ñekac i mi qosackeocmu, â wokemaŋ kiruŋko ñekac i mi zickeocmu, tiwâne ñehuc jaha juhame Wofuñzi mume mârenko hoe hezokac.” ¹⁵ Eme e rarâ Eliazi muwec sâc ewec. Eme Elia mecne, ñokac mecne â wiacfâcne mecne, dameŋ zora nânâ mi basambiŋ. ¹⁶ Kuzio poronj mi qosackewec â kiruŋko wokemaŋ mi zickewec, Wofunje dânj Eliare mickonec wahawec i sanaŋkewec hâcne.

¹⁷ Eme irec faicnao ñokac fic rune ere ñokâ e huc bawec. Erâ huc boc ñemâckecneme jujunere sâc mi ewec. ¹⁸ Eme ñokac e Elia zinjuc muhuc

âzâcnewec: “O Anuture ŋic, go wemocte râsi enarekomec? Go kiŋ bahac-nane manasupemurâ â ŋokâ-nane ecnetec hâmoecte fisimec hâcne!”
¹⁹ Inuc mume Eliazi âzâcnewec, “Ŋokâge narec.” Inuc murâ neŋgoc-ticnere qickonec rorâ ficmaŋ faic e jahac fohuc juwec ira baferâ e jahacne fofoo râeme fowec. ²⁰ Fohame Wofuŋ ziŋuc muhuc wâsickewec: “O Wofuŋ Anutu-nane, no zira ŋokac hozec ehec jaba juhape go jâmbomac ŋokâ-ticne qahuc wiac qeŋ bipinehec zi bâfuakomec.” ²¹ Inuc murâ motecte faio arec jahec â moc waha foc fa-hac erâ ziŋuc muhuc Wofuŋ wâsickewec: “O Wofuŋ Anutu-nane, go motec zirec qâqâtac mocwâc bârisiec.” ²² Inuc numume Wofuŋzi Eliare dân manawec. Ehamē motecte qâqâtâczi mocwâc risieme qârewec. ²³ Eme Eliazi motec rorâ ficmaŋ faic irecnec bawaharâ neŋgoc-ticne râcnehuc muwec, “Honekic, ŋokâge jukac.” ²⁴ Eme ŋokaczi Elia âzâcnehuc muwec, “Go Anuture ŋic â micgao dân fokac i Wofuŋte dân fârīne i miŋecgac mana tarakopac.”

18

Eliazi Ahabarao risiewec

¹ Juku jara jahec â moc eha Wofuŋte dânzi Eliarao ziŋuc fuawec: “Go rarâ Ahaba fuac-nezemec. Eme mupe mâreŋko hoe mocwâc heocmu.” ² Inuc mume Elia e Ahaba fuacneocte rawec. Samaria mâreŋko ine roroc qanqan jâmbân fuarâ fowec. ³ Irec Ahaba e ficticnere micne Obadia hefârewec. Obadia e Wofuŋ araŋ boc bacnehuc juwec. ⁴ Irec Isebezi

Wofun̄te porofetefâc qâhâmoc-jopame Obadia e porofete 100 rocjoparâ bâfâuc-jopame 50 guru jajahec epie qânâ hawecko sonjoparâ nânâ opâ gumec-jopahuc juwec. ⁵ Eme Ahabazi Obadia ziñuc âzâcnewec: “Nâhâc mâren̄ sasawa opâ zâñe â opâwâc forakac i âte-fârezeperec. Ehuc kecqañ wiac moc bâfuanacmuo ine becâsic â don̄gifâc-nâhec jañe sipiricken̄zipiñte bafic-jopazeperec.” ⁶ In̄uc murâ mâren̄ âtenicte bâfâuckepic, ehuc Ahaba e ñifec raha Obadiazi ñifec rawec.

⁷ Eme Obadia e hatao rahame Eliazi bâfuawec. Bâfuame Obadiazi hone tarahuc zâñe maine mâren̄ko hetutuckerâ muwec, “Bombon̄-nane Elia, i go gahac me?” ⁸ Wiocneme muwec, “I no nahac hâcne. Irec go rarâ bombon̄ge ziñuc âzâcne: ‘Manakic, Elia e fisijec.’” ⁹ In̄uc mume Obadiazi muwec, “Kiñañ qaqage no wemo hehesic bâfuapo irec Ahabazi nuoc̄te ere meo râecnukomec?” ¹⁰ Wofun̄ Anutuge e jujâmbân̄kekac, irec bombon̄-nanezi go basacguniñte ñicguru me uucmañ ira me ira kiñañ sorec-jopawec. Sorec-jopame jañe wio-jarepie mumbiñ, ‘E zira mi jukac.’ In̄uc mupie ine ñicwofun̄zi uucmañ me ñicguru i jañe ejareme mi bâfuacgumbiñ i mupañkemb̄iñ. ¹¹ Eme go ine nore mukomec, ‘Go rarâ bombon̄ge ziñuc âzâcne: “Elia e fisijec.” ’” ¹² Eme no rahape izia Wofun̄te Mârozi ira me ira wiac moc bacgu raocmu. Eham̄e no rarâ Ahaba âzâcnepe ware basacgu-bipierâ no nuocmu. No ine qie-naneonecteañ Wofun̄ arañ bacne warehuc juekopac. ¹³ Erâ Ise-

bezi Wofunṭe porofetefâc qâhâmoc-jopame noni ñic 100 rocjoparâ bâfâuc-jopape 50 guru jajahec epie sonjoparâ nânâ opâ gumec-jopahuc jupo i bombonj-nane go mi manamenj me? ¹⁴ Ehuc mukomec, ‘Go rarâ bombonje zinjuc âzâcnec: “Elia e fisijec.” ’ Injuc âzâcnepe e nuocmu!” ¹⁵ Injuc mume Eliazi muwec, “No kiṇaṇ qacnehuc juekopac Anutu Tâpiri Qunqasaṇ Wofuṇ e jujâmbânkekeacte miṇecgac no nahac jâmbân Ahaba fuacnepemu.” ¹⁶ Injuc mume Obadiazi ra Ahaba bâfuarâ âzâcnewec. Âzâcneme Ahabazi Elia bâfuaocṭe rawec.

¹⁷ Rarâ bâfuarâ zinjuc muhuc âzâcnewec: “Israe ñic maṇ bâsifuc ejareekic go hâcne me?” ¹⁸ Injuc mume dân zinjuc bâtikiecnewec: “No Israe ñic maṇ bâsifuc mi ejareekopac. Go â kikefunfâcge ṇoṇe hâcne Wofunṭe sâcmutâc dân qâsuahuc Baali nemu kiṇaṇ qajarehuc Israe ñic maṇ bâsifuc ejareengopienj. ¹⁹ Irec go dân râetec rame Israe ñic sasawa jaṇe Karamele tikio tumaṇnenzepienj. Erâ Baali nemure porofetefâc 460 jaṇe mecne â Asera nemure porofetefâc 400, Isebere teboo nânâ nâengopienj jaṇe mâmâc fisinzepienj.”

Eliazi Anuture funṇe bataniṇkewec

²⁰ Injuc âzâcneme Ahabazi Israe ñic sasawa jaṇerao dân râeme rawec. Ehuc Karamele tikio porofete hetumaṇ-jopawec. ²¹ Eme Elia e ñic ṇokac sasawa maṇfun-jenicko rarâ jaza muwec, “Ṇoṇe ra qohota ware qohota eku wezimucko beheniṇmu? Wofuṇ e Anutu fârine jukacko e bâjâpeniṇ, me Baali e nemu fârine jukacko ine

e bâjâpeniñ.” Mume ñic ñokac jañe dân moc mi bâtikiecnembiñ. ²² Eme Eliazi ñic ñokac zĩñuc jazawec: “Wofun̄te porofete no mocjaha jâmbân hetirine jukopac, Baali porofetefâc-ticne jun̄gopien̄ ine 450. ²³ N̄oñe mupie bulimakao ñicne jajahec nârec-jofaniñ. Eme jañe jañac moc rowosâerâ hezurâ dâkâne dâkâne zocfikio râenzepien̄, ehuc zoc ine qazepie mi zazejec. Ehame no ine bulimakao moc i hezurâ zocfikio wâc râepemu, ehuc zoc wâc qazepe mi zaocmu. ²⁴ Ehame ñoñe nemu-ñen̄icte zâñe wiranzepien̄ â noni Anutu-nanere zâñe wirapemu. Eme wenizi manarâ zoc bâtikieme wahaoemu, ere Anutu me nemu fârine jukac muzo.” In̄uc mume ñic ñokac mâmâc sasawa mumbiñ, “Dân i bian̄ne.” ²⁵ Eme Eliazi Baali porofetefâcne jazawec, “N̄oñe ñic bocjaha, irec ñoñe bânierâ bulimakao bâwosâerâ bazaweniñ. Erâ nemu-ñen̄ic zâñe-ticne wira wâwâsic ecnen̄zepien̄, â zoc ine mi qazen̄zepien̄.” ²⁶ Mume jañe bulimakao jarekicne i rorâ hezu bâmoc embiñ, erâ Baali zâñe-ticne wâsickehuc mumbiñ, “O Baali micnâñecko roc.” I furicte fun̄kembiñzi wirahuc juhapie gun̄pitic ewec. Eme dân̄marac moc mi fuawec, â moczi moc mic-jen̄icko mi rowec. Jañe ine alata bakicne i teriñ qahuc râreckehuc domambiñ. ²⁷ Eme gun̄pitic maickeme Elia e mu âkebic ejarehuc muwec, “Samarierâ wiraniñ me, wiac e nemu i! E mamasasu gie bahuc ñekac mecne, me hata pitic rajec, me hae mocko rajec jukac, me gun̄ fokacte wiwickezo.” ²⁸ Mume jañe owa ruruck-embĩ, erâ mâsi-jen̄ic moc embiñ ine zika sâqe

â sânduzi sahaç-jenjiç hetâcnepie socjenjiç rucnewec. ²⁹ Guŋ pitic dameŋ jâurume maŋsifuc hawari ehuc domahapie owâ giere taha bapa dameŋ bembenkewec. Eme sifu dânmarac moc mi fuawec, moczi micjenjicko mi rowec, moczi dânjenjiç mi renkewec.

³⁰ Eme Eliazi ŋic sasawa jazawec, “Noraopeç wareniŋ.” Mume eraopeç rafârembiŋ. Eme Wofuŋte alata hetâtiekiecne i heqârerâ bawec.

³¹ Mârâç jaha Wofuŋte dân Jakoborao zîŋuc fuawec: “Zâŋeçe Israe muzo.” Eme Israe hâcne ere motecfâç 12 jaŋeraonec ŋic guru 12 fuambiŋ zare-jenjiçte sâc Eliazi qânâ 12 rowec. ³² Rorâ qânâ izi Wofuŋte zâŋeo alata moc bawec. Erâ alata râreckehuc pare kâcçene baratiehuc bawec.

³³ Tarame zocfiki barâ bulimakao hefâuckerâ dâkâ barâ zocfiki faio râewec. Erâ muwec, “Pake-ŋenjiçzi opâ fiarâ qowi bâzio â zocko hesienŋ.” ³⁴ Ehapie muwec, “Mocwâc eniŋ.” Mume mocwâc embiŋ. Ehapie muwec, “Harierâ epie arec 3 eoc.” Mume i wâc embiŋ. ³⁵ Eme opâzi alata rârec mâreŋ qâurucke-fârehuc pare mâmâc bâfusewec.

³⁶ Eme owâ gielo taha bajumbienŋ dameŋ i maickeme porofete Elia e ware mai domarâ zîŋuc muwec: “O Wofuŋ, Abraham Isaka â Israe jaŋere Anutu, go Israe guruo Anutu jukic â no kiŋaŋ qaqaçe jukopac, ehuc wiaç sasawa zi gore micte ekopac irec fuŋne miŋecgac bataniŋkezemec.

³⁷ Micnaneo roc, o Wofuŋ, micnaneo roc, eme ŋicguru zi jaŋe Wofuŋ go Anutu jukic â manjenjiç bârisiekic i mana jaŋgenkenzepienŋ.” ³⁸ Iŋuc

muhame Wofun̄te zocb̄aruñ waharâ taha qowi â zoc â qânâ â wândoc zâsen̄ke-fârewec â pareo opâ zâkeren̄kewec. ³⁹ Ñic ñokac sasawa jañe wiac i honerâ mâren̄ko qarâ zâne mai-jen̄ic hetutuckerâ fohuc mumbin̄, “Wofun̄ e Anutu fârine, Wofun̄ e Anutu fârine.” ⁴⁰ Eme Eliazi jazawec, “Ajoc, Baali porofetefâcne rocjopa-fâren̄in̄, moczi moc mi wisezejec.” Mume rocjopambin̄. Eme Eliazi Kison̄ opâo bacjopa hurâ ira qâhâmoc-jopa-fârewec.

Eliazi hoere numuwec

⁴¹ Elia e in̄uc erâ Ahaba zin̄uc âzâcnewec: “No hoe wareme fânân̄ manakopacte go ferâ nânâ opâge nâc.” ⁴² In̄uc âzâcneme Ahaba e nânâ opâ nâocte fewec. Ehame Elia e Karamele tiki botân̄nao fewec. Ferâ waha ñehuc daperâ qizeticne dien̄ jahecne jahere ñononden̄ko dundun̄ hume kumben̄kewec. ⁴³ In̄uc erâ kin̄an̄ñic-ticne zin̄uc âzâcnewec: “Ajoc, go ferâ hâweckopec fic.” In̄uc âzâcneme e ferâ fihuc muwec: “No hâwecko wiac moc mi honekopac.” In̄uc mume Eliazi muwec, “Go mocwâc fec wahac etec arec 7 ezejec.” ⁴⁴ Eme kin̄an̄ñic e arec 7 tataranao ferâ waharâ zin̄uc âzâcnewec: “Manakic, karorac piticne mac ñic mocte metape in̄ucne hâwecko fuakac.” In̄uc mume Eliazi muwec, “Hoezi Ahaba hebâzickezacte go ferâ âzâcnetec keretac-ticne bazawierâ huoc.” ⁴⁵ Ehame damen̄ mi zorahame karorac â mân̄ân̄ jahe qâzuckepire sambân̄ gâpâre-fâreme hoe micsâko hewec. Eme Ahaba e keretac-ticnao ferâ Jesere haeo risiewec. ⁴⁶ Ehame Wofun̄te tâpirizi

Elia baafekeme umbika-ticne jomarâ Ahaba sir-ickehuc gasackerâ Jesere haesac motâcko bâbâni fisiwec.

19

Eliazi wiserâ Horebe tikio rawec

¹ Ahaba e Eliazi wiac sasawa ebac ewec â zikazi porofete qâhâmoc-jopawec irec binan i Isebe bacne-fârewec. ² Eme Isebe e kinanñic moczi Elia dân zinjuc âzâcneocte sorewec: “Go ñic qâhâmoc-jopamecte tomâcko damen zinjucne go wâc qâhâmocguzo. Injuc mi egarenanmuo ine janjere okacne nemu janje no bazu-narenzepien.”

³ Eme Elia e hâwickeme juju-ticne ñezickehuc faharerâ raku Juda hae moc zâñene Bere-Seba ira fisirâ kinanñic-ticne beheme ñewec.

⁴ Eme Elia e jahackoan mâren burocnao zoan mocjahare sâc zuhuckerâ rawec. Raku kasan kasan jâc mocte funnao waha ñewec. Ehuc hâmoocte zinjuc muhuc numuwec: “3i sâckekac. O Wofun, minecgac juju-nane nowac roc. No mamacfâc-nane janjere sâc mi sirickekopac.” ⁵ Injuc murâ kasan kasan jâc funnao waha fowec. Fohame anjelo moczi bâuahuc âzâcnerâ muwec: “Go faharerâ nânâ nâc.” ⁶ Eme Elia e zâñe firâ qizec botân-ticnao poron moc qânâo rikekicne â opâ zopo moc injuc ñeme honewec. Honerâ nânâ opâ i nârâ mocwâc waha fowec. ⁷ Fohame anjelozi mocwâc fisi bâuahuc muwec, “Go faharerâ nânâ nâc. Go injuc mi ecmuo ine hata raragezi boc ñemâcke-gareocmu.” ⁸ Injuc âzâcneme faharerâ nânâ opâ nâwec. Eme nânâ nâwec izi

basanaŋkeme Anuture tiki Horebe ira fisiocete
ŋafe 30aŋ 40 rahuc juwec.

⁹ Rahuc juku Horebe tikio qânâ hawec moc
bâfuarâ ira ñec foc ewec. Eme izia Anuture dânzi
fisicnewec. Ehuc zĩŋuc âzâcnewec: “Elia, go zira
wemo bahuc jukic?” ¹⁰ Eki muwec, “No Anutu
Tâpiri Qũŋqasaŋ Wofuŋ gore erâ zocne fârone
ehuc juekopac, i zĩŋucte: Israe ñicguru jaŋe gohec
zâzâfic ekicne i behembiŋ, alatage hetâtiembiŋ,
porofetefâcge zikazi jopambiŋ; eme no mocjaha
hâcne hetirine jukopac, ehame no wâc juju-nane
omaeocete giene baŋgopien.”

¹¹ Eme muwec, “Go waha fe tikio Wofuŋ
mai ecnerâ domac.” Eme mi Wofuŋzi fisi
fotâcnezejec i! Ine qanaŋ mângâŋ qicwânzâŋne
Wofuŋ bâniecnehuc tiki qâfâuckewec â qorac
henzaŋnewec; erâ Wofuŋ jahacne mângâŋko mi
juwec. Mângâŋ fotâcneha homen bawec; homen
maŋnao Wofuŋzi wâc mi juwec. ¹² Homen
niniŋkeha zocbârũŋ fisiwec; Wofuŋzi ine
zocmaŋko wâc mi juwec. Zoc wiseha mângâŋ
fânâŋ ananacne mac fuawec. ¹³ Eliazi i manarâ
zâŋe maine ŋaqi-ticnezi qofackerâ waha hawec
motâcko domawec. Ehame marac fânâŋ moc
hazec-ticnao qaqazuwec, ine zĩŋuc wiocnewec:
“Elia, go zira wemo bahuc jukic?” ¹⁴ Eme
micnao rorâ muwec, “No Anutu Tâpiri Qũŋqasaŋ
Wofuŋ, gore erâ zocne fârone i zĩŋucte ehuc
juekopac: Israe ñicguru jaŋe gohec zâzâfic ekicne
i behembiŋ, alatage hetâtiembiŋ, porofetefâcge
zikazi jopambiŋ, eme no mocjaha hetirine
jukopac, eha no wâc juju-nane omaeocete giene

baŋgopien.”

¹⁵ Eme Wofuñ e ziñuc âzâcnewec: “Go hata waremeckoa mâreñ burocnao raku Damasko haeo fisizemec. Fisirâ Hazaele wokemañ ruacnetec Siria ñic jañere ñicwofuñ ezejec. ¹⁶ Erâ Jehu, Nimisire ñokâ, wokemañ ruacnetec Israe ñic jañere ñicwofuñ ezejec, â Elisa, Safati ere ñokâ, Abe-Mehola haeonec, e wokemañ ruacnetec gore tuc qarâ porofete juzejec. ¹⁷ Eme ñic gâcne Hazaele zika-ticne wisecneniñmu jañe Jehuzi jopazejec. Â ñic gâcne Jehu zika-ticne wisecneniñmu jañe Elisazi jopazejec. ¹⁸ No ine sifu Israe guru jañere ukicne ñicñokac 7000 Baali nemu dienzi mi hecnembiñ â e mi muduckembiñ jañe akic-jopape juniñmu hâcne.”

Elisa hefârekicne

¹⁹ Inuc âzâcneme Elia e faharerâ raku Safati ñokâ-ticne Elisa e bulimakao ñicne 24 kion qeticke-jarerâ ejareme mâreñ bâfâuckepie soñañ-jopahuc juha bâfuawec. Erâ fotâcnehuc ñaqi-ticne wickeme Elisare faio fewec. ²⁰ Eme Elisa e bulimakao beheç-joparâ Elia bâjâperâ gasackehuc muwec, “Sifu mana-naretec rarâ neñgoc mamac jahec-nane muduc-jofarâ ie ware bâjâpecgupe.” Inuc mume Eliazi dân ziñuc bâtikiecnnewec: “Go mocwâc risiec; erâ no wiac egarepac irec man-asuzemec.” ²¹ Inuc âzâcneme Elisa e risierâ bulimakao kion hetara-jarerâ qâhâmoc-jopawec. Ehuc kion izia biuc-jeñic rikerâ ñic jareme nâmbiñ. Inuc erâ faharerâ Elia bâjâpehuc kime bafic ecnewec.

20

Ahabazi Siria ñic bawahac-jopawec

¹ Siria ñicwofuñ Benhada e momorifâc-ticne sasawa hetumañ-jopawec. Eme ñicwofuñ 32 jañehac becâsic â keretac rocjopa-fârerâ fe Samaria hae somâckehuc zika qambiñ. ² Ehuc haemañko Israe ñicwofuñ Ahaba dân zĩñuc âzâcneniñte kiñaññic sorec-jopawec: “Benhada e zĩñuc mukac: ³ ‘Siliwa â golge i nore; erâ ñonâñfâcge sahac hawari bĩañ â naru motecfâcge jañe wâc nore jaha.’ ” ⁴ Inuc mume Israe ñicwofuñ e dân zĩñuc bâtikiecnawec: “O ñicwofuñ-nane, no nahacne mecne â wiacte wiac sasawa fonarekac i gore.” ⁵ Eme kiñaññic jañe Israe ñicwofuñtao mocwâc risierâ mumbiñ, “Benhada e zĩñuc mukac: ‘No gorao zĩñuc muhuc dân râepac: “Siliwa â gol, erâ ñonâñfâcge â naru motecfâcge i no qikiñne-narec.” ⁶ Erâ no sifu tomâcko damen zĩñucne kiñañ qaqafâc-nane gorao sorec-jopapemu. Eme jañe go gahacne ficko â kiñañ qaqafâcge jañere ficko babasa gie bahuc wiac i me i hone ziziweekic i rorâ bawiseniñmu.’ ”

⁷ Eme Israe ñicwofuñ e mâren rune soñañ hefârec-joparâ muwec, “Ñoñe ñic keci e imac-nâpoocte gie bakac i hone-hâmoniñ. E ñonâñfâc-nane â naru motecfâc-nane, erâ siliwa â golnanere dân râeme wareme manacnepac.” ⁸ Inuc mume soñañ â ñic ñokac jañe zĩñuc âzâcnembiñ: “Go hazec râerâ dânťicne mi manac.” ⁹ Inuc mupie Israe ñicwofuñzi Benhada kiñaññicfâc-ticne zĩñuc jazawec: “Ñoñe ñicwofuñ-nane dân zĩñuc âzâcnenzepien: ‘Kiñañ

qaqage no wiac bâbâni mumec i epemu â irec faicnao wiac gâcnere mukic i sâcne mi epemu.’” Inuc jazame kiŋaŋŋic jaŋe mocwâc risierâ bombon-jeŋic binaŋ bacnembiŋ. ¹⁰ Eme Benhadazi Israe ŋicwofuŋ dâŋ râecnehuc muwec, “Samaria mâreŋko rufe fokac i ŋicfâc-nane sasawa jaŋe metape fufusuc roninŋe sâc eocmuo ine nemu jaŋe okacne bafehuc bazunarenzepieŋ.” ¹¹ Inuc mume Israe ŋicwofuŋzi dâŋ bâtikiecnahuc muwec, “Dâŋ ziŋuc fokac i manasucneniŋ: ‘Ŋic puriŋne moc e jahacnere maname ŋic sahaç fâsâcheç sâc mocjaha ekopereç mi ezejec.’” ¹² Ehame Benhada e ŋicwofuŋ jaŋehaç bozeo opâ sanan nâhuc ŋeku dâŋ i manarâ ŋicfâc-ticne jazarâ muwec, “Ajoc, dodoma-ŋeŋic sâcke-fâreniŋ.” Inuc mume jaŋe haç i râsi rocnehuc dodoma-jeŋic sâcke-fârembiŋ.

¹³ Ehame porofete moczi Israe ŋicwofuŋ Ahabare manfuŋko fisirâ muwec, “Wofuŋ e ziŋuc mukac: Ŋic guru dindiŋ zi honec-jopakomeç me? Manakic, no miŋecgac gore meo râec-jopa-fârepemu; eme noni sawa Wofuŋ jukopac i go mana tarazemec.” ¹⁴ Inuc mume Ahabazi muwec, “Weni jaŋehaç inuc ecmu?” Mume muwec, “Wofuŋ e ziŋuc mukac: Qâhâc sâc irec mâreŋ soŋaŋ jaŋere kiŋaŋ qaqafâc jaŋehaç gie i bapemu.” Inuc mume Ahabazi muwec, “Eme mozi zika fuŋkeocmu?” Wiome dâŋ bâtikiecnahuc muwec, “Goki.” ¹⁵ Inuc mume Ahabazi qâhâc sâc irec mâreŋ soŋaŋ jaŋere kiŋaŋ qaqafâc biric-jopame zare-jeŋic 232 ewec. Ehame jaŋere râpeo ine Israe ŋic sasawa biric-jopame zare-jeŋic 7

tausen ewec.

¹⁶ Eme gunpiticko Benhada â zikare bafickembin, ñicwofuñ 32 i jañe māmâc bozeo opâ sanan nâku manjenic bibiriwame ñehapie Israe ñic jañe haeonec wahambin. ¹⁷ Qâhâc sâc irec mâren sonan janere kinan qaqaâc jañe bâniembin. Eme Benhadazi ruc bapa ñic sorec-jopawec jañe risierâ zinuc âzâcnembin: “Ñic jañe haeonec wahanjopien.” ¹⁸ Inuc âzâcnepie muwec, “Jañe wamao warenjopienko qâricne rocjopanin, me zikare warenjopienko qâricne jaha rocjopanin.”

¹⁹ Ñic zinuczi haeonec waharâ rambin: Qâhâc sâc irec mâren sonan janere kinan qaqaâc â momori guru moc jañe bâjâpec-jopambin. ²⁰ Ehuc ñic jañe ru sâc râsifâc-jenic jopambin. Eme Siria ñic jañe wisepie Israe ñic jañe jâpec-jopa rambin, â Siria ñicwofuñ Benhada e ine becâsic ñic jañehéc becâsic mocko ferâ wisewec. ²¹ Wiseme Israe ñicwofuñ e rarâ becâsic â keretacfâc-jenic rocjoparâ Siria ñic jopahuc ima samaki bacjopawec.

²² Inuc eme porofetezi Israe ñicwofunte manfunko rarâ zinuc âzâcnewec: “Go rarâ wiac weninuc ecmu i manasu biric ehuc hâbigé rozemec. Siria ñicwofuñ e zoan damen funkehame râsi fisi-gareocmu hâcne.”

²³ Eme Siria ñicwofuñ e kinan qaqaâcne jañe zinuc muhuc âzâcnembin: “Janere nemufâc jañe tikire nemu, irec jañe boc siric-nâpombien. Nâñâc wânenko jañehéc qaqaac enzepenen, ira ine jâmbomac siric-jopananmu. ²⁴ Nâñâc zinuc enzepenen: Ñicwofuñ jañe dodoma-jenickonec

bârâriec-jopahuc jaŋere âkehoc momori jaŋe micne râec-jopanzepeneŋ. ²⁵ Erâ momori mârâc sipirickembiŋ irec sâc biric-jopanzepeneŋ; erâ becâsic keretac mârâc bajumbeŋ irec sâc jaha bazawiec-jopanzepeneŋ, ehuc jaŋehec wâneŋko qaqac enzepeneŋ. Nâŋâc jâmbomac sananŋenanŋmu.” Eme dânjenŋic manarâ irec sâc ewec.

²⁶ Eme zoaŋ damenŋ funkehame Benhada e Siria ŋic biric-joparâ bânîe-jareme Israe ŋic jaŋehec qaqac eniŋte Afeke haeo fembiŋ. ²⁷ Eme Israe ŋic jaŋe wâc iŋuc jaha birickehuc nânâ opâ bâmockerâ jaŋeraopec rambiŋ. Erâ Israe ŋic jaŋe noniŋ guru jajahec mac iŋucnezi teuŋ âtembiŋ, â Siria ŋic jaŋe ine mârenŋ i sâcke-fârembiŋ. ²⁸ Ehame Anuture ŋic moczi Israe ŋicwofunŋtao fisirâ ziŋuc âzâcnewec: “Wofuŋ e ziŋuc mukac: ‘Siria ŋic jaŋe, “Wofuŋ e tikire nemu, e wâneŋte nemu aricne,” iŋuc mumbiŋte no guru dindiŋ zi megao râec-jopa-fârepemu. Iŋuc epe, noni sawa Wofuŋ jukopac i mana tarazemec.’” ²⁹ Eme jaŋe ŋifec â ŋifec teuŋ âterâ fohapie zoaŋ gie bapa 7 tarawec. Ehame zoaŋ gie bapa namba 7 ira zika bâtâcnehuc Israe ŋic jaŋe Siria momori kikezi rara 100 tausenŋ zoaŋ mocjahao jopambiŋ. ³⁰ Jopapie gâcne jumbiŋ jaŋe wiserâ Afeke haeo razimbiŋ. Ehame haesaczi rândiŋkerâ waha ŋic 27 tausenŋ jumbiŋ jaŋe imac-jopawec.

Benhada e wâc iŋuc jaha wiserâ haeoa razirâ ficmaŋ zâzâŋiŋko soŋkewec. ³¹ Ehame kinanŋ qaqafâcne jaŋe âzâcnerâ mumbiŋ: “Manakic, Israe kikefuŋ jaŋere ŋicwofunŋfâc jaŋe ŋicwofuŋ buuruc-jenichec, iŋuc manaenŋopenenŋ. Ire

nânâc maten qonañkerâ qizec-nâñecko repa qâfisehuc Israe ñicwofunťao ranañ, e akic-nâpooemu mecne.” ³² Inuc murâ maten qonañkerâ qizec-jenicko repa qâfisebini, ehuc Israe ñicwofunťao rarâ zinuć mumbini: “Kinan qaqage Benhada e akickecmurâ mukac.” Inuc mupie Ahabazi muwec, “Hâc, jukac jaha me? E qomâ-nane i.” ³³ Eme ñic janě dâñ i me i moc fuame mananzepeneñ muhuc hazec rârâe domambiniťe dâñ i manarâ izia okacne bătikiēcnehuc mumbini: “O jâmbomac Benhada e qomâge.” Inuc mupie muwec, “Ra jowa wareni.” Eme Benhadazi erao fisime ecneme keretacko fewec. ³⁴ Ferâ Ahaba dâñ zinuć âzâcnewec: “Mamac-nanezi mamacge hae jâoc rowec i mocwâc bârisiepemu. Eme go mamac-nanezi Samaria haeo ewec irec sâc ehuc naren garen eere toma fuaocťe Damasko hae turuñne rorâ basanañkezemec.” E inuc mume Ahabazi muwec, “No dâñ mukomec irec erâ behećgupe racmu.” Inuc murâ ehēc zâzâfic moc erâ beheme rawec.

³⁵ Ehame porofete janěre motecfâc janěraonec ñic moc Wofunzi esoc qafen ecneme âgo-ticne zinuć âzâcnewec: “Nuc.” Inuc mume ñic e qatarawec. ³⁶ Inuc eme zinuć âzâcnewec: “Go Wofunťe dâñ mi renkemecte no behećnurâ rahanťec izia laionzi kihâmocguocmu.” Eme ñic e rahame izia laionzi bâfuarâ kihâmowec. ³⁷ Ehame porofete e ñic moc bâfuarâ muwec, “Nuc.” Inuc mume ñic e zâpâ qa ima ecnewec. ³⁸ Eme porofete e zâñe maine foñkeme hawari-ticne hetikieme ra hatao ñicwofun woñeckewec. ³⁹ Ehame ñicwofunzi

fotâcneme wiracnehuc muwec, “Kinan qaqage no zikamanjo jâmbân razipac. Ehame momori moczi njic moc norao jowa fisirâ zinjuc mujec: ‘Njic zi sonankezemec, e sifuckeocmuo ine goki ere âkehoc hâmocmu, me arictac eme ine siliwa monen nemâc-ticne wân râecmu.’ ⁴⁰ Eme kinan qaqage no konkonkehuc rarac wawarec ehape wisejec.” Injuc mume Israe njicwofunzi zinjuc âzâcnewec: “Go gahac biac mutarakicte dânge injuc hâcne mutarazo.” ⁴¹ Injuc muhame porofete e zâne mai-ticnao fon fowec i bârun jaha firuwec. Injuc eme Israe njicwofun e biac zinjuc zânitawec: E porofete moc. ⁴² Zânitame zinjuc âzâcnewec: “Wofun e zinjuc mukac: ‘Noni njic hâmocte bine bâwosâepo i megaonec behetec rajec, irec ere okacne goki hâmocmu â njicfâcne janere okâcne gore njicfâc janje hâmoniñmu.’” ⁴³ Injuc âzâcneme Israe njicwofun e aarickeme dânemâc raku Samaria hae-ticnao fisiwec.

21

Jufure zika fuawec

¹ Jesere hao njic moc juwec zânene Naboti, ere wain giezi Samaria njicwofun Ahabare hae mâren njifecnao fowec. ² Irec zoan mocko Ahabazi Naboti zinjuc âzâcnewec: “Wain giege i nore fic heririn fokacte naretec ira monzan gie bazepac. Ehuc noni irec okacne wain gie bianne moc garezepac, me manatec sâckeme irec furine monen garezepac.” ³ Injuc mume Nabotizi Ahaba dâñ zinjuc bâtikiecnawec: “No apa ñosafâc-nane janere huhure wiac i mi garepemurâ Wofunte

maio mupanjekopac.” ⁴ Jesere ñic Nabotizi dân inuc âzâcneme Ahaba e aarickeme dânemâc ficiticnao fewec. Naboti e zîñuc hâcne muwec: “No apa ñosafâc-nane janere huhure wiac i mi garepemu.” Eme Ahaba e nânâ opâ qikiñnerâ fofo-ticnao waha rârâpe fowec.

⁵ Ehame ñonân-ticne Isebezi iqickerâ wiocnehuc muwec, “Go wemocte aariczi manḡao fusucmarâ foha nânâ mi nâkomec?” ⁶ Wiocneme zîñuc âzâcnewec: “No Jesere ñic Naboti âzâcnehuc zîñuc mupac: ‘Go waiñ giege qikiñne-naretec furine bazepac; me manatec sâckeocmuo ine irec okacne waiñ gie jaha moc gazezepac.’ Eme e dân zîñuc hâcne bârisie-narejec: ‘No waiñ gienane mi garepemu.’” ⁷ Inuc mume ñonân-ticne Isebezi zîñuc âzâcnewec: “Goki Israe ñic raucjoparâ mi jukic me? Ajoc, go faharerâ nânâ nârâ buge mâtenkeoc. Eme no Jesere ñic Naboti ere waiñ gie i sâcne garepemu.”

⁸ Inuc murâ Isebe e Ahabare okacne papia qârenkerâ ere zâneoa basanankehuc sonañ â ñic fekicne Nabotihec hae-ticnao jumbiñ janerao râeme rawec. ⁹ Papiao dân zîñuc qârenkewec: “Zoañ moc bâtirihuc Naboti ecnepie ñic ñokac janere ñondenko ñeñe mamai ira ñezejec. ¹⁰ Eme ere ñifecnao ine ñic repicne jajahec ejactepie ñehuc zîñuc muhuc fune-ticne muzepirec: ‘Go Anutu â ñicwofun musoriñ-jofamen.’ Inuc mupire jowa rarâ qânâzi hehâmonzepien.” ¹¹ Eme sonañ â ñic fekicne Nabotihec hae ira jumbiñ jâne Isebezi dân râewec irec sâc embiñ. Dân i papia râe-jarewec ira

qârenke-fârewec. ¹² Eme jañe zoañ moc bâtirirâ Naboti ecnepie ñic ñokac jañere ñondenko mai jaha ñewec. ¹³ Ehame ñic repicne jajahec jahe fisirâ Nabotire ñifecnao waha ñepic. Ehuc ñic ñokac jañere zâñe faio Nabotire funne zĩñuc mupic: “Naboti e Anutu â ñicwofuñ musorĩñ-jofawec.” Jahe iñuc mupire rorâ hae sahao bahurâ qânâzi hehâmombĩñ. ¹⁴ Iñuc erâ Iseberao dân zĩñuc râepie rawec: “Naboti e qânâzi hehâmokicne.”

¹⁵ Eme Isebe e Naboti qânâzi hehâmokicne dân i manarâ izia Ahaba zĩñuc âzâcnewec: “Ajoc, go Jesere ñic Naboti ere waiñ gie monenji furine bazo mutec qatarawec i ro rauc ec. E mi jukac, e hâmojec hâcne.” ¹⁶ Eme Ahaba e Nabotizi hâmowec irec biñe manarâ izia Jesere ñic Nabotire waiñ gie i hurâ ro rauc eocte faharewec.

¹⁷ Ehame Wofun̄te dânzi Tisibe ñic Elia erao zĩñuc fuawec: ¹⁸ “Ajoc, go faharerâ hu Israe ñicwofuñ Ahaba Samaria haeo jukac e iqickec. Manakic, e Nabotire waiñ gie ro rauc eocte ira rajec jukac. ¹⁹ Erâ zĩñuc âzâcnezemec: ‘Wofuñ e zĩñuc mukac: “Go mâren̄ rune qâhâmohuc mâren̄-ticne wâc mâmâc romen̄ me?” ’ Erâ zuhuckerâ zĩñuc âzâcnezemec: ‘Wofuñ e zĩñuc mukac: “Nabotire soc wahame qâto jañe apurumbĩñkoa juku gore soc wahame apurun̄zepien̄ wâc.” ’ ”

²⁰ Iñuc mume Ahabazi Elia dân zĩñuc âzâcnewec: “O râsi-nane, goki bâfuacnukomec me?” Mume dân zĩñuc bâtikiecnnewec: “Go gahac Wofun̄te zâñe faio wiac mamakâcne ecmurâ irec feñen̄ko femente bâfuacgukopac. ²¹ Manakic, no

wiac repicne bâfua-garepemu. Ehuc ofanğurâ ñicfâcge rambaŋko me niŋgiŋko jujune jaŋe Israe guruonec bârârâŋ-jopa-fârepemu. ²² Erâ no aaric bâfua-narehuc Israe ñic ejaretec hehesic bâfuambiŋ irec erâ kikefunfâcge jaŋe Nebatere ñokâ Jeroboamte kikefunj â Ahia ñokâ-ticne Basare kikefunj ejarepo irec sâc jaha ejarepemu hâcne. ²³ Erâ Wofunzi Isebere wâc zıŋuc muwec: ‘Qâto jaŋe Jesere hae maŋnaoa Isebe nâfâreniŋmu.’ ²⁴ Erâ ñicfâcge jaŋeraonec i me i hao hâmpie qâto jaŋe nâcjopaniŋmu â ñicfâcge i me i kâteo hâmpie wipe jaŋe nâcjopaniŋmu.”

²⁵ Ahaba e ñonâŋ-ticne Isebezi qafenkeme Wofunje zâŋe faio wiac mamakâcne eocte irec feŋeŋko fewec e iŋucne moc mi juwec. ²⁶ E Wofunzi Israe ñic jaŋere zâŋe faio Amori ñic jopa jâpec ejarewec jaŋe ehuc jumbiŋ irec sâc wiac repic qapicne ehuc qâŋ qâqâtâc jaŋerao siŋke-jâmbâŋkewec.

²⁷ Eme Ahaba e dâŋ i manarâ ŋaqi qoruc-ticne bâsuckerâ maten qonaŋkewec, erâ nânâ sowa juhuc matenheckoaŋ foc faharec ewec. E iŋuc ehuc rume rume juwec. ²⁸ Eham Wofunje dâŋzi Tisibe ñic Eliarao zıŋuc fuawec: ²⁹ “Go Ahabazi nore maio rume-jâmbâŋkekac i honekomec me? E nore maio rume-jâmbâŋkekacte ere damenjo wiac repicne i mi bâfuapemu. Juku ine ñokâ-ticnere damenjo kikefunfâcne jaŋerao wiac repicne bâfuapemu.”

22

Mikajazi Ahaba â Josafata jahere findaŋdâŋ

muwec

(Bin II 18:1–34)

¹ Siria ñic â Israe ñic jañe jara jahec â moc rârâsi tâmiric jumbin. ² Juku jara jahec â moc eha Juda ñicwofun Josafatazi Israe ñicwofunṭao wa-hawec. ³ Eme Israe ñicwofunṭzi kinṭaṭ qaqafâcne jazarâ muwec, “Ramoti-Gileade hae i nânâcne hae i ñoñe manṭgopien me? Eme nânâc Siria ñicwofunṭe meonec mi roro mâc inuc nininṭkerâ junanṭmu me?” ⁴ Inuc murâ Josafata zinuc wioc-newec: “Go Ramoti-Gileade haeo zika qazo mâmâc ranacmu me?” Inuc mume Josafatazi Israe ñicwofun dân zinuc bâtikiecnewec: “Wiac sasawa fonarekac i gore biñe jaha; no nahacne mecne, ñicfâc-nane mecne â becâsicfâc-nane mecne nânṭe gore hâcne.”

⁵ Josafatazi inuc murâ Israe ñicwofun zinuc âzâcnewec: “Qanaṭ Wofunṭaonec dân manazore mu wioc ezemec.” ⁶ Inuc mume Israe ñicwofun e porofete 400 heririn hetuman-joparâ zinuc wio-jarewec: “No Ramoti-Gileade haeo zika qazo rapemu me behepemu?” E inuc wiome jañe zinuc âzâcnembin: “Sâcne rac, Wofunṭzi megao râeocmu.” ⁷ Jañe inuc mupie Josafatazi muwec, “Zira Wofunṭe porofete moc junṭgopienṭko janṭerao wâc mu wioc moc enzapeñ me?” ⁸ Inuc mume Israe ñicwofunṭzi Josafata zinuc âzâcnewec: “Zira ñic moc jukac e Imilare ñokâ zânṭene Mikaja, erao mupene eki sâcne Wofun mu wioc ec-neocmu. Erâ ine no ere takicnuekac; e nore findanṭdân bianṭe moc mi muhuc wiac sâqocnere sawa muekac.” Inuc mume Josafatazi muwec, “Ñicwofun go inuc mac mi muc.” ⁹ Inuc mume

Israe ñicwofuñ e micne moc hefârerâ zîñuc âzâcnewec: “Go picpac jaha rarâ Imila ñokâ-ticne Mikaja jowa warec.” ¹⁰ Eme Israe ñicwofuñ â Juda ñicwofuñ Josafata jahe Samaria haere sac-motâcko ñicwofuñ ñaqi-jekichec eri ñeñe-jekicko ñehapire porofete jañe manfun-jekicko domahuc findandân mumbiñ. ¹¹ Ehame Kenanare ñokâ Zedekia e jahac aenji zune bafârerâ muwec, “Wofuñ e zîñuc mukac: ‘Wiac zîñucnezi Siria ñic sâcne hecjopaku hemiziec-jopaniñmu.’ ” ¹² Eme porofete jañe ijaha mufârehuc mumbiñ, “Ajoc, Ramoti-Gileade haeo rarâ añac zeri bâfuac. Wofunzi hae i ñicwofuñ gore meo râeocmu.”

¹³ Eme kiñaññic Mikaja jowaocte rawec e ra fisirâ zîñuc âzâcnewec: “Manakic, porofete jañere dâñzi sâc mocjaha efâreme ñicwofuñtao biankekac. Irec gore dâñzi jañere dâñte sâc jaha ehame mutec sâckezejec.” ¹⁴ Inuc mume Mikajazi muwec, “Wofuñ e jujâmbânkekacte dâñ nazaekac sâc jâmbân mupemu.” ¹⁵ Inuc murâ ñicwofuñtao fisime ñicwofuñzi zîñuc âzâcnewec: “Mikaja, nâñe zika qanañte Ramoti-Gileade haeo ranañmu me behenañmu?” Inuc mume dâñ zîñuc bâtikiecnnewec: “Go rarâ añac zeri bâfuac; Wofunzi hae i gore meo râeocmu.” ¹⁶ Inuc mume ñicwofuñzi âzâcnerâ muwec, “Goki dâñ burec mi ehuc Wofuñte zâñeo dâñ fârinea nazacmurâ damen bocjaha gazaekopac.” ¹⁷ E inuc mume Mikajazi zîñuc muhuc âzâcnewec: “No Israe ñic honec-jopape lama soñañ tâmiric inucne tikio siañ siperec qambiñ. Inuc epie Wofuñzi kecziñuc muwec: ‘Ñic zi jañe bombon tâmiric; irec wamao

hae-jeŋic sâc risienzepien.’” ¹⁸ Mikaja e iŋuc mume Israe ŋicwofuŋzi Josafata dâŋ kecziŋuc muhuc âzâcnewec: “E nore findaŋdâŋ biaŋne moc mi muhuc wiac sâqocnere sawa muekac i mi gazapac me?” ¹⁹ Iŋuc mume Mikajazi muwec, “Zi ine Wofuŋte dâŋ manac: No Wofuŋ e eri ŋeŋe-ticnao ŋeme honehape sambâŋko guru dindin jaŋe gâjoŋne ŋifec â ŋifec doma rambin. ²⁰ Ehame Wofuŋzi muwec, ‘Mozi Ahaba doc bame rarâ Ramoti-Gileade haeo zikao ferâ hâmoocmu?’ Eme moczi dâŋ moc muwec â moczi moc muwec. ²¹ Ehame mâro moczi fuarâ Wofuŋte maio domahuc muwec, ‘Noni doc bapemu.’ ²² Iŋuc mume Wofuŋzi wiocnerâ muwec, ‘Wemo wiaczi doc bacmu?’ Mume muwec, ‘No fuarâ porofetefâcne jaŋere micko eeatuc mâro moc epemu.’ Mume Wofuŋzi muwec, ‘Goki hâcne doc batec fârinehec ezejec, irec fuarâ iŋuc ec.’ ²³ Eme irec ziŋuc manac: Wofuŋzi porofetefâcge zi jaŋere micko eeatuc mâro moc râewec. E gorao wiac repicne fuaocte mupaŋkewec hâcne.”

²⁴ Iŋuc mume Kenana ŋokâ-ticne Zedekiazzi Mikajare maŋfuŋko rarâ maucnao qahuc muwec, “Wofuŋte mâro e go dâŋ gazaocte no-raonec weninuc jaha gorao fâjec?” ²⁵ Eme Mikajazi muwec, “Manakic, go soŋkezore ficmaŋ zâzâŋinŋko razicmu damen ira zâŋe fârigezi honecmu.” ²⁶ Iŋuc mume Israe ŋicwofuŋzi muwec, “Ajoc, Mikaja rorâ hae zirec mâren soŋaŋ Amon â ŋicwofuŋte ŋokâ Joasi jaherao baranin. ²⁷ Ehuc ziŋuc munzepien: ‘Ŋicwofuŋ e kecziŋuc mukac: “Ŋic zi kâpâcwâru ficko râerâ nânâ afecne

mac gumehuc juhapie sa hac furu risiezepac.” ’ ’ ”
²⁸ Inuc mume Mikajazi muwec, “Go sa hac furu risiecmu me mâcne irec dân moc Wofunzi nore micko mi râewec.” Inuc murâ zuhuckerâ muwec, “Ŋic ŋokac sasawa ŋoŋe dân i mananiŋ!”

²⁹ Eme Israe ŋicwofun â Juda ŋicwofun Josafata jahe Ramoti-Gileade haeo rapic. ³⁰ Ehuc Israe ŋicwofunzi Josafata âzâcnerâ muwec. “No hawari-nane hetikierâ zikao rapemu â goki ine ŋicwofun ŋaqige rojuzemec.” Inuc murâ Israe ŋicwofun e hawari-ticne hetikiewec. Eme zikao rambiŋ. ³¹ Eme Siria ŋicwofun e kere-tacfâc-ticne janere micne ³² janê zinjuc jaza-wec: “Ŋoŋe ŋic fekicne wahakicne mi jopahuc Israe ŋicwofun e sawa qanzepienj.” ³² Eme kere-tacte micne janê Josafata honerâ mumbiŋ, “E hâcne Israe ŋicwofun.” Inuc murâ risierâ e qazo ehapie Josafatazi owackewec. ³³ Owackeme keretacte micne janê e Israe ŋicwofun mâcne, i hone tararâ râpeckerâ rambiŋ. ³⁴ Ehame ŋic moczi tepe-ticne âpârehuc kosa qâtâcnekopac muhuc Israe ŋicwofun e becsahac â amecfon zuzuhuc-jekicko muruwec. Murume keretac guriŋ bapa-ticne âzâcnerâ muwec, “Ajoc, kere-tac bâtikierâ zikaonec bacnu rac, no biac zâpâ murucnuŋgopienj hâcne.” ³⁵ Eme zoan ira zikazi boc qârâŋkewec â ŋicwofun e ine keretac-tic-nao dopeckehapie Siria ŋic honec-jopahuc ŋeku ŋafeme hâmowec. Ehame murumbiŋ irec soczi keretac rurumanjo waha rahuc fowec. ³⁶ Ehame zoan ŋetarazo eme momori janerao wiwira moc zinjuc fuawec: “Ajoc, ŋic sasawa hae mârenj-ŋenji

sâc rafâreniŋ!”

³⁷ Eme ŋicwofuŋ e hâmome Samaria haeo bafisirâ duckembiŋ. ³⁸ Ehuc keretac i Samaria haeo opâ zâkâŋ fowec ira zurepie qâto jaŋe socticne apurumbiŋ. Ehame wâc sasec ŋokac jaŋe ijaha ruambiŋ. Wiac i Wofuŋzi dâŋ muwec irec sâcko fuawec. ³⁹ Eme Ahabazi wiac sasawa ebac ewec â fic erinehec bawec, erâ hae sasawa barawec irec binan i Israe ŋicwofuŋ jaŋere Binan Qâhâc papia qizecko qârenke-fârekicne. ⁴⁰ Eme Ahaba e apa ŋosafâcne jaŋerao zuhuckehuc hâmome ŋokâ-ticne Ahaziaz i tucticne qarâ ŋicwofuŋ juwec.

Josafatazi ŋicwofuŋ juwec
(Bin II 20:31–37)

⁴¹ Ahaba e Israe ŋicwofuŋ jume jara jahec â jahec eha Asare ŋokâ Josafatazi fuŋkerâ Juda ŋicwofuŋ ewec. ⁴² Josafata e jara-ticne 35 bazurâ ŋicwofuŋ gie fuŋkewec, erâ Jerusalem haeo bahuc juhame jara 25 tarawec. E nengoc-ticne i Sile-hire otâ, zâŋene Azuba. ⁴³ Josafata e mamac-ticne Asa ere kike hata bâjâpewec. Ehuc moc mi qâsoriehuc Wofuŋte zâŋe faio wiac sasawa eme sâcke-fârewec. Erâ ine furu mâren i mi bârârie-fârekicnere ŋic ŋokac jaŋe furu mârenko taha bâzi â hosâc âsu i rikehuc jumbiŋ jaha. ⁴⁴ Josafata e Israe ŋicwofuŋhec wama qaqac epic wâc.

⁴⁵ Josafatazi wiac sasawa ebac ewec â tâpiri-ticnere fuŋne jowatuwec â zika qawec irec binan i Juda ŋicwofuŋ jaŋere Binan Qâhâc papia qizecko qârenke-fârekicne. ⁴⁶ Mamac-

ticnere damenko boe sau ñic zanzañne jumbin i jañe eki hâcne mâren irecnec jâpec-jopawec.

⁴⁷ Edom mârenko ñicwofuñ moc mi juwec, ñicwofuñ mefâro-ticnezi sawa juwec. ⁴⁸ Eme Josafata e Tarasisi haeonec woke jañe Ofiri haeo rarâ gol roninje sorec-jopawec. Erâ ine woke jañe Ezion-Gebe haeo qanzañne-fârembinje mi rambin. ⁴⁹ Eme Ahaba ñokâ-ticne Ahaziazzi Josafata kecziñuc muhuc âzâcnewec: “Nore kinan qaqañac jañe sifu gore kinan qaqañac jañehc wokeo ranzepien.” Inuc muhuc âzâcneme Josafata e dân i manarâ mi afeckewec. ⁵⁰ Juku Josafata e apa ñosafâcne jañerao zuhuckehuc hâmome jañe fombinjoa apa-ticne Dawidire hae qizecko duckembin. Ehame ñokâ-ticne Joramzi tucticne qarâ ñicwofuñ juwec.

Ahaziazzi ñicwofuñ juwec

⁵¹ Josafata Juda ñicwofuñ jume jara 17 eha Ahaba ñokâ-ticne Ahaziazzi funkerâ ñicwofuñ ehuc Samaria haeo juwec. Ehuc jara jajahec Israe ñic jañere ñicwofuñ juwec. ⁵² E nengoc mamac jahec-ticne jahere kike hata bâjâpehuc Wofunje zâñe faio wiac mamakâcne ewec. Ehuc Nebate ñokâ-ticne Jeroboamzi Israe ñic ejareme hehesic bâfuambin, hehesic i wâc bâjâpewec. ⁵³ Erâ Baali nemu kinan qacnehuc dapecnewec. Ehuc mamac-ticnezi hata sasawa âtewec i bâjâpe-fârehuc Israere Wofuñ Anutu kimben bâfuacnewec.

Kâte Bible
The Holy Bible in the Kâte language of Papua New
Guinea
Buk Baibel long tokples Kate long Niugini

copyright © 1978 The Bible Society of Papua New Guinea

Language: Kâte (Kate)

Translation by: Bible Society of Papua New Guinea

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-11-22

PDF generated using Haiola and XeLaTeX on 11 Nov 2022 from source files dated 30 Nov 2021

76869875-8293-5126-8b67-c576c145ac3c